

Itota Codito ingantedö ante
Wäö
 nänö watapæ ante yewæmongainta

Wængonguï nänö Angainö ante në ëmongaingä Waocä bagacäimpa

¹ Wëenëñedë pöni Wængonguï nänö mä badöñedë Wængonguï nänö Angainö ante në ëmongaingä iñömö do ingacäimpa. Tömengä Wængonguï weca quëwengacäimpa. Ayæ adocä adobai në Wængonguï inongä ingacäimpa. ² Wëenëñedë pöni tömancoo badönämai iñedë mäningä do Wængonguï weca quëwengacäimpa. ³ Wængonguï angä ëñëninge adocä tömancoo badongacäimpa. Tömengä wii badongä bai Wængonguï nänö badongaincoo tömancoo edæ dæ ancædonimpa. ⁴ Mäningä iñömö mönö quëwenguinö entawengacäimpa. Ayæ mönö quëwenguinö edæ entawëninge tömengä waodäni beyæ në ñäö bai inongä ingacäimpa. ⁵ Tömengä në ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mäniï ñäö ædö cæte mönæ ëmonguï.

⁶ Onguïñængä adocanque ingante Wængonguï da pönongä pöningä ingampa. Tömengä ëmöwo, Wäö, ante pëmonte ingacäimpa. ⁷ Tömengä iñömö Wængonguï nänö ñäö ëmömämo ante edonque pöni bacäimpa, ante në ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö në apænedongä ingante pönencædänimpa, ante pongacäimpa. ⁸ Incæte mäningä wii ñäö bai ingaingä ingampa. Wæætë tömengä, Wacä waodäni beyæ në ñäö bai ingaingä ingampa, ante apænecæte

ante pongacäimpa. ⁹ Nē nō ñäö bai nē ingaingä iñömö waodäni tömänäni inänite tömengä nänö ñäö emömämo põnoncæte ante inguipoga wææ pongacäimpa.

¹⁰ Tömengä inguipoga iñömö quëwengacäimpa. Ayæ tömengä inguipoga nē badongaingä iñongante inguipogaque quëwënanäni wæætë Baa äninque tömengä ingante ædö cæte ate bai põnenguinänii. ¹¹ Tömengä edæ tömengä qui weca pongacäimpa. Pongä ate tömengä guidënäni incæ tömengä ingante ænämaï ingadänimpa. ¹² Incæte tömengä ingante nē ængainäni iñömö tömengä emöwo, Codito, ante nē wede põnenäni iñönänite tömengä tömënäni inänite Ao äninque edæ, Wængonguï wënäni bacädänimpa, ante põnö cægacäimpa. ¹³ Ayæ Wængonguï wënäni iñömö wii waocä ëñate bai inänipa. Waocä, Botö wë manguinque, ante änämaï iñongante ëñadänipa. Wii nänöogængä angä beyænque inänipa. Wæætë Wængonguï tömenganque cæcä ate tömënäni tömengä wënäni badänipa.

¹⁴ Tömengä iñömö edæ, Wængonguï nänö Angainö, ante nē emongaingä ininque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængonguï Wengä adocanque inte adocä godömenque ñænængä inte nē cædongä ingä atamönipa. Adocä Mæmpo weca quëwente nē pongä iñömö tömengä nanguï waadete põnö cædongä inte nöingä änogängä ingampa. ¹⁵ Wäö iñömö, Mäningä æbänö ingää, ante apænegacäimpa. “Mäningä botö nē apænedongä ingantedö ante iïmaï apænetabopa. Botö täno põmo imopa. Tömengä nē ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedë tömengä do ingacäimpa,” ante nanguï põni yedæ äninque Wäö apænegacäimpa.

¹⁶ Mäningä nē ayæ Ponguingä iñömö nanguï põni waadete põnö cædinque tömengä wæætë wæætë nänö

entawënö ante pönongä æninqe tomompa. ¹⁷Edæ Wængonguï tömengä nänö wææ angainö ante apæneca ëñëninque Möitee wodi wæætë adodö ante yewæmöninque waodäni inänite godongacäimpa. Wængonguï nänö waadete pönö cægainö ante nöingä nänö angainö ante guiquënë Itota Codito beyænque ëñëmompa. Itota Codito iñömö mönö në Ponguingä ingaingä ingampa. ¹⁸Mönö waocabo tömämö incæ Wængonguï ingante cöwë adämaï imompa. Incæte tömengä adocanque Wengä Wængonguï weca në quëwënungä inte, Mæmpo æbänö ingaingä ingää, ante tömengä odömongä ate pönëmompa.

*Wäö æpënë guidönongä, Botö wii Codito imopa, angä
(Mäateo 3.11-12; Mäadoco 1.7-8; Odoca 3.15-17)*

¹⁹Oodeoidi awënëidi Eedotadëë quëwënäni iñömö Wængonguï quï, ante në godönäni tönö Debiï wodi pæinäni inänite da godönäni Wäö weca godänipa. Gote pöninque adodäni, Æbidö inömi imii, ante apænebi ëñëmönie, äñönäni Wäö iïmaï äninque ²⁰nämä wææ änämaï inte wæætë, Botö wii Codito inömo imopa, ante edonque pöní angantapa.

—Botö wii Codito inömo imopa.

²¹Äñongante tömënäni wæætë tömengä ingante,

—Æbidö inömi imii, Ediya wodi inömi imii. Apænebi ëñëmönie.

Ante änäni ëñëninque tömengä,

—Wabo imopa.

Ante äñongä tömënäni wæætë,

—Wængonguï beyæ në apænebi ayæ Ponguïmi inömi imitawo.

Änäni ëñëninque tömengä,

—Wabo imopa.

Ante angantapa.

²²Tömënäni iinque äninque,

—Æbidö inömi imii, ante apænebi eñemönite töö. Mönitö imönite nē da pönönināni weca godinque mönitö tömēnāni inānite, Æbidö imii, ante ancæmönimpa. In-inque bitö nämā incæ æbānō ämii.

²³ Äñönāni Wäö wæætē tömēnāni inānite, Itaiya wodi nē Wængonguī beyæ nē apæneca nānō angainō bai ante iimaī ante apænebo eñencæminimpa.

—Önömæca incæ nē aa pebo inömo inte botö tömēmo pepāmo iimaī nāni eñenō impa. “Awēnē nānō ponguinō ante töinō pīnonte bai tee möedāni,” ante aa pebopa, angantapa.

²⁴ Paditeoidi nē wadö tedete wadö cædāni nāni cabo inönāni inte tömēnāni pancadāniya inānite da godönāni Wäö weca nē godānipa. ²⁵ Gote pöninque mänināni guiquēnē,

—Bitö wii Codito inömi inte wii Ediya wodi inömi inte ayæ wii Wængonguī beyæ nē apænebi ayæ Ponguimi inömi imipa. Bitö ædö cæte waodāni inānite æpænē guidömi imii.

²⁶ Ante äñönāni Wäö wæætē,

—Botö önonque æpænē guidönömo imopa. Wæætē mīnitö weca adocanque a ongongā iñongante, Tömengā æcānō ingää, ante mīnitö eñenāmaī iminipa. ²⁷ Botö tāno pōmo imopa. Tömengā nē ayæ Ponguingā ingampa. Botö önonque wædænque cæbo inte ædö cæte tömengā awæncata incæ ñi cæte cæbo imoo.

²⁸ Betānia nāni quēwēñömö Oododānō æmæmāa Wäö æpænē nānō guidöñömö mänömaī bagatimpa.

Itota Wængonguī Codotedo

²⁹ Baänæ ate Itota bee tente pongā adinque Wäö apænecantapa. “Aedāni, iingā Wængonguī da pönongā pöningā ingampa. Ayæ tömengā waodāni inguipoga quēwēnāni nāni wēnæ wēnæ cægāinō ante æninque teēmē mongænte wænguingā ingampa, ante Wængonguī

tömengä ingante, Codotedo, ante pönö pemongacäimpa. ³⁰ Mäningä iñömö botö nē apænedongä iñongante botö iïmaï apænetabopa. ‘Botö täno pömo ïmopa. Onguiñængä nē ayæ Ponguingä iñömö godömenque ñænængä inte cædongä ingampa. Edæ botö eñadämaï iñedē tömengä do ingacäimpa.’ ³¹ Botö incæ adobaï, Tömengä æcänö ingää, ante eñenämaï intabopa. Mönö idægocabo iñömonte, Minitö tömengä ingante eñencæminimpa, ante botö æpænē guidöninque pömo intabopa.”

³² Ayæ Wäö, Tömengä ingampa, ante äninque, “Botö æmö ayömete Wængongui Önöwoca incæ öönædē owote equemö bai wææ tömengäa næ gongængä atabopa. ³³ Wængongui, Waodäni inänite æpænē guidöe, ante botö ïmote nē da pönöningä wiï botö ïmo angä bai botö, Itota æcänö ingää, ante eñenämaïmo incædömoimpa. Incæte tömengä botö ïmote iïmaï angantapa. ‘Wængongui Önöwoca incæ æcänö onguiñængäa wææ næ gongængä ayömi mäningä iñömö nē æpænē guidönäni bai Wængongui Tæiyæ Waëmö Önöwoca ingante da pönongä waodäni mïmönoque pö guiquingä, ante cæcä ingampa.’ ³⁴ Mäninö botö adinö impa. Mänömaï beyæ iïmaï ämopa, Mäningä iñömö Wængongui Wengä ïnogä ingampa,” ante Wäö apænegacäimpa.

Itota miñæ nē täno godäni

³⁵ Baänæ ate Wäö tönö tömengä emiñæna mänaa adoyömö ongöñönäni ³⁶ Itota wodo tebæ cægongä adinque Wäö angantapa.

—Aeda, tömengä iñömö Wængongui Codotedo ïnogä ingampa.

³⁷ Mäninö angä eñeninque Wäö nänö nē emiñæna ïnina incæ Itota ingante tee empo godaimpa. ³⁸ Itota dadi emænte ayongä tee empo pöna adinque angantapa.

—Quinante pöminaa.

Ante añongä tömöna wæætë,
—Mætodo, æyömönö owobi. Apænebi ëñëmönae.

Änatapa. Mänine, Mætodo, ante mönö tededö, Në
Odömongä, ante impa.

³⁹ Äna ëñëninque tömengä,
—Ægodöeda go aeda.

Äñongä tömengä miñæ godatapa. Goyöna ædæ
wææicä intapa. Ayæ nänö owocönë gote adinque tömöna
adoönæ tömengä weca a ongönapa.

⁴⁰ Wäö nänö äninö ëñëninque Itota ingante tee empo
goda mënaa iñönate adocanque Æntade iñömö Timönö
Pegodo tönñacä ingantapa. ⁴¹ Tömengä nänö tönñacä
Timönö ingante ancæte ante diqui diqui minte gote ad-
inque angantapa.

—Mëetiya mönö äñongä ingante atamönapa, angan-
tapa. Tömengä iñömö Wængongui nänö në Pönongaingä
Codito ñongä ingampa.

⁴² Ayæ Timönö ingante Itota weca ænte mämongä
pongä adinque Itota angampa.

—Bitö Wäö wë Timönömi ïmi abopa. Botö wæætë, Bitö
täïimö dicabo bai ïmipa, ante bitö ïmite mönö tededö,
Quepata, pönö pemömopa. Önonque adowo ëmöwo incæ
guidiego tededö, Pegodo, änänipa.

Pedipe tönö Näatänaedo ñinate Itota angä tee empo goda

⁴³ Baänæ ate Itota, Gadideabæ ante gocæboimpa, ante
pönengäimpa. Pedipe ingante adinque Itota tömengä
ingante,

—Botö miñæ pöe, ämo, angacäimpa.

⁴⁴ Pedipe iñömö Æntade tönö Pegodo bai Betaida näna
quëwëñömö adoyömö quëwëningä ñongaimpa. ⁴⁵ Pedipe
Näatänaedo weca gocä adinque tömengä ingante ïmai
äninque,

—Wængongui nänö wææ angainö ante yewæmöninque Möitee wodi nänö nē yewæmongaingä ingante mönitö atamönipa. Wængongui beyæ nē apænegainäni adobai mäningä ingantedö ante yewæmongadänimpa. Tömengä iñömö Itota Näatadeta quëwënungä inte Ootee wengä ingampa, ante angantapa.

⁴⁶ Ante añongä Näatänaedo wæætë,

—Näatadeta quëwëñömö adocanque waa quëwente pongä, ante mönitö dicæ ëñëmöniyaa.

Angä ëñëninque Pedipe iñömö,

—Pö ae, angantapa.

⁴⁷ Itota ayongä Näatänaedo pongä adinque tömengä,

—Iingä iñömö näwä idægocä inongä inte tömengä nē nö entawënungä inte babæ cädämai inongä ingampa, ämopa.

⁴⁸ Angä ëñëninque Näatänaedo,

—Æbänö imoo, ante bitö æbänö cæte do ëñëmi,

Ante añongä Itota wæætë tömengä ingante,

—Pedipe iñömö bitö imite ayæ aa pedämai iñedë bitö iigowæncawa tæ contabi iñömite botö bitö imite do atabopa, angacäimpa.

⁴⁹ Ayæ Näatänaedo,

—Awënë nē Odömömi imi, bitö Wængongui Wëmi inömi imipa. Idægoidi mönö cabo iñömönte bitö mönitö Awënë Odeyebi inömi imipa, ämopa.

⁵⁰ Añongä Itota wæætë,

—Bitö iigowæncawa tæ contabi iñömite botö bitö imite atabopa, ämo beyænque pönëmi imipa. Mäninö ante adinque bitö godömenque botö bamönengä cæbo acäbi-impä, ämopa.

⁵¹ Tömengä godömenque angantapa.

—Bitö imite näwangä ämopa. Öönædë wi ænete bayö Wængonguï anquedoidi Waocä ëñagaingä weca wææn-inque æiyönäni bitö acæbiimpa.

2

Cänaa quëwëñömö näni monguimæno cæte bedäni

¹ Mëönaa go adoönæque iñonte Cänaa quëwëñömö Gadideabæ iñömö monguimæno ante bedänipa. Itota wäänä adoyömö ponte ongongacäimpa. ² Itota tömengä ëmiñænäni tönö tömënäni inänite adobai, Monguimæno mïni bequinque, ante tē tē wente ænte pongadänimpa. ³ Ayæ yowepæ wædænque tī nāmæ biinömæ näni ämæ dæ bedäni adinque Itota wäänä tömengä Wengä ingante,

—Tömënäni biinömæ dæ ämæmpa.

⁴ Äñongä Itota wæætë,

—Badä ëñëmi. Botö cæquënënö tömëmoque cæquinö impa. Botö cæyedë wii eyepæ impa, ämopa.

⁵ Tömengä wäänä iñömö nē cædäni inänite,

—Mïnitö iminite æbänö angä ëñente cædäni, angan-tapa.

⁶ Ayæ önompo æmæmpoque go adocadeque æpæncade dica inte badöincade iñömö cö cædäni ongoncädepa. Wængonguï weca guicæte ante waëmö bacæmöimpa, ante äate cædänipa, ante oodeoidi näni äagaincade incädepa. Iincade pancacadea otenta ditodo næ ongoncädepa. Ayæ pancacadea tiëë ditodo næ ongoncädepa. ⁷ Nē cædäni inänite Itota,

—Æpæncadecoo iñömö æpæ eyede pönī pe ñiñæedäni.

Angä ëñëninque pe ñiñængadänimpa. ⁸ Ayæ tömënäni inänite,

—Owæta ænte wædænque mä iyænte monguimæno ante nē cædongä ingante godömini æncæcäimpa, ämopa.

Angä ëñëninque mänömaï cægadänimpa. ⁹ Ayä monguimæno ante në cædongä æpæ inimæ incæ biinömæ badimæ æninque, Æbänö imæ, ante bedinque tömengä, Itota nänö badönimæ impa, ante ëñënämaï inongäimpa. Në cædönäni Itota weca æpæ pe ñiñænänique ëñënönänimpa. Ayä monguimæno ante në cædongä iñömö në monguingä ingante, Nänënë pöe, aa pecä pongä ate, ¹⁰ iïmaï angantapa.

—Wadäni tömänäni waimæ biinömæ täno godönäni bedänipa. Ayä ate ææmæ becæ pönäni tömo pönï bedäni adinque tömënäni biinömæ wædænque godonte näni ænimæ wæætë godönäni bedänipa. Bitö guiquënë ñöwoyedë waimæ biinömæ bitö nänënë concædimæ ænte pömipa.

¹¹ Itota, Acædänimpa, ante mänömaï cædinque tömengä Cänaa quëwëñömö Gadideabæ iñömö mänii mä nänö bamönengæ cægacäimpa. Mänii täi pñænte bamönengæ cæcä adinque woadäni, Tömengä waëmö pönï inte cæcampa, ante edonque agadänimpa. Ayä tömengä ëmiñænäni iñömö tömengä ingante godömenque wede pönënäni bagadänimpa.

¹² Ayä ate Capënaömö quëwëñömö Itota tömengä wäänä tönö tömengä biwïidi tönö tömengä ëmiñænäni tönö wææ gogadänimpa. Mäniñömö godinque wædænque ëönæ quëwengadänimpa.

*Wængonguï oncö tæiyä waëmö bacäimpa, ante cæcä
(Mäateo 21.12-13; Mäadoco 11.15-18; Odoca 19.45-46)*

¹³ Wodo pænta gogaiönæ, ante oodeoidi Patowa näni ææmæ cænguïönæ oo pönï bayedë Itota Eedotadëe iñömö æigacäimpa. ¹⁴ Tömengä iñömö Wængonguï oncö ñænæncönë yabæcönë pö guidinque ayongä wagaïdi obegaïdi tönö equemöïdi inänite godonte æncæte ante në mänäni inänite acantapa. Ayä wadäni campio

næænte nē godonte ænönäni iñömö näni godonte æim-paa tæ contayönänite tömengä acantapa. ¹⁵Yæguincamē ñænæmömo nää wēnēninque que cæte ate æninque tömengä Wængonguī oncö ñænæncönē yabæcönē nē ongönäni inänite tatodongä tao godänitapa. Adobaī obegaidi tönö wagadaidi inänite, Tao gobæwedäni, angä tao godänitapa. Ayæ campio næænte nē godonte ænönäni tömēnāni tigitamö æninque tömengä wido cæcä gueogæ gotimpa. Ayæ adodäni näni æimpaa bæ tacä guidömēmæ go wææntapa. ¹⁶Ayæ equemöidi godonte æncæte ante nē mänäni inänite Itota,

—Mīnitö equemöidi ænte tao gobæwedäni. Botö Mæmpo oncönē incæ mīnitö ædö cæte, Mönö godonte æiñömö bai impa, ante cæmīnitapa töö, angacäimpa.

¹⁷Mäninö angä ēñēninque tömengä emiñænäni Awēnē Dabii nänö yewæmongainö ante iīmaī ante pönente wädänipa. “Bitö oncö ante waodäni waa acädänimpa, ante cæcæboimpa, ante botö nanguī cæinente wænguī wæ,” ante yewæmongatimpa.

¹⁸Ayæ oodeoidi awēnēidi pancadäniya tömengä ingante,

—Bitö mänii tömää awēnē bai cæbi incæ æbänö bitö bamönengæ cæte odömömi adinque mönitö, Mäningä nē angä ingampa, ante ēñencæmönimpa, ämönipa.

¹⁹Äñönäni Itota wæætē tömēnāni inänite,

—Wængonguī tæiyæ waëmö oncö incæ mīnitö iīncö bæ tate ewēmīni ininque botö mēönaa go adoönæque iñö miīncö mänoncæboimpa, ämopa.

²⁰Angä ēñēninque oodeoidi awēnēidi pancadäniya,

—Wængonguī tæiyæ waëmö oncö coadenta i tei wadepo ganca mänongadänimpa. Bitö iñömö ædö cæte, Botö mēönaa go adoönæque iñö miīncö mänoncæboimpa, ämii, änänitapa.

²¹ Itota iñömö nämä baö incæ ante, Wængongui tæiyæ waëmö oncö bai impa, ante apænecä inongäimpa.

²² Tömengä iñcayæ wængä ate Wængongui, Ñäni ömæmöe, angä ñäni ömæmongä ate, Æbänö angacäi, ante tömengä emiñænäni pönänitapa. Ayæ, Wængongui angä eñente näni yewæmongainö nö impa, ante pönänäni inte ayæ Itota tömönäni inänite nänö äninö ante adobai pönengadänimpa.

Itota, Mönö waocabo æbänö imöö, ante eñengampa

²³ Patowa näni ææmä cæyedë Itota Eedotadëe iñömö ponte quëwëninque, Acädänimpa, ante bamönengæ nangui cæcä adinque waodäni tæiyænäni iñömö, Mäningä mönö Codito ingampa, ante pönengadänimpa. ²⁴ Itota edæ, Waodäni tömänäni æbänö entawënäni inänii, ante do eñëngä inte tömengä, Wabänö pönänäni, ante tömönäni inänite gomö adongä ingantapa. ²⁵ Edæ tömengä waodäni näni entawënö ante do eñëngä ingantapa. Ininque waocä iñömö, Waodäni æbänö cädänii, ante apænecæcäimpa, ante Itota tömengä ingante, Bitö botö imo adodö ancæbiimpa, ante änämaï ingacäimpa.

3

Itota tönö Niiçodemö

¹ Paditeocä adocanque tömengä emöwo Niiçodemö tömengä iñömö oodeoidi awënëidi tönö në godongämæ cæcä ingacäimpa. ² Adocä woyowotæ Itota weca pöninque,

—Awënë në Odömömi eñëmi. Wængongui, Odömoncæbiimpa, ante bitö imite da pönongä pönimi imipa, do eñëmönipa. Edæ Wængongui waocä tönö godongämæ cädämaï ingä ininque mäningä ædö cæte bitö bai bamönengæ cæcä aquimönii.

³ Angä eñëninque Itota wæætë,

—Bitö ïmite näwangä ämopa. Nē mempoga ēñadinganque Wængonguī Awēnē Odeye nempo guite aquingä ingampa.

⁴ Äñongä Niiicodemö,

—Waocä picängä ba ate ædö cæte mempoga ēñaquingää. Tömengä nänö wäänä cæncadē ædö cæte mempoga guī æidinqe ēñaquingää.

⁵ Angä ēñēninque Itota angantapa.

—Bitö ïmite näwangä ämopa. Waocä æpænē guidengä iñongante Wængonguī Önöwoca cæcä beyænque mempoga ēñadinganque Wængonguī Awēnē Odeye nempo guite quēwenguingä ingampa. ⁶ Baonga beyænque nē ēñadäni iñömö edæ baonque ēñate quēwēnänipa. Wæætē Wængonguī Önöwoca cæcä beyænque nē ēñadäni iñömö Wængonguī Önöwoca ingante ewocate quēwēnänipa. ⁷ Botö, Bitö mempoga ēñaquēnēmi ïmipa, ante botö änö ēñēninque, Æbämē impa, ante änämaī incæbiimpa. ⁸ Woboyæ nänö cægaī baī wayömö wayömö pæmænte gopa. Woboyæ nänö pæmæmämö ēñēmö incæ, Ædonö pæmænte pö, ædonö pæmænte go, ante ēñēnämāi ïmopa. Wængonguī Önöwoca cæcä beyænque nē ēñadäni tömänäni inänite tömengä æbänö cæcää, ante adobaī ēñēnämāi ïmopa, ämopa, ante Itota apænecantapa.

⁹ Apænecä ēñēninque Niiicodemö,

—Æbänö inguīi.

¹⁰ Äñongä Itota wæætē,

—Idægoidi inänite nē odömömi ïmi incæte mäninö ante ædö cæte ēñēnämāi ïmi. ¹¹ Bitö ïmite näwangä ämopa. Mönitö quiēmē ante ēñēnimöni inte mäninö ante apænemönipa. Mönitö quiēmē ante adimöni ininqe, Mänömaī impa, ante apænemönipa. Minitö guiquéné möni änö ante apænemöni ēñēninque ayæ Baa ämini inte

pönenämaï iminipa. ¹² Botö mīnitō imīnite, Inguipoga quēwēnāni weca æbānō ī, ante apænedimo imo incæte mīnitō ēñēnāmaï iminipa. Īnīnque Wængonguī cæcā beyænque öönædē mīni quēwenguīnō ante æbānō ī, ante apænebo bai ædō cæte pönenguīmīnii, ante apænecantapa.

¹³ Ayæ apænedinque, “Waodāni tōmānāni öönædē æidāmaï ingadānīmpa. Waobo nē ēñagaīmo inte öönædē quēwente nē wææ pōmo īñōmō botō adoboque öönædē æībo imopa. ¹⁴ Mōitee wodi öñōmæca tæntæ nāni badōninto ænīnque awāa ñā cædinque gö cæcā a ongongatīmpa. Waobo ēñagaīmo imote adobaï awāa timpodinque tīwadīnque gö cædāni wægonguēnēmo imopa. ¹⁵ Mānōmaï botō imote cædāni adīnque botō imote nē wede pönēnāni īñōmō tōmānāni cōwē wænāmaï quēwencædānīmpa,” ante Itota apænegacāīmpa.

Wængonguī nānō waadete pönēnō

¹⁶ “Edæ Wængonguī incæ inguipoga quēwēnāni inānite nē waadete pönengā inte tōmengā Wengā adocanque onguīñengā īñongante pönongā pongacāīmpa. Īnīnque æcānō tōmengā ingante nē wede pönēna īñōmō tōmengā wē womönāmaï inte cōwē wænāmaï quēwencæcāīmpa.

¹⁷ Edæ Wængonguī incæ tōmengā Wengā ingante inguipoga īñōmō da pönongā pongacāīmpa. Incæte, Inguipoga quēwēnāni nāni pante wæquinque, ante apænte ancæte ante wīī pongacāīmpa. Wæætē inguipoga quēwēnāni inānite tōmengā ængā beyænque quēwencædānīmpa, ante tōmengā ingante da pönongā pongacāīmpa.”

¹⁸ “Æcānō tōmengā ingante nē wede pönēna īñōmō Wængonguī tōmengā ingante, Bitō pante wæquinque cæbīpa, ante apænte änāmaï incæcāīmpa. Æcānō guiquēnē wede pönēnāmaï ina īñōmō Wængonguī tōmengā ingante, Botō Wengā adocanque īñongante bitō

tömengä emöwo ante pönenämaï inömi inte wæcæbi-
 impa, ante do apænte angä ingampa. ¹⁹ Wængonguï
 nänö apænte änö iñömö iïmaï impa. Nē ñäö bai inongä
 iñömö, Wængonguï æbänö ingää, ante inguipoga iñömö
 ancæte ante pongacäimpa. Incæte waodäni tömënäni
 nāni cædimāmo wënæ wënæ i beyænque wëmö iñömö
 ante waadete pönënāni inānīpa. Wæætē nē ñäö bai
 inongä ingante waadedāmaï inānīpa. ²⁰ Nē wënæ wënæ
 cædönāni inte ñäö iñömö ante pïinque Baa äninque,
 Mönö cædinö edonque pönī badāmaï ingæimpa, ante
 ñäö iñömö pönāmaï inānīpa. ²¹ Waodäni Wængonguï
 näwangä nänö ämaï nē cædönāni guiquënë, Mönö cædinö
 ante Wængonguï mönö tönö godongämæ cæcä beyænque
 cætamompa, ante edonque pönī acædānimpa, ante cæd-
 inque ñäö iñömö pöninque cædānīpa.”

Wäö nē guidönongä Itota ingantedö ante apænecä

²² Ayæ ate Itota tömengä emiñænāni tönö Oodeabæ
 wædænque nāni quëwëñömö godānitapa. Gote pön-
 inque mäniñömö tömënāni tönö wædænque quëwën-
 inque Itota angä beyænque tömënāni waodäni inānite
 æpænē guidönāni guiigadānimpa. ²³ Ënöö quëwëñömö
 æpæ nanguï mä adinque Wäö mäniñömö guidongä
 guiigadānimpa. Ayæ waodäni, Wäö mönitö imönite
 æpænē guidonguingä, ante cöwë tömengä weca pönāni
 inānite guidongä guidānimpa. Ënöö quëwëñömö Tadiï
 quëwëñömö eyequeï inimpa. ²⁴ Mäniñedē Wäö ingante
 ayæ tee mönedāmaï ingadānimpa.

²⁵ Wäö emiñænāni pancadāniya oodeocä adocanque
 tönö apænedinque, Mönö oodeocabo æbänö cæte
 Wængonguï weca guiicæte ante waëmö bacæmōimpa,
 ante tömënāni nāni pönënö ante guëadó guëa ante
 tedewënānīpa. ²⁶ Adodāni Wäö weca ponte apænedinque,

—Nē odömömi ēñēmi. Oododänö ämämäa bitö weca nē pöningä ingantedö ante bitö, Mäningä ingampa, ante apänebitawo. Edæ mäningä onguiñængä iñömö adobai æpänē guidongä guidänipa töö. Waodäni tömänäni tömengä weca godänipa, ante wädänitapa.

²⁷ Ante wädäni ēñēninque Wäö,

—Wængonguī öönädē quēwēnongä pönö angä äninque waocä mänömaī beyæ cæcampa. ²⁸ Botö wii Codito iñömo imopa. Ìñæmpa Wængonguī botö imote täno da pöningä pönimo imopa. Tömengä ayæ Ponguingä, ante apänetabopa. Mänömainö ante apänebo ēñēnimini inte minitö tömemini mäninö ante nē apänequēnemini iminipa. ²⁹ Monguingä iñömö mongä ate tömengä onquiyængä nänöogængä bacampa. Tömengä guidengä iñömö nē monguingä ante wänö cöninque ēñēnongä monguingä apäneacă ēñēninque, Monguingä apäneacă ēñēmopa, ante watapæ tocampa. Botö adobai Codito apäneacă ēñēmopa, ante mäningä bai nanguī watapæ tobo imopa. ³⁰ Tömengä iñömö godömenque ñænængä inte cædongä baquēnengä ingampa. Botö guiquēnē pönömenque wädämo inte cædömo baquēnēmo imopa, ante Wäö apänegacäimpa.

Öönädē nē quēwēnte wææ pongä

³¹ Ayæ Wäö godömenque apänecantapa. Öönädē nē quēwēnte wææ pongä iñömö tömengä iñömö wii wadäni bai wädangä inte wæätē ñænængä inte cædongä ingampa. Öönädē nē quēwēnte wææ pongä iñömö tömengä godömenque ñænængä inte cædongä ingampa. Inguipoga iñömö nē ēñacă guiquēnē waodäni bai quēwēnongä inte inguipogaque ante apänecampä. ³² Tömengä Wængonguī weca quiēmē adingä inte quiēmē ēñēningä inte mäninö ante apäneacă ēñēninque wadäni wæätē, Näwangä impa, ante änämaī inänipa

töö. ³³ Mäniñö ante në Ao angä guiquënë tömengä, Wængongui näwangä angä ingampa, ante edonque pönï angä inongä ingampa. ³⁴ Edæ Wængongui nänö da pönöningä iñömö Wængongui nänö änö ante apænecampa. Tömengä ingante Wængongui iñömö tömengä Önöwoca ingante godongä æninque tömengä ædæmö ewocate quëwengampa. ³⁵ Mæmpo Wængongui iñömö tömengä Wengä ingante në waadete pönengä ingampa. Wængongui tömengä ingante, Bitö nempo quino inincoo tömancoo pönömo æninque bitö awënë bacæbiimpa, ante pönö cægacäimpa. ³⁶ Æcänö Wængongui Wengä ingante në wede pönëna iñömö tömengä cöwë wænämaï quëwencæcäimpa. Æcänö Wængongui Wengä ingante në Baa ante pönënaï ina guiquënë tömengä wii cöwë wænämaï quëwencæcäimpa. Edæ Wængongui tömengä ingante ængui nänö panguimämo cöwë cædongä ingampa, ante Wäö mäniñedë iinque apænecäimpa.

4

Itota Tämadiabæ onquiyængä ingante apænecä

¹ Paditeoidi inänite iïmaï ante tededäni ëñënanitapa. Itota pönö cædinque æpænë guidongä guiidique tömengä nänö ëmiñænäni iñömö wii Wäö ëmiñænäni bai wædænque badäni inte nanguï inäni badänipa, ante tededänitapa. ² Mänömaï änäni incæte wii Itota në guidongä inongäimpa. Wæætë tömengä ëmiñænäni waodäni inänite guidönäni guiigadänimpa. ³ Mäniñö ante Paditeoidi do ëñënanipa, ante änäni ëñëninque Awënë Itota Oodeabæ quëwëninque wadæ go Gadideabæ iñömö ocä ëmænte gogacäimpa.

⁴ Gadideabæ taadö Tämadiabæ iñömö tæcæguedë inö godö tömengä goquënegä inongäimpa. ⁵ Tämadiabæ

iñömö godinque tömengä Ticada näni añömö pongantapa. Mäniñ Ticada quëwëñömö eyequei docä Aacobo wodi tömengä wengä Ootee wodi ingante, Pancabaa bitö ömæ baquiñömö, ante tömengä ingante nänö godongaïmæ inimpa. ⁶ Ayä æpäamönicæ Aacobo wodi nänö äæ wogaïmönicæ adoyömö inimpa. Itota taadö gobæ inö godinque nangæ badinque æpäamönicæ iñömö pö tæ contayongä mäniñedë tæcæ bæcä bagatimpa. ⁷ Tæ contate ongöñongä Tämadiabæ quëwengä onquiyængä æpä iyænte tadonte æncæte ante pongä adinque Itota tömengä ingante,

—Æpä pönömi beboe, angantapa. ⁸ Edæ tömengä miñæ në godäni mäninäni quëwëñömö cænguï godonte æncæ godäni inönänimpa.

⁹ Tämadiaidi inänite oodeoidi cöwë gomö adäni inänipa, ante ëñengä inte Tämadiabæ quëwengä onquiyængä iñömö Itota ingante,

—Bitö oodeobi imi incæte botö Tämadiabæ quëwëmo iñömöte bitö ædö cæte botö imöte, Æpä pönömi beboe, ämii, ämopa.

¹⁰ Äñongä Itota wæætë,

—Bitö, Wængonguï quinö nänö pönöni i, ante ëñente bai ayä, Æbodö inömo inte bitö imite, Æpä pönömi beboe, ante apæneboo, ante ëñente bai bitö wæætë botö imöte, Æpä pönömi beboe, ancædömiimpa. Ayä botö bitö imite æpä quëwenguïmæ pönömo becædömiimpa, ämopa.

¹¹ Angä ëñëninque onquiyængä,

—Awënë, bitö æpä mä iyæncade dæ ampa. Ayä æpäamönicæ guiibæ impa. Mänimæ æpä quëwenguïmæ bitö në apænedimæ ædönö mä iyænte ænguïmii.

¹² Mönö docä mæmpo Aacobo wodi iñömö, Botö ämæwo wæmo adinque botö æpäamönicæ minitö qui bacæimpa,

ante iimonicæ mönō imonte godongacäimpa. Tömengä adomonicæ æpæ begacäimpa. Tömengä wänäni tönō tömengä cæningäidi adobaï adopæ begadänimpa. Adocä mönō docä wædangä iñongante bitō godömenque ñænämi inte nē cædömi imitawogaa, ämopa.

¹³ Äñongä Itota wæætē,

—Æcämenque iñömō mänimæ bedinque wæætē gæwænte bacæcäimpa. ¹⁴Æcämenque botō godonguimæ nē becä guiquënë tömengä gæwänämaï cöwē quëwencæcäimpa. Wæætē botō tömengä ingante tömömo godonguimæ godömo bedinque tömengä botō quëwënō entawente quëwencæcäimpa. Æpäamonicæ cöwē cægō baï botō tömengä mīmōno godonguimæ beyænque tömengä wänämaï nänō quëwenguinō do äñinque quëwencæcäimpa, ämopa.

¹⁵ Onquiyængä tömengä ingante,

—Awënë, äñinque, Botō gæwänämaï bacæboimpa, ante mänimæ botō imote pönömi beboe, ämopa. Ayæ mäniñömō cöwē æpæ iyæncæ pönämaï incæboimpa.

¹⁶ Ante äñongä tömengä wæætē,

—Goe, bitō nänöogængä ingante aa pedinque ænte mämömi pongæe, angantapa.

¹⁷ Äñongä tömengä wæætē,

—Botō nänöogængä dæ ampa.

Angä ëñëninque Itota tömengä ingante,

—Bitō, Botō nänöogængä dæ angampa, äñinque nö ante ämipa. ¹⁸Iñæmpa bitō nänöogæidi önompo æmæmpoque iñönänite bitō tömënäni inänite mönimi imipa töö. Ayæ ñöwoyedë onguñængä bitō weca nē quëwengä iñömō wii bitō näwä nänöogængä ingampa. Ìñinque ñöwo bitō änō iñömō edæ näwangä impa, ämopa.

¹⁹ Angä ëñëninque onquiyængä,

—Awënë, Bitö Wængonguï beyä nē apänebi ïmi ad-
inque ēñēmopa. ²⁰ Mönitö dodäni mæmpoidi wodi, ïi on-
quiyabo ïnō gote Wængonguï ingante, Bitö Awënë Wæn-
gonguï ïmidö anguënë, ante ædæ wææninqe angadän-
impa. Minitö nē oodeoidi ïmini guiquënë, Wængonguï
ingante waa ate apä necæte ante Eedotadëe quëwëñömö
mäniñömonque godinque ædæ wæante apä necæïmpa,
äminipa töö.

²¹ Äñongä Itota wæætë,

—Onquiyämi ēñëmi. Botö änö ēñëninque pönëe.
Minitö ïñömö ædæ wææninqe botö Mæmpo ingante,
Bitö Awënë Wængonguï ïmidö anguënë, ante ïi onquiyabo
ïnō incæ Eedotadëe mäniñömö incæ minitö mäninö ante
änämaï anguiönæ oo pönï impa. ²² Minitö tãmadi-
aidi ïñömö nē Wængonguï ingante, Bitö Awënë Wæn-
gonguï ïmidö anguënë, ante ædæ wææninqe apänemïni
incæte adocä ingante, Æbänö ingää, ante ēñënämaï
ïminipa töö. Mönitö guiquënë nē ædæ wææninqe
Wængonguï ingante waa ate apänemöni inte adocä,
Æbänö ingää, ante do ēñëmöni ïmönipa. Edæ, Nē wënæ
wënæ cädäni wæncæ cädinäni incæ quëwencädän-
impa, ante nē Ængä ïñömö oodeocä ïnongä ingä apa
änewëë. ²³ Botö Mæmpo ingante, Bitö Awënë Wængonguï
ïmidö anguënë, ante ædæ wææninqe näwangä ante
apä nedönäni inte apä necädänimpa. Adodäni, Näwangä
impa, ante nö pönente ëwocädäni inte ædæ wææninqe
Wængonguï ingante mäninö ante watapæ apä necädän-
impa. Mäninö ante näni apä nequïönæ ïñömö edæ oo
pönï impa. Edæ do ïinque batimpa. Wængonguï, Mänö-
maï entawente nö pönënäni bai ïnäni ïnänite diqui diqui
mininque, Mäninäni que botö ïmote, Bitö Awënë Wæn-
gonguï ïmidö anguënë, ante ædæ wææninqe watapæ
apä necädänimpa, angampa. ²⁴ Wængonguï Önöwocaque

ëwocate quëwengä ingampa. Ìninqe në ædæ wæænte tömengä ingante watapæ apænedäni iñömö tömënäni, Näwangä impa, ante nö pönente ëwocadäni inte ædæ wææninque tömengä ingante watapæ apænequënänäni inänipa, ämopa.

²⁵ Angä ëñëninque onquiyængä,

—Botö, Mëetiya näni Codito änogä poncæcäimpa, ante do ëñëmopa. Tömengä pongä ate, Æbänö ingüi, ante mönö imonte tömänö odömonte apænecä ëñencæmönimpa.

²⁶ Äñongä Itota wæætë,

—Botö në apænebo iñömö Codito inömo imo apa cæbii, ämopa.

²⁷ Tæcæ apæneyongante tömengä miñæ në godäni ocæ ëmænte ponte ayönäni tömengä iñömö onquiyængä ingante apænecä adinque, Æbänö cæ wæmönii, ante guñente wädänitapa. Incæte, Æbänö ämii, ante, Quiñante tömengä ingante tedebii, ante adocanque incæ äñämaï ingantapa. ²⁸ Ayæ onquiyængä tömengä iyæncade ëmö cæte näni quëwëñömö ocæ ëmænte gote pöninque waodäni inänite apænedinque,

²⁹ —Ægodödäni, onguñængä iñömö botö imote tæcæ adinque, Botö æbänö cæboo, ante tömänö ante botö imo në apænecä ingante pö aedäni. Mäningä wabänö mönö Codito inongä ingantawo, ante ämopa.

³⁰ Angä ëñëninque tömënäni näni quëwëñömö tao godinque tömengä weca gogadänimpa. ³¹ Onquiyængä näni quëwëñömö tæcæ goyongä Itota nänö në ëmiñænäni iñömö tömengä ingante,

—Awënë në Odömömi imi wædænque cæe, ämönipa.

³² Ante äñönäni tömengä wæætë tömënäni inänite,

—Botö cængui botö ëadö ante quiñö i, ante minitö guiquënë tömää ëñënëmaï iminipa töö.

³³ Angä ëñëninque tömengä ëmiñænäni godongämä nämanque apænedinque,

—Wabänö wacä tömengä ingante cænguï ænte pongantawo.

³⁴ Äñönäni Itota,

—Botö ïmote në da pönongä nänö änö bai botö cædö ïñömö mänii tömömo cænguï bai impa. Ayæ, Tömengä nänö cædö ante tömänö iinque cæbopa, ante botö cædö ïñömö botö cænguï bai adobai impa. ³⁵ Minitö ïñömö, Mëa go mëa apäicä bayonte amiñayedë tömömoncodë gæcæmönimpa, ante wii äminitawo. Botö guiquënë minitö iminite ämopa. Waodäni inänite wi æmonte aedäni. Edæ mäninäni tömömoncoo gæyedë bai inänipa.

³⁶ Itota, Botö beyæ ante waodäni inänite në gædongä ingante botö, Bitö cæbipa, ante paga cædinque ñwoyedë incæ do pönömo ængampa. Wænämaï wantæpiyæ quëwencædänimpa, ante cædinque ñwoyedë incæ tömengä tömënäni inänite do gædongä ingampa. Iinque botö änö ante waodäni mïmöno në quiyadingä tönö në gædingä tönö guëa tocædaimpa. ³⁷ Mänömaï wëenëñedë näni angainö ante, Waocä adocanque tömömö quiyacä ate wacä guiquënë në gædongä ingampa, ante näwangä ante impa. ³⁸ Tömömoncodë ïñömö cædäni bai cædämaï imini incæte minitö tömömoncoo gæquinäni bai bacæmünimpa, ante botö, Waodäni botö quinäni inänite gæcæmünimpa, ante minitö iminite da godömo gominitapa. Wadäni ïñömö do mänincodë nangui pönü quiyate cædinque botö änö ante waodäni inänite apænegadänimpa. Minitö guiquënë mïni cædämaï ïñömö incæ önonque gædimini imünipa, ante Itota apænegacäimpa.

³⁹ Onquiyængä guiquënë tämadiaidi mäniiñömö näni quëwëñömö quëwënäni inänite, “Tömengä ïñömö botö ïmote tæcæ adinque, Botö æbänö cæboo, ante tömänö

ante botö imote apænecantapa,” ante apænecä ëñëninque tömënanï nanguï inäni Itota ingante pönengadänimpa. ⁴⁰ Tämadiaidi tömengä weca godinque, Bitö mönitö weca a ongöe, änäni ëñëninque tömengä mëönaa iñonte tömënanï weca owocantapa. ⁴¹ Tömengä nänö owoyedë tömengä nänö änö beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante,

—Wii bitö apænete änonque ante ëñëninque pönëmöni inte mönitö tömengä apænecä adobaï ëñënimöni imönipa. Ayæ, Mäningä iñömö inguipoga mönö quëwencabo iñömönte tömengä näwangä mönö imonte në Ænongä ingampa, ante do ëñëmönipa, apænegadänimpa.

Itota cæcä beyænque awënë tönö cæcä wengä waa bacäi

⁴³ Mëönaa go ate tömengä mäniñömö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëñedë, lïmaï impa, ante änongäimpa. Wængongui beyæ në apænecä inte tömengä nänö pægaimæ incæ mäniñömö apæneyongä tömengä tönö pægainäni guiquënë tömengä ingante wii waa adänipa töö, ante änongäimpa. ⁴⁵ Tömengä mäniï Gadideabæ nänö ponque pongä adinque gadideaidi edæ Eedotadëe iñömö Patowa näni ææmæ cæyedë Itota bai mäniñömö gote ongöñönäni, Tömengä æbänö cæcäa, ante tömäa adinäni inte, Bitö pömi waa amönipa, ante tömengä ingante apænegadänimpa.

⁴⁶ Ayæ Gadideabæ godinque Itota wæætë Cänaa näni quëwëñömö, Æpæ incæ biinömæ bacäimpa, ante wëenëñedë nänö cædiñömö adoyömö gocantapa. Capënaömö näni äñömö quëwëninque adocanque pancabaa awënë tönö godongämæ cæcä iñömö tömengä wëñængä onguiñængä wënæ wënæ inongäimpa. ⁴⁷ Adocä

onguiñængä iñömö, Itota Oodeabæ quëwente Gadideabæ pongä, änäni ëñëninge tömengä Itota weca gote angantapa. Botö wëñængä onguiñængä wæncæ cæcä iñongante bitö tömengä ingante cæbi waa bacæe. Ægodöe. ⁴⁸ Itota tömengä ingante,

—Botö, Acæminimpa, ante bamönengæ cæbo ate wæmini inte minitö mäninö beyænque botö imo pönëmini awædö.

⁴⁹ Ante apæncä ëñëninge pancabaa awënë tönö godongämæ cæcä,

—Awënë, botö wëñængä ayæ wænämai iñedë ægodöe gocæimpa.

⁵⁰ Ante ãñongä Itota wæætë,

—Ñowo wadæ goe. Bitö wëñængä iñömö quëwencæcäimpa, ämopa. Angä ëñëninge onguiñængä, Itota nänö änö nö impa, ante pönëninge wadæ gogacäimpa. ⁵¹ Tömengä, Botö oncö, ante taadonque goyongante tömengä beyæ në cædönäni tömengä ingante apæncæte ante pö bee ténanitapa. Pö bee tëninge,

—Bitö wëñængä waa bacäi.

⁵² Ante apænedäni ëñëninge tömengä tömënäni inänite, Botö wëñængä æyedënö waa bacäi, ante ãñongä tömënäni wæætë tömengä ingante,

—Iimö ædæ gowayedë mäniñedë tömengä gançæ bacantapa, ante apænedänitapa. ⁵³ Ayæ wëñængä mæmpo, Bitö wëñængä quëwencæcäimpa, ante Itota botö imote nänö äniñedë adoyedë botö wëñængä do waa bacantapa, ante wædinque tömengä tönö tömengä näni quëwencabo tömancabo Itota ingante wede pönënäni bagadänimpa. ⁵⁴ Itota oodeoidi weca quëwente Gadideabæ ocæ ëmænte pönëninge tömengä mäniñömö ii bamönengæ cædinque mempoga nänö cædö bamönengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönö Wængongui beyæ, ante nani æämæ cæyedë Itota Eedotadëë iñömö æidinke ado ante gogacäimpa. ² Eedotadëë wææ cæte iñömö obegaidi nani pö guidemö gäänë gäwapæ impa. Mänimæ gäwapæ ebedeo tededö Betadapæ nani ämæ yæwedeca önompo æmæmpoque ñoncæcate inoncöimpa. ³ Mänincönë wënæ wënæ inäni tæiyænäni cöwë öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni inänipa. ⁴ Adodäni, Æpæ incæ gopæ, ante wänö cönönäni inönänimpa. Edæ Wængongui anquedo wæætë wæætë, Mänimæ incæ incæ gopængäimpa, ante wææ pöninque cædongäimpa. Gäwapæ incæ incæ go cæpæ adinque æcänö täno mänimænë guida inte adocä quiëmë wënæ wënæ i waa badongäimpa. ⁵ Mäniñömö öñönäni weca adocanque në öñönongä iñömö todëinta i ocho wadepo ganca wënæ wënæ inte wægaingä inongäimpa. ⁶ Adocä mäniñömö öñongä ingante Itota ponte ayongä wadäni, Mäningä wantæpiyæ mänömaï wënæ wënæ inte wægaingä ingampa, ante apænedäni ëñëninque Itota tömengä ingante,

—Bitö, Waa bänëmo, ämitawo.

⁷ Ante äñongä në wënæ wënæ ingä wæætë,

—Awënë, gäwapæ incæ incæ gopæñedë æcänö botö imote ænte guiquinaa edæ dæ angampa. Ayæ botö, Æpäñë guicæboimpa, ante goyömo wacä pöninque do täno guicä.

⁸ Ante wæyongante Itota,

—Ængæ gantie, bitö bee podonte möïmo ænte goe.

⁹ Äñongä onguiñængä iñömö iñontobæ waa badingä inte tömengä bee podonte möïmo ænte cægonte gocantapa.

Oodeoidi nāni guēmanguiönæ iñonte Itota mänömaï cæcantapa. ¹⁰ Mänömaï beyæ oodeoidi awënëidi iñömö onguiñængä nē waa badingä ingante,

—Nōwoönæ guēmanguiönæ iñonte mönō æbänō cæquiï, ante do wææ yewæmonte impa cæbii. Bitō bee podonte möïmo næænāmaï incæbiimpa.

¹¹ Ante pīññōnāni tōmengä wæætē,

—Botō ïmote, Waa bae, ante nē cædingä iñömö adocä incæ, Bitō bee podonte möïmo ænte goe, angä cætabopa.

¹² Angä ëñëninque tōmënāni tōmengä ingante,

—Mäningä iñömö bitō ïmite, Bitō bee podonte möïmo ænte goe, ante nē angä iñömö æcänō ingää. Apænebi ëñëmönie, änānitapa.

¹³ Itota guiquënë do waodāni nanguï ïnāni ongönāni tæcæguedē go wadæ godongäimpa. Mänömaï beyæ onguiñængä nē waa badingä iñömö, Nē cædingä æcänō ingää, ante ëñënāmaï ingantapa. ¹⁴ Ayæ ate Itota Wængonguï oncō ñænæncō yabæcönē go guidinque tōmengä ingante bee tēninque,

—Ëñëmi, bitō wæætē waa babi ïmipa. ïninque godömenque wënæ wënæ cædāmaï incæbiimpa. Bitō mäninō wënæ wënæ bitō cægainō ante ñimpo cædāmaï ïmi ïninque wabänō bitō wæwenguinque godömenque babaïmipa, ämopa.

¹⁵ Angä ëñëninque onguiñængä wadæ gote oodeoidi awënëidi weca pönninque angantapa. Botō ïmote, Waa bae, ante nē cædingä iñömö Itota ingampa, ante apænecantapa. ¹⁶ Mänömaï beyæ Itota mäninō nänō cædinō ante guēmanguiönæ iñonte cæcä adinque oodeoidi awënëidi iñömö tōmengä ingante togænte wënæ wënæ cædānitapa. ¹⁷ Itota tōmënāni ïnānite,

—Botö Mæmpo ñöwoönæ ganca tömengä nänö cædö ayæ cæcä ingampa. Ayæ botö adobaï cæbo imopa, ante apænecantapa.

¹⁸ Mäninö angä ëñëninque tömënäni godömenque pïininque, Mönö tömengä ingante æbänö cæte wænömö wænguingää, ante godömenque nanguï cægadänimpa. Tömënäni, Tömengä guëmanguïönæ iñonte do cæcä ingampa. Ayæ godömenque, Wængongui botö Mæmpo inongäimpa, ante tededinque tömengä, Botö Wængongui bai imopa, ante bai cæcampa töö, ante tömënäni godömenque pïingadänimpa.

Tömengä Wengä ingante Wængongui pönö cæcä ate Awënë bacampa

¹⁹ Itota adodäni inänite iïmaï äninque, “Botö mïnitö imïnite näwangä ämopa. Botö Wængongui Wëmo inömo incæ ædö cæte adoboque nämanque cæbo imoo. Botö Mæmpo æbänö cæcää adinque botö adodonque cæbopa. Edæ botö Mæmpo nänö cædö bai botö Wængongui Wëmo inte adobaï cæbopa. ²⁰ Edæ Mæmpocä Wëmo iñömote tömengä botö imote waadete pönëninque tömengä nänö cædö tömänö ante botö imote odömongä abo imopa. Ayæ mïnitö, Æbänö cæcä wæmöö, ante wæcæmïninpa, ante cædinque tömengä godömenque bamönengæ nänö cædö ante botö imote odömongä ate botö wæætë cæbo acæmïninpa. ²¹ Edæ botö Mæmpo iñömö æmæwo wængäinäni inänite, Ñäni ömæmöninque mïnitö mïimïni quëwencæmïninpa, ante pönö cæcä bai botö tömengä Wëmo iñömö adobaï cæbo imopa. Æcänö ingante, Bitö mïi quëwencæbiimpa, ante äinëmo inte botö tömengä ingante pönö cæbo ate mïingä quëwencæcäimpa. ²² Adobaï botö Mæmpo iñömö woadäni inänite adinque, Æcänö waa cæcantawo, ante, Æcänö wënæ cæcantawo, ante apænte änämaï ingampa. Wæætë edæ botö tömengä

Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömaï cædinque botö Mæmpo, Waodäni botö imo nāni waa abai adobai botö Wengä ingante tömänäni waa acædänimpa, ante cægacäimpa. Botö tömengä Wëmo iñömote nē waa adāmaï ingä iñömö tömengä botö Wæmpocä botö imote da pönongä ingante adobai waa adāmaï ingampa töö,” ante Itota apænecantapa.

²⁴ Ayæ apænedinque, “Minitö iminite näwangä ämopa. Waocä botö änö ëñëninque botö imote nē da pönongaingä ingante nē wede pönengä iñömö tömengä nänö apænte pante wæwenguinö godāmaï incæcäimpa. Wæætë tömengä nänö wænāmaï quëwenguinö gocæcäimpa. Edæ tömengä mönö æmæwo wænguino ñimpo cædinque wænāmaï mönö quëwenguino do gocäimpa. ²⁵ Minitö iminite näwangä ämopa. Waodäni nē quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencædänimpa. Nöwoönæ tömënäni nāni ëñenguionæ do batimpa. Nē ëñënäni iñömö tömënäni nāni wænāmaï quëwenguino gocædänimpa. ²⁶ Wængongui nämä nē quëwënongå inte tömänäni nāni quëwëmämo ante nē godongä ingampa. Mänömaï beyænque botö tömengä Wëmo adobai nämä nē quëwënömo inte tömänäni nāni quëwëmämo ante nē godömo imopa. ²⁷ Ayæ Waobo ëñagaïmo iñömote tömengä pönö cæcä beyænque botö nē ämo badinque nämä täi piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nē apænte anguïmo imopa. ²⁸ Botö mänömainö ante apænebo ëñëninque minitö, Æbänö angä wæmöö, ante änāmaï incæmünimpa. Edæ æmæwo wængainäni tömänäni tömënäni nāni wodido nē öñongainäni iñönänite edæ botö tedepämo incæ tömënäni nāni ëñenguionæ oo pönï impa.

²⁹ Botö tedepämo ëñëninque tömënanï tömänänï ta pon-cædänimpa. Në waa cægäinänï iñömö wänämaï nänï quëwenguinö nänï goquinque ñänï ömämoncædänimpa. Në wënæ wënæ cægäinänï guiquënë nänï apænte pante æmäwo wæwenguinö nänï goquinque ömämoncædän-impä cæminii,” ante Itota apænegacäimpa.

Æcänö äna ëñente cæbii, ante Itota ingante änänipa

³⁰ Ayæ godömenque apænedinque Itota iïmaï apænecantapa. “Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte änö iñömö cöwë nöinö ante impa. Edæ botö tömömo ämaï cædämaï imopa. Wæætë botö Mæmpo botö imote në da pönongaingä nänö ämaï cæbo imopa. ³¹ Botö nämanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³² Botö æbänö cæboo, ante wacä botö beyæ ante në apæneçä ingampa. Tömengä botö imotedö ante nänö apænedö iñömö edæ nö impa, ante ëñëmopa. ³³ Minitö botö imotedö ante, Æbänö cæcää, ante ëñencæte ante Wäö në æpænë guidönongä weca wadäni inänite da godöminitapa. Ayæ Wäö mäninänï inänite botö imotedö ante nö apæneçä ëñënanitapa. ³⁴ Botö æbänö cæboo, ante waodäni botö beyæ apæneçædänimpa, ante botö änämaï imopa. Wæætë, Minitö botö ämo beyænque quëwencæminimpa, ante cædinque botö mänömainö ante apænetabopa. ³⁵ Wäö në æpænë guidönongä tömengä iñömö ti wodönoincade bæco bai ingacäimpa. Ayæ, Tömengä nänö angäinö ñäö bai impa, ante adinque minitö wantæyö iñonte, Waa impa, ante watapæ tominitapa. ³⁶ Botö æbänö cæboo, ante Wäö në æpænë guidönongä nänö angäinö beyæ waodäni

māninō ante do ēwocadāni ingadānimpa. Ayæ botō Mæmpo, Bitō īmaī cæe, ante, Tōmāā iinque cæcæbiimpa, ante botō īmote nānō angainō baī ante do cædōmo īmopa. Botō Mæmpo botō īmote da pōnongaingā ingampa, ante wadāni botō cædinō beyæ do ēñēnānimpa. ³⁷ Ayæ botō Mæmpo botō īmote nē da pōnongaingā īñōmō adobaī, Botō æbānō cæboo, ante apænecā ēñengadānimpa. Mīnitō guiquēnē tōmengā ingante adāmaī īmīni inte tōmengā nānō tedepāmo incæ cōwē ēñēnāmaī īmīnīpa tōō. ³⁸ Ayæ botō Mæmpo botō īmote da pōnongā pōnīmo īmopa, ante mīnitō pōnēnāmaī īmīni inte edæ tōmengā nānō angainō ante entawēnāmaī quēwēmīni īmīnīpa. ³⁹ Wængonguī angā ēñēnīnque nāni yewæmongainta ædæmō adōmīni inte edæ mīnitō, Māninō nāni yewæmongainta amōni beyænque mōnitō wænāmaī mōni quēwenguīnō gocæmōnīmpa, ante pōnēmīni īmīnīpa. Īñæmpa mānīntaa yewæmōnīnque botō īmotedō ante apænedīnque yewæmongadāni apa quēwēmīnīi. ⁴⁰ Botō, Mīnitō wænāmaī mīni quēwenguīnō ante pō æedāni, āñōmote mīnitō wæætē Baa ānīnque botō weca pōnāmaī īmīnīpa,” ante Itota apænecantapa.

⁴¹ Ayæ apænedīnque tōmengā, “Waadāni botō īmote waa adīnque apænecædānimpa, ante ānāmaī īmopa, angantapa. ⁴² Īñæmpa, Mīnitō æbānō cæmīnīi, ante botō do ēñēmopa. Wængonguī nānō waadete pōnente entawēnō mīnitō entawēnāmaī quēwēmīnīpa, ante do ēñēmopa. ⁴³ Wængonguī angā ēñēnīnque botō wææ pōnīmo adīnque mīnitō Baa ante botō īmote pōnēnāmaī īmīnīpa. Wacā guiquēnē nāmā ānīnque pongā īnīnque mīnitō māningā ingante Ao ante pōnēmaīmīnīpa, ante awædō. ⁴⁴ Mīnitō wacā ingā wacā ingā, Botō īmote waa adīnque waa apænecædānimpa, ante cæmīnī awædō. Incæte mīnitō, Mōnō Wængonguī nē ado-

canque ingaingä ingampa, ante, Tömengä mönō imonte waa adinque apænecæcäimpa, ante cædämaï iminipa. Mänōmaï beyæ mīnitō botō imote ædō cæte pönēmīni imīnii. ⁴⁵ Botō Mæmpo weca ongōninque mīnitō imīnit-edō ante botō, İināni wënæ wënæ cædāni inānitapa, ante ancæboimpa, ante mīnitō pönēmīnitawo. Mänō-mainō ante edæ pönēnāmaï iedāni. Wæætē Möitee wodi nānō angainō ēñente beyænque mönō quëwengæimpa, ante pönēmīnipa. İñæmpa adocä Möitee wodi mīni nē pönēnongä inōmō, Nē wënæ wënæ cæmīni iminipa, ante ancæcäimpa cæmīnii. ⁴⁶ Mīnitō Möitee wodi ingante pönente baï adobaï botō imote pönencædōmīn-impā. Edæ tömengä botō imotedō ante yewæmon-gacäimpa. ⁴⁷ Möitee wodi nānō yewæmongainō ante pönēnāmaï imīni ininque mīnitō ædō cæte botō apænedō ante ēñēninque pönenguimīnii,” ante Itota māniñedē iinque apænecæcäimpa.

6

5.000 ganca ināni inānite Itota godongä cænānipa

¹ Mānīnō iinque apænete ate wantæyō iñonte Itota wadæ godinque gāwapæ Gadideapæ nāni āmæ æmæmāa tao gogacäimpa. Mānimæ Tibediapæ nāni āmæ impa. ² Tömengä wogaa tao gocä adinque waodāni tæiyænāni pō tee empo godānitapa. Tömengä, Acædānimpā, ante cæd-inque wënæ wënæ ināni inānite bamōnengæ cæte odō-mongä do adināni inte godānitapa. ³ Ayæ Itota tömengä nānō emiñænāni inānite ānanquidi ænte mæicä æidinque tömēnāni tömengä tönō tæe contadānitapa. ⁴ Wodo pænta gogaiönæ, ante oodeoidi Patowa nāni ææmæ cæönæ oo pōni ingatimpā. ⁵ Itota gomō ayongä waodāni tæiyænāni tömengä weca pönāni adinque tömengä Pedipe ingante,

—Mäninäni waodäni beyä ædönö gote päö godonte æninque godömöni cænguïnänii, angantapa.

⁶ Edæ Itota iñömö, Æbänö cæbaïmoo, ante do ëñëningä inte mäninö ante, Pedipe æbänö cæquingää, ante acæte ante angantapa. ⁷ Pedipe wæætë tömengä ingante,

—Iñæmpa päö ante tömänäni wædænque cæncædän-
impa, ante ocho apäicä cæte beyä paga æinta æninque
mänimpota godonte æninque edæ wiï eyepæ ïmaïmpa,
angantapa. ⁸ Ayæ tömengä ëmiñængä Timönö Pegodo
biwi Æntade iñömö Itota ingante,

⁹ —Mönitö weca në ongongä edëningä iñömö tebada
näni awënënimö guiyä päö önompo æmæmpoque tönö
guiyä gæyæ mäa pönï næængä ingampa. Incæte mänii
cænguï tæiyænäni beyä ædö cæte eyepæ i, ante wæbopa.

¹⁰ Angä ëñëninque Itota,

—Minitö tæiyænäni godongämæ ongönäni inänite
ämïni tæ contaedäni, angantapa. Tömengä nänö
ämaï änäni ëñëninque waodäni önömæcaque inö nanguï
gaguïmä pæyömö do tæ contadänitapa. Onguïñænäni
incæ önompo æmæmpoque müido ganca inäni inte tæ
contadäni ingadänimpa. ¹¹ Itota päö æninque, Wæn-
gonguï, Bitö waa pönï pönömi ænte cænguïmöni, ante
apænedinque tömengä nänö ëmiñænäni inänite godongä
æninque tömënäni wæætë tæ contadäni inänite di
mäñænäni cænänitapa. Ayæ tömengä gæyæ æninque
adobaï cæcantapa. Tömänäni iñömö näni cæinënö ante
eyepæ cængadänimpa.

¹² Tömënäni tömo pönï cænäni ate tömengä
ëmiñænäni inänite tömengä,

—Cænguï näni ao mäe ao mäe ñönönï ee öñoncoo wote
badämaï ingæïmpa, ante pædæ wææmpo ö æedäni.

¹³ Angä ëñente cædinque në cænäni päö önompo
æmæmpoque tebada näni awënënimö näni ao mäe ao
mäe ñönönï ee öñoncoo ö ænte da wënäni ate edæ otodë

tipæmpoga go mentodëa cængui eyede da wënäni contagatimpa. ¹⁴ Waodäni iñömö Itota bamönengæ nänö cædi adinque,

—Nawangä iingä iñömö Wængongui beyæ nè apæ necä ingampa. Tömengä inguipoga Ponguingä, ante nani angaingä inongäimpa, ante tæcæ änänitapa.

¹⁵ Tömënäni, Bitö mönitö Awënë Odeye bacæbiimpa, ante botö imote bæi ongoncæte ante poncæ cædänipa, ante wædinque Itota wadæ godinque adocanque änanquidi wæætë æigacäimpa.

Itota æpæ yædopæ dao dao gocä

(Mäateo 14.22-27; Mäadoco 6.45-52)

¹⁶ Gäwadecæ pönï bayö tömengä emiñænäni iñömö gäwapæ yæwedeca wæi gogadänimpa. ¹⁷ Itota angä ëñëninque mäniñömö wæi wipodë guidinque tömënäni, Gäwapæ æmæmäa Capënaömö nani quëwëñömö mönö taocäimpa, ante tæcæ wogaa tao goyönäni dobæ wëmö bayö Itota ayæ tömënäni weca pönämaï inongäimpa. ¹⁸ Ayæ woboyæ nanguï pæmænte pönö æpæ mäë conta mäë conta cæyonte, ¹⁹ tömënäni wodo tinco quidömetodo wiyate cæyönäni Itota iñömö wipo gämænö pöninque æpæ yædopæ wænömænæcapæ dao dao pongä adinque ancai guiñënanitapa. ²⁰ Ancai guiñëñönänite Itota iñömö tömënäni inänite,

—Botö imopa. Guiñënämaï iedäni, angantapa.

²¹ Ante äñongä tömënäni Ao ante tömengä ingante wipodë æninque tömënäni nani goinëñömö emönaiya do tao gogadänimpa.

Waodäni Itota ante diqui diqui minte pönäni

²² Iimö ate tæiyænäni gäwapæ imæ wedeca a ongönönänimpa. Ininque tömënäni, Wipo adoque pönï mäniñömö wäi wocæ incæte Itota iñömö mänimpodë guidämaï iñongante tömengä miñæ godäni adodänique

guii wadæ tao godänitapa, ante adinque wädänitapa. ²³ Awënë Itota do Wængongui ingante, Bitö waa pönï pönömi cænguimöni, ante apænecä ate waodäni näni päö cæniñömö pancadäniya ayæ ongönänimpa. Ñöwo iñömö wapocoo Tibedia näni quëwëñömö wo cæwodinque mäniñömö tömënäni näni cæniñömö eyequei pönäni adänitapa. ²⁴ Ìninqe Itota tönö tömengä nänö ëmiñänäni edæ dæ änäni wædinque tæiyänäni iñömö wipodë guiite Capënaömö godinque Itota ante diqui diqui mincæte ante wogaa gogadänimpa.

Itota, Mönö quëwenguinque, ante cænguï bai ingampa

²⁵ Adodäni gäwapæ æmæmäa tao godinque tömengä ingä adinque,

—Awënë në Odömömi ïmi æyedënö iñömö pömitawo, änänitapa.

²⁶ Äñönäni Itota wæætë,

—Minitö ïminite näwangä ämopa. Minitö tömo pönï päö cænimini inte botö imote ante diqui diqui mincæ pöminitapa töö. Wæætë edæ botö, Acæminimpa, ante bamönengæ cæbo beyæ minitö wii pömini awädö.

²⁷ Minitö, Mönö cænguï, ante æncæte ante cæmini incæte inguipogaque mini woquïnonque ante æncæ cädämaï quëwëedäni. Wæætë edæ, Mönö cænguï iinque bayedë cænguï mä öñongäëimpa, ante cædinque minitö, Mönö wænämaï quëwenguinque gocæmöimpa, ante pönente quëwëedäni. Botö në Waobo ëñagaïmo ïmo mäniï cænguï minitö ïminite pönömo æncæminimpa. Botö Mæmpo botö imotedö ante, Ìngä nö cæcä ingampa, ante odömon-gacäimpa.

²⁸ Angä ëñëninque tömënäni tömengä ingante,

—Mönitö, Wængongui nänö cæquimämo ante cæcæte ante quinö cæquëñëmöni ïmönii, ante wæmönipa.

²⁹ Äñönäni Itota wæætë,

—Botö Wængongui nänö nē da pönongaimo iñömote mīnitö botö imote mīni wede pönēnō iñömō edæ mäninō Wængongui nänö cædō impa, angantapa.

³⁰ Mänōmaï beyæ tōmēnāni godōmenque tōmengä ingante,

—Bitö, Ēñencædānimpa, ante bamōnengæ bitö cædō ante æbänō cæte odömōmi adinque pönēmaimōnipa. Æbänō cæquīmii, ante ānewēnānitapa. ³¹ Mönö wæmæidi önömæca nāni quēwēñedē cængui mänāā nāni angai cængadānimpa. Īimainō ante yewæmongatimpa. “Tōmengä, Mīnitö cængui, ante tōmēnāni inānite öönædē inō mäwææ godongacäimpa,” ante nāni yewæmongainō bai impa, ante apænedānitapa.

³² Itota wæætē tōmēnāni inānite,

—Nāwangä āmopa. Mīnitö imīnite öönædē mäwææ cængui nē pönongaingä iñömō tōmengä wīi Mōitee wodi ingacäimpa. Wæætē botö Mæmpo iñömō tōmengä mīnitö imīnite öönædē nāni nāwä cængui bai pönongä cæncæminimpa. ³³ Öönædē quēwente wææ pongaingä iñömō tōmengä iñömō, Cængui bai ingampa, ante Wængongui nänö nē angaingä ingampa. Adocä inguipoga quēwēnāni inānite, Mīni wantæpiyæ wænāmaï quēwenguinō ante pönongä æninque quēwēnānipa.

³⁴ Ante Itota apænecä ēñēninque tōmēnāni,

—Awēnē, ñowo māni cængui ĩimō iñō ĩimō iñō pönōmi cæmōnie.

³⁵ Āñönāni Itota godōmenque apænedinque,

—Botö iñömō, Mīni quēwenguinque, ante mīni cængui bai inōmo imopa. Botö weca nē pongä iñömō cōwē cængui gue ænēnāmaï bai quēwencæcäimpa. Ayæ botö imote nē wede pönengä iñömō cōwē tepæ gæwænāmaï bai quēwenguingä ingampa, ante apænecantapa. ³⁶ Ayæ wæætē, Mīnitö imīnite do botö änō bai impa. Botö imote do adimīni incæte mīnitö ayæ wede pönēnāmaï iminipa.

³⁷ Botö Mæmpo, Bitö quinäni bacædänimpa, ante cæd-
 inque botö imote pönongä æmo ininque botö quinäni nē
 badäni inte tömēnāni tömänāni iñömö botö weca edæ do
 pönānipa. Ayæ æcāmenque botö weca pōna inate, Botö
 weca pōnāmaī imipa, ante cōwē ānāmaī incæboimpa.
³⁸ Edæ öönædē quēwēninque botö wīi tömēmo āmaī
 cæcæboimpa, ante wææ pontabopa. Wæætē botö imote
 nē da pönongaingä nānō āmaī cæcæboimpa, ante wææ
 pontabopa. ³⁹ Ayæ botö imote nē da pönongaingä
 botö imo nānō angainō iñömö iīmaī impa. Waodāni
 bitö quinäni bacædänimpa, ante pönōmo æninque bitö
 quinäni badinque adocanque incæ wē womonte wænā-
 maī incæcāimpa. Wæætē iinque baquiōnæ iñonte bitö,
 Ñāni ömæmöedāni, āmi ēñēninque bitö quinäni tömänāni
 edæ ñāni ömæmoncædänimpa. ⁴⁰ Edæ botö Mæmpo
 nānō angainō iñömö iīmaī impa. Botö Wængonguī
 Wēmo iñömote botö imote ædæmö adināni inte edæ
 botö imote nē pönēnāni tömänāni cōwē wænāmaī wan-
 tæpiyæ quēwencædänimpa. Mänōmainō ante impa. Ayæ
 iinque baquiōnæ iñonte botö mänināni inānite, Minitö
 ñāni ömæmöedāni, āmo ate ömæmoncædänimpa. Itota
 mänōmaī apænençantapa.

⁴¹ Apænençä ēñēninque oodeoidi iñömö, Tömengä,
 “Botö cænguī bai imopa, ante öönædē inō wææ
 pontabopa,” angampa, ante tömengä ingantedö ante
 tæcæ piinte tedewēnānitapa. ⁴² Tömēnāni,

—İngä iñömö wīi Ootee wengä Itota ingantawo. Tö-
 mengä mæmpo tönō wäänä wīi mönō adōna inatawo.
 Tömengä ædö cæte, Botö öönædē quēwente wææ
 pontabopa, angä ānewē.

⁴³ Ante pīiñōnāni Itota wæætē,

—Minitö nāmanque godongämæ piinte tededāmaī
 iedāni. ⁴⁴ Botö Mæmpo botö imote nē da pönon-

gainingä wii pönö cæcä bai æcämenque incæ botö weca pönämaï incædongäimpa. Ayæ iinque baquiönæ iñonte botö weca nē pongä ingante, Ñäni ömæmöe, ämo ñäni ömæmoncæcäimpa. ⁴⁵ Wængonguï beyæ nē apænegainäni nāni yewæmongaintaa iïmaï ante yewæmongadänimpa. “Wængonguï waodäni tömänäni inänite odömonte apænecä eñencædänimpa.” Botö Mæmpo apænecä nē eñenäni iñömö tömengä nänö odömonte apænedö ante nē eñenäni inönäni ininque tömënäni tömänäni botö weca pönänipa, ante Itota apænecantapa.

⁴⁶ Ayæ apænedinque, “Mïni waocabo tömämini incæ botö Mæmpo ingante cöwë adämaï iminitapa. Botonque iñömö Wængonguï weca nē quëwente pömo inte botö Mæmpo ingante nē adïmo iñömö adoboque pönï imopa. ⁴⁷ Minitö iminite näwangä ämopa. Botö imote nē wede pönengä iñömö tömengä cöwë wantæpiyæ nänö quëwenguimämo do entawente quëwengä ingampa. ⁴⁸ Botö iñömö, Mïni quëwenguinque, ante mïni cænguï bai imopa. ⁴⁹ Mïni wæmæidi önomæca quëwëñedë cænguï mänää nāni angai cængainäni incæte edæ do wængadänimpa. ⁵⁰ Botö iñömö cænguï bai inömo inte öönædë quëwente wææ pömo imopa. Ininque waocä, Cænguï cænte bai quëwengäimpa, ante botö imote pönengä ininque tömengä cöwë wænämaï quëwëmaingampa. ⁵¹ Botö cænguï bai imo inte öönædë quëwengaimo incæ wææ pontabopa. Æcänö cænguï cænte bai botö imote pönëna tömengä iñömö cöwë wænämaï quëwencæcäimpa. Iï cænguï botö godonguï botö nämä baö impa. Inguipoga quëwënäni inänite, Minitö quëwenguimïni, ante botö nämä baö incæ godoncæboimpa,” ante Itota mänömaï apænecantapa.

⁵² Mäninö angä eñente wædinque oodeoidi nāni cabo iñömö godongämæ nämanque tededinque wæætë godö

wæætē godō ānewēnānitapa.

—Māningā iñōmō mōnō imō tōmengā nāmā baō ædō cæte pōnongā cænguimōnii.

⁵³ Ante tedewēñōnāni Itota wæætē tōmēnāni inānite,

—Mīnitō imīnite nāwangā āmopa. Botō Waobo ēña-gaīmo iñōmote mīnitō botō baō cænāmaī inte botō wepæ bedāmaī imīni ininque ædō cæte Wængonguī wantæpiyæ nānō quēwenguīmāmo entawēmīni inguimīnii. ⁵⁴ Botō baō nē cængā ayæ botō wepæ nē becā tōmengā iñōmō Wængonguī wantæpiyæ nānō cōwē quēwenguīmāmo do entawente quēwengā ingampa. Ayæ iinque baquīōnæ iñonte botō māningā ingante, Bitō ñāni ōmæmōe, āmo ñāni ōmæmoncæcāimpa. ⁵⁵ Edæ botō baō nāwā cænguī bai impa. Ayæ botō wepæ nāwā bequī bai impa. ⁵⁶ Botō baō nē cængā inte ayæ botō wepæ nē becā iñōmō tōmengā botō nempo ee quēwēnongā ingampa. Ayæ adobaī tōmengā botō imote entawēnongā ingampa. ⁵⁷ Botō Mæmpo nē Quēwēnongā inte botō imote da pōnongā pōnīmo imopa. Tōmengā pōnō cæcā ate quēwēmō imopa. Botō imote nē cængā iñōmō adobaī botō cæbo beyænque quēwencæcāimpa. ⁵⁸ Botō cænguī bai imo inte ōönædē wææ pōnīmo iñōmō mānīi cænguī bai imopa. Mōnō wæmæīdi cænguī mānāā nāni angai cængaināni incæ edæ do wængadānīmpa. Wæætē ñōwo wææ pōmo iñōmote, Cænguī impa, ante nē cænongā iñōmō tōmengā cōwē wænāmaī quēwencæcāimpa, ante Itota apænecācāimpa.

⁵⁹ Tōmengā mānīnō ante Capēnaōmō nāni quēwēñōmō nāni odōmōincōnē ongōnīnque tōmēnāni inānite odōmonte apænecācāimpa.

Itota nānō ānō beyænque mōnō wænāmaī quēwengæīmpa

⁶⁰ Mānīnō odōmonte apænecā ēñēnīnque tōmengā ēmīñænāni nanguī ināni,

—Tömengä nänö odömonte apænedinö iñömö waad-
edämainö impa. Edæ æcänö ëñëmainaa, ante änänitapa.

⁶¹ Mäninö nänö odömonte apænedinö ante tæcæ piinte
tedewënäni wædinque Itota tömënäni inänite,

—Minitö botö äninö ante oda cæminii inte pïimïni
imïnitawo, angantapa. ⁶² Ayæ godömenque apæned-
inque, Botö Waobo ëñagaïmo ïmo öönædë quëwente
wææ pongaïmo inte adodö adoyömö æibo adinque
mïnitö æbänö ante ämaïminii. ⁶³ Wængongui Önöwoca
pönö cæcä beyænque waocä quëwengä ïnïnque tömengä
baonque nänö ëñayö beyænque ædö cæte quëwëmaingää.
Botö Wængongui Önöwoca tönö apænedinque mïnitö
imïnite botö apænedinö beyæ mïnitö önöwoca ëwocate
quëwencæminimpa. ⁶⁴ Incæte mïnitö weca pancadäniya
iñömö botö ïmo pönënämaï inänipa töö, ante Itota
apænecantapa.

Edæ tömënäni weca æcänö tömengä ingante pönënä-
maï ingää, ante Itota do ëñënongäimpa. Ayæ tömengä
ingante në godö odömonguingä æcänö ïmaingää, ante
tömengä adobaï do ëñënongäimpa. ⁶⁵ Itota godömenque
apænedinque,

—Botö mäniï beyæ mïnitö imïnite do antabopa. Botö
Mæmpo wïi pönö cæcä bai æcämenque incæ botö weca
pönämaï incædongäimpa, ante apænegacäimpa.

⁶⁶ Mänïönæ ganca tömengä mïñæ në godäni incæ
nanguï inäni wadæ godinque tömengä mïñæ ayæ tee
empo godämaï ingadänimpa. ⁶⁷ Tömënäni wadæ godäni
adinque Itota önompo tipæmpoga go mëa ganca inäni
inänite,

—Minitö diyæ æbänö cæquïminii. Minitö tömënäni
bai adobaï botö imote ëmö cæte, Wadæ goinëmönipa,
ämïnitawo.

⁶⁸ Äñongä Timönö Pegodo wæætë,

—Awënë, æcänö miñæ gobai mönii. Wacä mönitö imönite në emiñængä inömö edæ dæ angampa. Wantæpiyæ wänämaï möni quëwenguinö ante æbänö gocæmönimpa, ante wæyömöni bitö inömö në apænebi imipa. ⁶⁹ Bitö inömö Wængongui nänö da pönönömi inte tömengä nänö Tæiyæ Waëmö inömi imipa, ante pönömöni inte eñëmönipa.

⁷⁰ Ante apænecä eñëninque Itota,

—Minitö önompo tipæmpoga go mëa ganca imini inte wii botö apænte ænömöni iminitawo. Incæte mïni cabo incæ adocanque inömö wënæ qui ingampa, ante apænegacäimpa.

⁷¹ Timönö Icadote wengä Codaa ingantedö ante Itota mänömaï angacäimpa. Tömengä önompo tipæmpoga go mënaa nani cabo adocanque inongä incæte ayæ ate Itota ingante odömonte në godonguingä inongäimpa.

7

Itota biwiidi tömengä ingante pönänämaï inäni

¹ Ayæ ate Itota Gadideabæ tömämæ wayömö wayömö gocä ingacäimpa. Oodeabæ inömö oodeoidi awënëidi botö imote wænoncæ cädänipa, ante wædinque Itota, Oodeabæ wii goinëmopa, ante mänïömæ godämaï inongäimpa. ² Oodeoidi, Mönö wæmæidi oncontaicoo mäenöninque quëwengadänimpa, ante pönëninque tömënäni æämæ oo pönï ingatimpa. ³ Itota biwiidi tömengä ingante,

—Bitö emiñänäni bitö bamönengæ cæbi acädänimpa, ante cæcæte ante bitö inömö ongönämaï inte wæetë Oodeabæ goquënemi imipa. ⁴ Waodäni tömänäni ayönäni cæbo edonque acädänimpa, ante cæinengä inömö tömengä wii awëmö cæcampa. Bitö mänii cædinö do cæbi inte waodäni tömänäni bitö imite edonque pönï acädänimpa, ante odömonte cæe, ämönipa.

⁵ Edæ tömengä biwiidi incæ tömengä ingante pönenä-mai inäni inönänimpa. ⁶ Mänömai beyæ Itota tömənäni inänite,

—Botö wii ñöwo goquënëmo imopa. Minitö guiquënë æyedemë gomini incæ cöwë waa impa. ⁷ Inguipogaque quëwənäni minitö iminite ædö cæte pünte badänii. Wæætë botö tömənäni inänite, Minitö wənæ wənæ cæmini iminipa, ante apænebo beyæ tömənäni botö imo pünänipa. ⁸ Minitö æämæ cädäni weca æite goedäni. Botö goquiönæ wii eyepæ impa, ante pönëninque botö ayæ mänimæ cädäni weca godämai imopa.

⁹ Mäninö äninque tömengä godömenque Gadideabæ ongonte quëwengacäimpa.

Itota nani æämæ cæyömö gote pongacäimpa

¹⁰ Incæte tömengä biwiidi æämæ ante godäni ate tömengä adobai godinque wii waodäni nani ayömö go-campa. Wæætë awëmö gocantapa. ¹¹ Ayæ nani æämæ cæyömö oodeoidi awënëidi inömö,

—Mäningä onguinængä æyömönö ingää, ante tömengä ingante ante diqui diqui minte wææ wänönänitapa.

¹² Tæiyænäni ponte a ongönäni godongämæ nämä tededinque tömengä ingantedö ante wæntæ wæntæ ted-edänitapa. Pancadäniya, “Tömengä waa cæcä ingampa.” Äñönäni wadäni inömö, “Baa, mäningä waodäni inänite wapiticæ mäodinque, Oda cæquinänimpa, ante cæcä ingampa,” ante apænedönänimpa.

¹³ Oodeoidi awënëidi inäni adinque guiñente wæd-inque wadäni tömänäni tömengä ingantedö ante waodäni ëñëñönäni apænedämai inönänimpa.

¹⁴ Tömənäni æämæ do cæyedë Itota inömö Wængongui oncö ñænæncönë yabæcönë æite pö guidinque waodäni inänite mä odömonte apæncä ëñengadänimpa.

¹⁵ Tömengä odömönte apäñecä ëñëñinque oodeoidi ancai guññëñinque,

—Æbänö cæte nanguï ëñengä ingää. Edæ tömengä ecoeda adämaï ïnongä ingampa.

¹⁶ Äñönäni Itota wæætë,

—Botö odömönte apäñedö ante wïi nämä pönëñinque odömönte apäñebo ïmopa. Wæætë Wængonguï botö ïmote në da pönongaingä nänö angainö ante odömönte apäñebopa. ¹⁷ Minitö, Wængonguï nänö angainö ante Itota odömönte apäñecampa, ante pönëminítawo. Wæætë, Nämä pönëñinque Itota odömönte apäñecampa, ante pönëminítawo. Ìñæmpa waocä, Wængonguï nänö ämaï cæcæboimpa, ante æcänö änaa tömengä ïñömö, Æcänö angä ëñëñinque Itota odömönte apäñecää, ante do ëñencæcäimpa. ¹⁸ Në nämä pönëñinque apäñecä ïñömö tömengä nämä ante, Botö ïmo waa acædänimpa, ante aïñente apäñecä ingampa. Wæætë edæ, Botö ïmo në da pönongainganque ingante waa acædänimpa, ante në aïñente cæcä ïñömö tömengä edæ në nö cæte quëwëñongä ingampa. Adocä, Waodäni oda cæquïnänimpa, ante tömëñäni ïñänite wïi wapiticä mäocä ingampa, ante Itota apäñecantapa. ¹⁹ Ayæ apäñedinque, “Wængonguï nänö wææ angainö ante Möi-tee wodi wïi minítö beyæ ante yewæmongacäi. Incæte minítö tömämïni Wængonguï nänö wææ angainö adinque ëñente cædämaï ïminipa töö. Minitö quïnante botö ïmote, Wänöinëmönimpa, ante pönëñinque cæminii.”

²⁰ Ante awëñëidi ïñänite äñongante nanguï ïñäni adoyömö ongönäni wæætë,

—Bitö wëñæ tönö cæbi ïmipææ, ante tömengä ingante äñinque, Bitö ïmite æcänö wänöinente cæcää.

²¹ Ante äñäni ëñëñinque Itota godömenque tömëñäni ïñänite,

—Guëmanguiönæ iñonte botö adopoque bamönengä cæbo adinque mīnitō tōmāmīni ancai guīñente wæminipa edæ. ²² Mōitee wodi iñōmō, Mīnitō wēñængä ēñacā ate ōnōmpo æmæmpo que go mēōnaa go adoönæque iñonte māniönæ tōmengä yabæque eö togæncæmīnīmpa, ante mīnitō imīnite odōmonte apænægacāīmpa. Wīi Mōitee wodi mänōmaī mā cæcā ingacāīmpa. Wæætē wēēñēñedē incæ mīnitō wæmæidi do adodō cægadānīmpa. Incæte Mōitee wodi, Māniönæ iñonte eö togæncæmīnīmpa, ante pōnō angä beyænque mīnitō guëmanguiönæ ī incæte mīnitō wēñængä onguīñængä ingante eö togæmīni imīnīpa tōö. ²³ Mōitee wodi nānō wææ yewæmongāinō wido cædāmaī ingæīmpa, ante cædinque mīnitō guëmanguiönæ iñonte edæ wēñængä onguīñængä ingante do eö togæmīnīpa. Incæte edæ guëmanguiönæ iñonte botō wēnæ wēnæ īningä ingante āmo ate tōmengä baö tōmāñō waa bacā beyænque quīnante botō imote pīimīni imīnīi. ²⁴ Waocā wabānō nānō cædi wēnæ wēnæ ī, ante pōnēnīnque ædæmō ēñēnāmaī imīni inte mīnitō tōmengä ingä, Bitō wēnæ wēnæ cæbi imīpa, ante apænte ānāmaī iedāni. Wæætē, Æbānō ī, ante ædæmō ēñēnīnque nōingä ante ancæmīnīmpa, ante Itota mänōmaī apænægacāīmpa.

Itota iñōmō Codito mōnō nē Ponguingä ingampa

²⁵ Mänōmaī beyæ Eedotadēē quēwēnāni pancadāniya, —Māningä ingante wænōmōni wæncæcāīmpa, ante awēñēidi wīi ānānitawo, ante māniñedē tæcæ tedewēnānitapa. ²⁶ Aedāni, tōmengä iñōmō edonque pōni a ongōnīnque waodāni inānite apæneyongä incæ mōnō awēñēidi tōmengä ingante ānāmaī pæ wēēnete inānīpa tōö. Tōmēnāni wabānō, Māningä iñōmō nāwangä Codito mōnō ānongä ingampa, ante pōnēnānitawo. ²⁷ Iñæmpa, Māningä onguīñængä æyōmōnō quēwente pongä ingää, ante do ēñēmōpa. Mōnō Codito, Nē Ponguingä, ante nāni

angaingä iñömö æyömönö quëwente pongää, ante mönö waocabo tömämö incæ ëñënämaï inguimö imompa, änänitapa.

²⁸ Ayæ Itota Wængongui oncö ñænæncönë yabæcönë odömonte apænedinque aa pecantapa.

—Ao, Botö æbodö imoo, ante minitö ëñëminiyaa. Ayæ botö, Æyömönö quëwente pömoo, ante minitö adobaï ëñëminiyaa. Botö wii nämä pönëninque pontabopa. Botö imote në da pönongaingä näwangä inongä ingampa. Minitö, Tömengä æbänö ingää, ante ëñënämaï iminipa töö. ²⁹ Botö wæætë edæ tömengä weca quëwëmo iñömote tömengä botö imote da pönongä pönimo inte edæ botö iñömö edæ tömengä ingante do agaimo inömo imopa, angacäimpa.

³⁰ Mäninö angä ëñëninque tömënanï, Quinö cæte tömengä ingante bæi ongonguimönimpa, ante pönengadänimpa. Incæte tömengä nänö wænguiönæ wii eyepæ i beyæ tömengä ingante ö ænämaï ingadänimpa. ³¹ Tæiyænäni adoyömö pö ongönäni weca ongöninque nanguï inäni tömengä ingante wede pönënanitapa. Tömënanï,

—Mäningä onguiñængä iñömö nanguï bamönengæ cæcä inongäimpa. Mönö Codito iñömö tömengä pongä ate godömenque bamönengæ cæquiringä ingantawogaa.

Itota ingante bæi ongoncæte ante cædäni

³² Tæiyænäni mäninö mö ongönäni iñömö Itota ingantedö ante mänömainö ante wæntæ wæntæ tedeyönäni Paditeoidi ëñënanitapa. Ayæ, Wængongui qui, ante në godönäni ñænænäni tönö Paditeoidi iñömö Wængongui oncö ñænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pöedäni, änänitapa. ³³ Itota godömenque apænedinque,

—Minitö weca wantæyö quëwëninque botö ayæ ate botö imote në da pönongaingä weca ocæ ëmænte gocæboimpa. ³⁴ Botö ocæ ëmænte gobo ate mīnitö botö imote ante diqui diqui mīmīni incæte adāmaī inguīmīni imīnīpa. Ayæ botö go quëwëñömö mīnitö adoyömö ædö cæte ponguīmīni imīnīi.

³⁵ Angä ëñëninque oodeoidi awënëidi nämanque ted-edänitapa.

—Mäningä, Gocæboimpa, ante ædönö goyongante mōnitö diqui diqui mīninque adāmaī inguīmōni imōnīi. Tōmengä, Edæ mōnö guidënäni do panguīmæ godinque guidiegoidi weca wayömö wayömö nāni quëwëñömö tōmengä wabänö goquingää. Ayæ guidiegoidi mänīñömö quëwënäni inänite odōmonte apænebo ëñencädänimpa, ante apænequingää. ³⁶ Tōmengä iñæmpa, “Botö imote ante diqui diqui mīmīni incæte mīnitö botö imote adāmaī inguīmīni imīnīpa, angampa tōö. Ayæ, Botö go quëwëñömö mīnitö adoyömö dicæ ponguīmīniyaa,” ante mänīnö ante æbänö ante apænecantawo, angadänimpa.

Waëmö æpæ tayömö ta gopæ mōnö quëwenguīmæ impa

³⁷ Ayæ tōmënäni nāni ææmæ iinque cæönæ iñonte, Ñænæ ææmæ impa, ante godōmenque nanguī cæyönäni Itota iñömö ængæ gantidinque yedæ yedæ tedecantapa.

—Në gæwænte wæcä iñömö tōmengä botö weca pon-cæcäimpa. Ayæ botö tönö godongāmæ becæcäimpa. ³⁸ Æcäménque botö imote në wede pönengä iñömö tōmengä quëwenguīmæ ænte entawencæcäimpa. Ayæ waëmö æpæ tayömö ta gote cægömæ bai tōmengä adobai tōmengä nänö entawënö godonte bai cædinque, Wadäni bete bai quëwencädänimpa, ante godö cæcæcäimpa. Wængonguī angä ëñente nāni yewæmongainö bai ante mänōmainö ante impa.

³⁹ Mänömainö ante Itota iñömö, Botö imote nē wede pönēnāni inte ayæ ate Wængonguī Ōnōwoca ingante ænte entawenguināni inānīpa, ante pönēnīnque māningā Wængonguī Ōnōwoca ingantedö ante apænegacāimpa. Edæ Itota ayæ wænāmaī inte öönæde ocæ emænte æidāmaī nānō iñedē Wængonguī iñömö Tæiyæ Waëmö Ōnōwoca ingante ayæ da pönönāmaī inongāimpa.

Waodāni wæætē godö wæætē godö nāni ānewēnō

⁴⁰ Māninö nānō änö ēñēnīnque waodāni pancadāniya, —Nāwangā impa. Māningā iñömö, Wængonguī beyæ nē apæneca nē Ponguingā, ante nāni angaingā adocā inongā ingampa.

⁴¹ Ante āñönāni wadāni guiquēnē, —Mönö Codito nē Ponguingā, ante nāni angaingā māningā ingampa.

Änāni ēñēnīnque wæætē wadāni, —Mönö Codito ædö cæte Gadideabæ quēwente pongā ingāā, änānitapa. ⁴² Iñæmpa mönö Codito iñömö Awēnē Dabii pæingā inguingāimpa. Ayæ Bedēē Dabii nānō quēwengaiñömö adoyömö ēñaquingā ingampa, ante Wængonguī angā ēñente nāni yewæmongainö ongö adāmaī imīnitawo.

⁴³ Angā ēñēnīnque waodāni, Itota æcānō ingāā, ante mänōmaī wadö wadö ante pönente tedewengadānimpa.

⁴⁴ Pancadāniya, Tömengā ingante bæi ongöinēmönīpa, änāni incæte tömengā ingante bæi ongonte ænāmaī ingadānimpa.

Awēnēidi Itota ingante pönēnāmaī inönāni

⁴⁵ Wængonguī oncö tæiyæ waëmö oncönē wææ wänönāni iñömö, Wængonguī quī, ante nē godönāni ñænænāni tönö Paditeoidi weca ocæ emænte pönānīpa. Ocæ emænte pönāni adīnque tömēnāni,

—Quinante tömengā ingante ænte pönāmaī imīnīi.

⁴⁶ Ante añönäni wææ wänönäni wæætë,
—Mäningä onguiñængä waa apæ necä bai æcänö adobai
tedecä iñömö edæ dæ angampa.

⁴⁷ Änäni eñëninque Paditeoidi guiquënë,
—Tömengä minitö iminite adobai wapiticæ mäocä
oda cæte gobaimini baminitawo. ⁴⁸ Äninque tömënäni
godömenque, Awënëidi incæ Paditeoidi incæ adocanque
tömengä ingante pönengä ingantawogaa. ⁴⁹ Nangui
inäni iñömö ongönäni guiquënë tömënäni në önönäni
inte Wængongui nänö wææ angainö ante eñënamai
inäni inte tömengä ingante pönënäni inänipa. Mänö-
mai beyæ tömënäni Wængongui nänö pangaimämo ante
wæquinäni inänipa.

⁵⁰ Niicodemö iñömö wëenëñedë Itota weca në godingä
adobai tömënäni bai Paditeocä inongä inte apænecan-
tapa.

⁵¹ —Waocä, Æbänö cæboo, ante nämä beyæ wææ änä-
mai iñongante mönö, Tömengä ingante pangæimpa, ante
ædö cæte apænte anguii. Edæ, Wææ änämai iñongante
pangæimpa, ante dicæ wææ yewæmongadäninaa.

⁵² Ante añongä tömënäni,
—Bitö adobai Gadideabæ quëwente ponte bai tede-
bipææ. Wængongui beyæ näni yewæmongainta æ. Ad-
inque bitö, Wængongui beyæ në apænecä wi Gadideabæ
quëwente pongä ingampa, ante do eñencæbiimpa, ante
angadänimpa.

Onquiyængä nänö towënö

⁵³ Mäninö änäni ate tömänäni oncönë ocæ ëmænte
gogadänimpa.

8

¹ Itota guiquënë Odibowænquidi näni anquidi gocan-
tapa. ² Iimö ate nãö bayedë tömengä Wængongui oncö
ñænæncönë yabæcönë wæætë pö guicä adinque waodäni

tömänäni tömengä nänö ongõñömö goto pönäni adinque Itota tömēnāni inānite odōmonte apānecæte ante tæ contacantapa.

³ Mānīnedē onquiyængä adocanque tömengä nänöogængä ināmaī iñongante wacā onguīñængä tönö tæcæ godö guëa mongä adāni ate nē odömönāni tönö Paditeoidi iñömö māningä onquiyængä ingante ænte pönānitapa. Tömengä ingante tæcæguedē gö cædāni ongõñongä ⁴ tömēnāni Itota ingante,

—Awēnē nē Odömömi īmi, iingä onquiyængä iñömö wacā ingante tæcæ godö guëa mongä adāni wæmönipa. ⁵ Wængonguī nänö angainö ante Möitee wodi iīmaī ante wææ yewæmongacäimpa. Onquiyænāni māningä onquiyængä bai cædāni iñönānite mīnitö tömēnāni inānite dicaca tacamīni wæncædānimpa. Bitö guiquēnē quīnō ämii.

⁶ Mānīnō ante tömēnāni iñömö, Æbänö apānecää, äninque, Wabänö pancadea wapiticæ tedecæcäimpa, ante cædānitapa. Edæ wapiticæ tedecä iñinque mönitö, Adocä wēnæ wēnæ cæcä ingampa, ante ancæmönimpa, ante cædānitapa. Itota guiquēnē ædæ wæænīnque onguipoga tömengä önongompoga yewæmongacäimpa. ⁷ Tömēnāni godömenque tömengä ingante ēñencæte ante āñönāni Itota ængæ gantite tömēnāni inānite,

—Mīnitö weca adocanque ongönīnque nē wēnæ wēnæ cædāmaī ingä iñinque māningä täno onquiyængä ingante, Wænguīmi, ante dicaca tacacæcäimpa, ante angantapa.

⁸ Äninque wæætē ædæ wæænīnque onguipoga yewæmongacäimpa. ⁹ Mānīnō angä nē ēñēnāni iñömö adocanque wadæ go wacā wadæ go wacā wadæ go tömänāni wadæ godānipa. Picænāni täno wadæ godāni ayæ wadāni wadæ godānitapa. Tömänāni dæ godāni adinque Itota adocanque ee ongõñongä onquiyængä ayæ adoyömö næ

gongængantapa. ¹⁰ Itota ængæ gantidique onquiyængä ingante,

—Æyömönö inänii. Bitö ïmite apænte äninque tacadämaï inänitawo.

¹¹ Åñongä tömengä wæætë,

—Awënë, tömänäni mänömaï cädämaï inänitapa.

Angä ëñëninque Itota,

—Botö adobaï bitö ïmite apænte äninque tacadämaï incæboimpa. Ñöwo goe ämopa. Bitö wënæ wënæ cæte quëwënimämo ñimpo cæte waa quëwëe, angacäimpa.

Inguipoga quëwënäni beyæ Itota ñäö baï inongäimpa

¹² Ayæ Itota wæætë waodäni inänite apænedinque,

—Botö iñömö inguipoga quëwënäni beyæ ñäö baï ïmodö angüënë. Æcänö botö miñæ tee empo goda tömengä wëmö iñömö cöwë cægönämaï ingampa. Wæætë tömengä nänö quëwënö taadö edonque acæcäimpa, ante botö tömengä beyæ ñäö baï ïmopa, ante apænecantapa.

¹³ Paditeoidi guiquënë tömengä ingante,

—Bitö iñömö nämä äninque, Æbänö ïmoo, ante apænebi ïmipa töö. Mänömaï nämänque ante apænebi beyæ bitö äninö önonquedö ante impa, ämönipa, piinänitapa.

¹⁴ Itota wæætë,

—Botö iñömö nämä äninque, Æbänö ïmoo, ante apænebo incæ botö apænedö näwangä impa. Edæ, Botö æyömönö quëwente pömo ïmoo, ante ayæ, Ædönö gobo ïmoo, ante do ëñëmopa. Minitö guiquënë, Botö æyömönö quëwente pömoo ïmoo, ante ayæ, Ædönö gobo ïmoo, ante wii ëñëminipa töö. ¹⁵ Waodänique, ïmaï cædäni, ante näni wææ ante cægäi baï minitö wacä ingante apænte ämini ïminipa. Botö guiquënë waodäni tömänäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ïmopa. ¹⁶ Incæte botö mänömaï apænte ämo baï, Æbänö apænte ämoo,

ante pönëninque tömömo nö ante apænte ämopa. Edæ wii botonque apænte ämopa. Wæætë botö Mæmpo botö ïmote në da pönongaingä ïñömö tömengä ïñömö botö tönö godongämæ cæcä ate apænte ämopa. ¹⁷ Minitö mîni wææ yewæmongaintaa ïmaï ante wææ yewæmongatimpa. Mënaa onguïñæna në adîna inte tömöna nâna adinö ante apænedä ëñëninque mînitö wæætë, Nö impa, ante ëñencæmînimpa. ¹⁸ Botö ïñömö nâmä äninque, Æbänö ïmoo, ante apænebo ïmopa. Ayæ botö Mæmpo botö ïmote në da pönongaingä ïñömö tömengä botö ïmot-edö ante, Æbänö ingää, ante adobaï apænegä ëñencæmînimpa.

¹⁹ Angä ëñëninque tömönäni tömengä ingante,
—Bitö Mæmpo æyömönö quëwengää.

Äñönäni Itota wæætë,
—Mînitö ïñömö, Botö incæ æbänö ïmoo, ante, Botö Mæmpo incæ æbänö ingaingä ingää, ante ëñëmîni ïmînitawogaa. Botö æbodö ïmoo, ante ëñëmîni inte baï mînitö, Botö Mæmpo æbänö ingaingä ingää, ante adobaï ëñëmîni incädömînimpa, ante apænegacäimpa.

²⁰ Itota Wængonguï oncö ñænæncönë yabæcönë go guiidinque, Wængonguï quï, ante nâni da wencadë gäänë ongonde apænedinque mäninö ante apænegacäimpa. Incæte tömengä nänö wænguïönæ wii oo pöni i beyænque tömengä ingante bæi ongonde ænâmaï ingadänimpa.

Itota, Botö goquïñömö mînitö ædö cæte goquïmîni, angä

²¹ Itota wæætë tömönäni inänite äninque,

—Botö wadæ goquïmo ïmopa. Gobo ate mînitö botö ïmote ante diqui diqui minguïmîni ïmînipa. Mînitö wënæ wënæ cädömîni inte wæncæmînimpa. Botö goquïñömö mînitö ædö cæte ponguïmîni, angantapa.

²² Mäninö beyæ oodeoidi awënëidi, Tömengä ïñömö, Botö goquïñömö ante mînitö ædö cæte ponguïmîni, ante

quinante angää. Tömengä nämä incæ, Wænonguïmo, ante pönëninque iïmaï angantawo, ante änänitapa.

²³ Itota godömenque,

—Minitö iñömö inguipoga quëwëmini iminipa. Botö guiquënë öönædë quëwente põmo imopa. Minitö iñömö iï inguipogaque nãni quëwencabo tönö adomïni iminipa. Botö guiquënë iï inguipogaque nãni quëwencabo tönö adobo inãmaï imopa. ²⁴ Mãnömaï beyæ botö, Minitö wënæ wënæ cædömïni inte wæncæminimpa, ante minitö iminite apænetabopa. Botö, Æbänö imoo, ante ämo ëñëninque pönënämaï imïni ininque minitö wënæ wënæ cædömïni inte nö wæmaïminipa.

²⁵ Ante apæ necä ëñëninque tömënäni,

—Æbidö imitawo.

Ante äñönäni Itota wæætë,

—Botö do minitö iminite, Æbodö imoo, ante në änïmo imopa. ²⁶ Botö minitö iminitedö ante nanguï anguënëmo imopa. Minitö iminitedö ante ämo baï mãnïi botö änö mïni apænte anguinque imaimpa. Incæte botö imote në da pönongaingä iñömö tömengä nöingä inte tömengä, Quinö botö imote angää, ante botö ëñëninö ante botö adodö ante inguipoga quëwënäni inänite apænebo imopa, angantapa. ²⁷ Incæte tömënäni, Itota tömengä Mæmpo ingantedö ante mönitö imönite apæ necampa, ante ëñënämaï ingadänimpa. ²⁸ Mãnömaï beyæ Itota,

—Botö Waobo ëñagaimo iñömote minitö botö imote awäa timpodinque tiwadinque gö cæmïni wægöñömo minitö mãnïñedë edæ, Botö æbodö imoo, ante ëñencæminimpa. Ayæ botö nämä pönëninque cædämaï imopa. Wæætë Wæmpo nãnö odömonte apænedö ante botö imote apæ necä botö ëñëninö ante adodö ante apænebopa, ante minitö adobaï mãnïñedë ëñencæminimpa. ²⁹ Botö imote në da pönongaingä botö imote ëmö cædämaï inte cöwë botö tönö godongämæ

ongongä ingampa. Edæ botö cöwë, Æbänö cæbo ate tömengä waa aquingää, ante cæbopa, ante Itota apænegacäimpa.

³⁰ Mäninö añongä nangui inäni iñömö tömengä ingante pönengadänimpa.

Wënæ beyænque në cædäni

³¹ Oodeoidi pancadäniya në pönänäni iñönänite Itota iñömö,

—Minitö cöwë botö odömonte apænedinö bai cæmini inique botö miñæ nö gomini imäiminipa. ³² Ayæ botö änö nöinö impa, ante ëñencæminimpa. Mäninö nö botö änö beyænque minitö ñimpo cæte quëwencæminimpa.

³³ Ante añongä tömënäni wæætë,

—Mönitö iñömö Abadäo nänö päimöni imöni inte mönitö cöwë waocä æcämenque beyænque në cæmöni inämaï intamönipa töö. Bitö iñömö, Wacä beyænque minitö godömenque cædämaï inte ñimpo cæte quëwencæminimpa, ante ædö cæte ämii.

³⁴ Añönäni Itota wæætë,

Minitö iminite näwangä ämopa. Në wënæ wënæ cæcä iñömö tömengä wacä beyænque cæte në quëwengä bai wædongä inte edæ tömengä nänö wënæ wënæ cægäinonque ante cædinque ædö cæte aamö cæte goquingää. ³⁵ Wacä beyænque cæte në quëwengä iñömö tömengä awënë nani wencabo tönö wii cöwë godongämæ quëwengä ingampa. Awënë wengä guiquënë tömengä mæmpo tönö nana wencana ina beyænque tömengä awënë tönö cöwë guëa quëwengä ingampa. ³⁶ Mänömaï beyæ Wængongui Wengä minitö iminite ñimpo cæcä inique minitö nö ñimpo cæte quëwën-
inque wacä beyænque në cæcä bai inämaï inte quëwen-
guimini imäiminipa. ³⁷ Minitö iñömö Abadäo nänö päimini iminipa, ante do ëñëmopa. Incæte botö änö

ante mimönë entawënämaï quëwëmini beyä minitö botö imote, Wänömöni wæncæcäimpa, ante pönëmini iminipa. ³⁸ Botö iñömö botö Mæmpo weca tömëmo adinö ante minitö iminite apænebo imopa. Minitö guiquënë mini mæmpo nänö angainö mini ëñëninö ante cæmini iminipa.

³⁹ Ante apæneyongä tömënäni wæætë,

—Abadäö mönö docä mæmpo ingaingä ingampa.

Änani ëñëninque Itota,

—Minitö nö Abadäö wëmini inte bai minitö tömengä nänö cægainö bai adobaï cæcädöminipa töö. ⁴⁰ Nöwo iñæmpa botö, Wængonguï näwangä nänö angainö ante botö ëñëninö ante minitö iminite në apænebo iñömote minitö, Mönitö æbänö cæte wänömöni wænguingää, ante pönëmini iminipa. Abadäö mänii mini cægai bai cädämaï ingacäimpa. ⁴¹ Minitö iñömö tömëmini mæmpo nänö cægai bai adobaï cädömini imini awädö.

Äñongante tömënäni,

—Mönitö wii wegöwæ wëmöni imönipa töö. Wængonguï incæ tömengä adocanque mönitö Mæmpo inongäimpa.

⁴² Änani ëñëninque Itota tömënäni inänite,

—Wængonguï näwangä minitö Wæmpocä ingä bai minitö botö imote waadete pönencädöminipa. Edæ botö Wængonguï weca quëwente minitö weca ñöwo wææ pontabopa. Botö wii nämä pönëninque pontabopa. Wæætë tömengä botö imote da pönongä pongaimo imopa. ⁴³ Minitö iminite botö quinä apæneboo, ante minitö quinante ëñënämaï iminii. Edæ botö änö ante, Quinä apæneboo, ante minitö babetamö inäni bai inömini inte ædö cæte ëñenguimiiii. ⁴⁴ Wënæ iñömö minitö mæmpo inongäimpa. Ayæ minitö mæmpo nänö cæinëwënö ante minitö adodö ante, Mönitö cæinëmönipa, ante cæminipa. Wëñëñedë inguipoga

mä badöñedē tömengä, Botö wänonguïmo, ante do entawengä ingacäïmpa. Tömengä, Quïnö näwangä impa, ante cöwē änämaï ingampa. Ayæ edæ, Quïnö änö nöinö impa, ante tömengä entawënämaï ïnongäïmpa. Adocä babæ tededinque tömengä babæ nänö entawënonque ante tedewengä ingampa. Edæ tömengä nē babæ änogä ingampa. Ayæ tömengä ïñömö mä babæ angaingä ingampa. ⁴⁵ Incæte botö näwangä ämo beyænque mīnitö botö änö ante pönënämaï ïminipa töö. ⁴⁶ Mīnitö weca ongongä ïñömö æcämenque incæ botö ïmote apænte äninque, Bitö wënæ wënæ cæbi ïmipa, ante, Näwangä impa, ante odömönatawogaa. Botö näwangä ämo bai mīnitö quīnante botö angainö ante pönënämaï ïminipa. ⁴⁷ Wængonguï wënäni nē ïnönäni ïñömö Wængonguï nänö angainö ante ëñënäni ïnänipa. Mīnitö guiquënë tömengä wëmīni ïnämaï ïmīni beyæ, Tömengä quïnö angää, ante ëñënämaï ïminipa, ante Itota apænecäïmpa.

Abadäo ayæ ëñädämaï ïñedē mönö Codito do ingaingä

⁴⁸ Oodeoidi wæætē tömengä ingante,

—Bitö Tämadiabæ quëwëmi ïmipææ. Ayæ wënæ tönö cæbi ïmipææ, ante wīi näwangä ämöni intamönii.

⁴⁹ Ante pīinäni ëñëninque Itota wæætē apænedinque,

—Botö wīi wënæ tönö cädömo ïmopa. Wæætē botö ïñömö, Botö Mæmpo ingante waa acæboïmpa, ante cæbo ïmopa. Mīnitö guiquënë botö ïmote waa adämaï ïminipa töö. ⁵⁰ Waodäni, Bitö waëmö ïmipa, ante botö ïmote apænecädänimipa, ante botö cädämaï ïmopa. Wæætē wacä ïñömö, Waodäni bitö ïmite apænedinque, Waëmö ïmipa, ante apænecädänimipa, ante nē cæcä ingampa. Mäningä nē apænte änogä ingampa. ⁵¹ Mīnitö ïminite näwangä ämopa. Botö angainö ante nē ëñente cæcä

tömengä iñömö wantæpiyæ wænāmaï quëwencæcäimpa, angantapa.

⁵² Ante apænecä ëñëninque oodeoidi,

—Bitö wënæ tönö cæbi ïmipa, ante ñöwo ædæmö ëñëmönipa. Abadäo wodi iñæmpa do wængacäimpa. Ayæ Wængonguï beyæ nê apænedäni adobaï do wængadän-impä. Incæte bitö, “Botö angainö ante nê ëñente cæcä tömengä iñömö wantæpiyæ wænāmaï quëwencæcäimpa, ante apænebi töö.” ⁵³ Mönö docä mæmpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo ïmopa, ämitawo. Tömengä iñömö edæ do wængacäimpa. Ayæ Wængonguï beyæ nê apænedäni adobaï do wængadäni apa änewëë. Bitö nämä äninque, Æcämë bai ïmoo, ante ämi.

⁵⁴ Äñönäni Itota wæætë,

—Botö nämä äninque, Waodäni, Bitö waëmö ïmipa, ante botö ïmote apænecædänimpa, ante ëñëinente wæbo bai waodäni botö ïmote näni waa apænedö wæætë önon-quadö ante incædönimpa. Botö Mæmpo incæ mïnitö, Mönö Wængonguï ingampa, ante mïni änogä guiquënë tömengä iñömö, Bitö waëmö ïmipa, ante botö ïmote pönö apænecä apa quëwëminii. ⁵⁵ Mïnitö tömengä ingante wïi adinque pönënamäi ïmïnipa töö. Botö guiquënë tömengä ingante do agaimo inte pönëmo ïmopa. Botö tömengä ingante adāmaï ïmopa, ante bai botö mïnitö bai babæ ante ancædömoimpa. Wæætë tömengä ingante do adinque nê pönengaimo inte botö iñömö edæ tömengä nänö angainö bai nê cæbo ïmopa. ⁵⁶ Inguipoga botö ponguïönæ ante mïnitö docä mæmpo Abadäo wodi incæ, Codito ponguïönæ pongä acæboimpa, ante pönëninque do edæ watapæ togacäimpa. Ìninque tömengä mäniönæ Codito nänö ponguïönæ adinque godömenque togacäimpa, ante Itota apænecantapa.

⁵⁷ Oodeoidi tömengä ingante,

—Bitö eñagai iñömö tincoenta wadepo inämai i incæte bitö ædö cæte, Botö Abadäo ingante atabopa, ante ämii.

⁵⁸ Ante piiiñönäni Itota wæætë,

—Minitö iminite näwangä ämopa. Abadäo wodi ayæ eñadämai iñedë botö iñömö edæ do quëwëmo ingaimo imopa, ante apænecantapa.

⁵⁹ Mäninö ante apænecä eñëninque tömënäni iñömö tömengä ingante dicaca tacacæte ante cædinque dicacoo wææmpo æñänitapa. Incæte Itota wë womöninque Wængonguü oncö ñænæncodo tao wadæ gogacäimpa.

9

Babetamö eñagaingä incæ waa bamonte acampa

¹ Itota gomonga godinque onguüñængä babetamö eñagaingä ingante acantapa. ² Tömengä emiñænäni iñömö tömengä ingante,

—Awënë në Odömömi imi, mäningä onguüñængä incæ tömengä mæmpoda incæ æcänö wënæ wënæ cæda beyæ tömengä babetamö eñacantawo, ante eñencæte ante änänitapa.

³ Itota tömënäni inänite,

—Iingä onguüñængä incæ tömengä mæmpoda incæ tömänäni wënæ wënæ cædämai inänitapa. Wæætë tömengä babetamö eñagaingä inte quëwëñongante Wængonguü nänö cædö iñömö edonque pöni acäimpa, ante mäningä mänömai ingacäimpa. ⁴ Iñänäni eñeedäni. Botö imote në da pönongaingä tömengä nänö cædö ante mönö miü quëwenganca mönö cæquënëmö imompa. Mönö wængüönæ iñonte mönö ædö cæte ayæ cæquimö. ⁵ Botö inguipoga quëwëñedë botö inguipoga quëwënäni beyæ ñäö bai inömo imopa.

⁶ Mäninö ante äninque Itota onguipoga towæ tänöninque wëä wëä gopodinque aquimæ bayonte æninque

babetamongä awinca öni öni pæmongantapa. ⁷ Ayæ tömengä ingante,

—Goe. Gäwapæ Tidoee näni ämäë godinque bitö awinca ñäö mêmöe, ämopa, angantapa. Tidoepæ näni ämäë iñömö mönö tededö, Da godömæ, ante impa.

Angä ëñente godinque onguiñængä ñä mêmöninque tömengä oncönë ocæ ëmænte pöninque do acä ingacäimpa. ⁸ Tömengä mänömaï do acä inte pongä adinque godongämæ quëwënäni tönö wëñëñedë tömengä, Pönömi æmoe, añongante në adinäni tönö,

—Æ, ïingä onguiñængä diyæ, Pönömïni æmoedäni, ante në äñecöningä wïi adocä ingantawo.

⁹ Änäni ëñëninque pancadäniya,

—Mäningä ingampa, änänitapa.

Wadäni guiquënë,

—Wïi tömengä ingä, önonque tömengä nänö ëmö bai ëmönongä ingampa.

Ante tedeyönäni onguiñængä tömenganque,

—Botö mänïmodö inömo ïmopa, angantapa.

¹⁰ Ayæ tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguiñængä iñömö tömengä ëmöwo Itota iñömö onguipoga towæ tänöninque wëä wëä gopodinque aquimæ bayonte æninque botö awinca öni öni pæmongantapa. Ayæ botö ïmote, “Goe. Gäwapæ Tidoepæ näni ämäë godinque bitö awinca ñä mêmöe” angantapa. Angä ëñëninque botö wadæ gote ñä mêmöninque do waa bamonte abopa, angantapa.

¹² Tömënäni tömengä ingante,

—Ïingä onguiñængä bitö änongä iñömö æyömönö ingä.

Ante äñönäni tömengä wæætë,

—Botö ëñënämaï ïmopa, angacäimpa.

Babetamö iningä ingante Paditeoidi ancaa änäni

¹³ Ayæ Paditeoidi weca onguĩñængä nê babetamö ëña-gaingä ingante ænte mämönäni pongantapa. ¹⁴ Itota mänii aquimæ badöningue babetamö iningä awinca wi æmonte bai nänö cæönæ iñömö oodeoidi guëmanguiönæ inönimpa. ¹⁵ Mänömaï beyæ Paditeoidi iñömö adobaï ëñencæte ante babetamö iningä ingante edæ, Æbänö cæte bitö waa bamonte abii, ante äñönäni tömengä wæætë,

—Mäningä iñömö aquimæ æninqe botö awinca öni öni pæmongantapa. Ayæ botö tömömo awinca ñä mämön-inque ñöwo waa bamömo inte abopa, angantapa.

¹⁶ Paditeoidi pancadäniya,

—Iingä onguĩñængä iñömö wii Wængonguï weca quëwente pongä ingampa. Edæ tömengä mönö guëman-guiönæ iñonte guëmänämaï inte do cæcampa, änänitapa.

Wadäni guiquënë,

—Iñæmpa waocä nê wënæ wënæ cæcä inongä inte ædö cæte mänömaï, Acæminimpa, ante mä cæquingää, änänitapa.

Iñinqe tömönäni wadö wadö ante pönente tedewen-gadänimpa. ¹⁷ Ayæ tömönäni wæætë babetamö iningä ingante,

—Tömengä cæcä ate bitö waa abi inte bitö edæ tömengä ingantedö ante quinö ämii.

Ante äñönäni onguĩñængä wæætë,

—Tömengä Wængonguï beyæ nê apænecä ingampa, angantapa.

¹⁸ Babetamö iningä iñömö, Waa bamömo imopa, ante apænecä ëñëningue oodeoidi awënëidi ayæ pönänämaï inänitapa töö. Tömengä mæmpoda inate aa pedäni ponte apæneda ate mänïnedë pönänitapa. ¹⁹ Tömönäni tömöna inate,

—İngä onguiñængä edæ minatö wengä ingantawo. Mäningä nē babetamö eñagaingä minatö anongä adocä ingantawo. Æbänö cæte tömengä ñowo waa bamonte acäi.

²⁰ Ante äñönäni tömengä mæmpoda wæætë, Nē babetamö eñagaingä iñömö tömengä mönatö wengä ingampa, ante eñëmönapa. ²¹ Incæte mönatö, Æbänö cæte tömengä ñowo waa bamonte acää, ante, Æcänö tömengä awinca wi æmonte bai cæcää, ante eñënämaï imönapa. Minitö tömengä ingante eñencæte ante äedäni. Tömengä do picængä ingampa. Tömenganque apæñecä eñencæminimpa, änatapa.

²² Tömengä mæmpoda oodeoidi awënëidi inänite guiñëninque mäninö ante apænedatapa. Edæ oodeoidi awënëidi iïmaï ante do apænedönänimpa. Æcänö Itota ingante Ao ante, Mönö Codito ingampa, äna eñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picængä ingampa. Minitö tömengä ingante eñencæte ante äedäni,” agadaimpa.

²⁴ Onguiñængä nē babetamö iningä ingante wæætë aa pedäni pongä ate tömengä ingante,

—Bitö Wængongui eñëñongä näwangä ante apænee, ämönipa. Edæ iingä onguiñængä mäninö nē cædingä wënæ wënæ cæcä ingampa, ante edæ do amönipa.

²⁵ Ante piñönäni tömengä wæætë,

—Mäningä wënæ wënæ cæcä incæ wii wënæ wënæ cæcä incæ botö eñënämaï imopa. Botö babetamömo inimo incæ ñowo waa bamonte abopa. Mäninque eñëmo imopa.

²⁶ Ante apæñecä eñëninque tömënäni tömengä ingante,

—Tömengä iñömö bitö imite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö iminite do antabopa. Botö aññömote minitö ëñënamai iminipa töö. Quinante wæætë adodö ante ëñëinëminii. Minitö adobai, Mönitö tömengä ëmiñæmöni baquimöni, ante äminitawo, ante angantapa.

²⁸ Ayæ tömënäni tömengä ingante piinte wënæ wënæ badete todinque,

—Bitö mäningä ëmiñæmi imipa töö. Mönitö guiquënë Möitee ëmiñæmöni imöni apa quëwëmii, änänitapa. ²⁹ Wængongui Möitee ingante apænecäimpa, ante do ëñëmönipa. Ìngä guiquënë æyömönö quëwente pongää, ante ëñënamai imönipa.

³⁰ Aññönäni onguiñængä wæætë,

—Mäninö minitö äninö wiwa impa äminii. Tömengä pönö cæcä waa bamonte abo incæte tömengä æyömönö quëwente pongää, ante minitö ëñënamai iminipa. ³¹ Në wënæ wënæ cädäni iñömö Wængongui ingante apäneyönäni tömengä tömënäni inänite ëñënamai ingampa, ante do ëñëmompa. Wæætë Wængongui ingante, Bitö adobique mönö Wængongui imidö angüënë, ante në apäneccä iñömö tömengä Wængongui nänö angainö në ëñente cædongä inte apäneyongante Wængongui tömengä ingante ëñencæcäimpa. ³² Waocä në babetamö ëñagaingä iñongante wacä tömengä awinca wi æmante bai cæcä ante æyedëmenque incæ ingui-poga quëwënäni dicä änäni ëñënanitawogaa. ³³ Ìngä onguiñængä iñömö wii Wængongui nänö da pönongä pongaingä inte bai tömengä tömänö cädämai incædongäimpa, angantapa.

³⁴ Mäninö angä ëñëninque tömënäni wæætë,

Bitö ēñagaiñedē do wēnæ wēnæ cæte ēñagaiimi ïmipa. Incæte bitö mönitö ïmönite ædö cæte, Eñencæminimpa, ante odömonte apænebi ïmipa töö.

Änani ïninqe tömēnani, Bitö mönitö odömöincönē ongönāmaï tao gobäwe, ante tömengä ingante da tadönāni tao gogacäimpa.

Nē babetamö bai ïnani ïnänite ante Itota apænecampa

³⁵ Tömēnani tömengä ingante da tadönänipa, ante tededäni ēñēninqe Itota tömengä ingante ante diqui diqui minte gote adinqe.

—Bitö Waocä nē ēñagaingä ingante pönēmitawo.

³⁶ Angä ēñēninqe onguïñængä,

—Awēnē, mäningä æcänö ïnaa. Botö tömengä ingante pönencæboimpa, ante apænebi ēñēmoe.

³⁷ Ante añongä Itota wæætē,

Bitö tömengä ingante do abitapa. Ayæ bitö ïmite nē apænebo ïñömö tömēmo ïmopa.

³⁸ Angä ēñēninqe onguïñængä,

—Awēnē, botö wede pönēmo ïmopa. Ayæ, Bitö Wængonguï Wēmi ïmidö anguēnē, ante tömengä Itota weca ædæ wææninqe apænecantapa.

³⁹ Itota ïñömö edæ,

—Botö, Inguipoga quēwēnani æbänö cædānii, ante apænte ancæte ante pöninqe ïimaï cæbopa. Botö nē babetamönāni bai ïnani waa bacædänimpa, ante cædinqe pontabopa. Ayæ wæætē, Mönitö waa amönipa, ante nē änani ïnänite, botö, Babetamömini bai ïminipa, ante edonque odömoncæte ante pontabopa.

⁴⁰ Mäninö angä ēñēninqe Paditeoidi pancadäniya tömengä weca nē ongönāni guiquēnē tömengä ingante,

—Æbänö ämii. ïñæmpa mönitö adobai babetamömöni bai ïmönitawogaa.

⁴¹ Ante añönāni Itota wæætē,

—Minitö babetamömini bai inte bai wənæ wənæ cædämaï incædöminimpa. Wæætë minitö, Mönitö waa amönipa, ante nē änömini inte mini wentamö mongæncoo ee mongæmini inguimīnidö anguēnē, ante apænegacäimpa.

10

Nē aacä tönö tömengä obegaidi

¹ Itota ayæ iïmaï apænecantapa. “Minitö iminite näwangä ämopa. Onguïñængä obegaidi nāni wææ cæyömö guidemö nē guidämaï inte wæætë wayömö da ëwa æi guicä iñömö tömengä iñömö nē awëmö ö ængä inongä inte adobaï wadāni ayönāni nē pö ö ænte gocä ingampa. ² Odemö nē guicä guiquēnē tömengä obegaidi inānite nē aacä ingampa. ³ Nē aacä beyæ odemö nē wææ cæcä wi ænecampa. Wi ænecä ate nē aacä pö guiite tedeyongä obegaidi tömengä nänö tedepämo ëñente inānipa. Tömengä obegaidi inānite nāni ëmowo nāni ëmowo ante aa pecä pöñönānite tömengä tömēnāni inānite ænte taocampa. ⁴ Tömengä obegaidi tömänāni inānite ænte taodinqe tömengä önömæca iñömö täno beyænte gocä ate tömengä obegaidi tömengä nänö tedepämo ëñēninqe tömengä ingante tee empo godānipa. ⁵ Wacä ingante guiquēnē tömēnāni tee empote godāmaï inānipa. Wæætë wacä nänö tedepämo ëñēnāmaï ināni inte tömēnāni tömengä weca ongönāmaï wodii gocædānimpä,” ante Itota apænecantapa.

⁶ Tömengä mänömaï tömēnāni inānite odömoncæte ante, Nē aacä æbänö cæcää, ante odömonte apænecä incæte tömēnāni tömengä nänö äninö ante ëñēnāmaï ingadānimpä.

Itota mönö imonte nē Aacä ingä

⁷ Mänömaï beyä Itota wæætë äninque, “Botö minitö iminite näwangä ämopa. Botö iñömö në obegaidi bai inäni nani wææ cæyömö, Guiicädänimpa, ante odemö bai imopa. ⁸ Wëenëñedë botö ayä pönämaï iñedë wadäni odömonte apænecæ pongadänimpa. Tömënäni tömänäni waodäni inänite në awëmö ö ännäni bai inönäni inte adobai wadäni ayönäni në pö ö ænte gogainäni bai ingadänimpa. Incæte waodäni iñömö në botö obegaidi bai inönäni inte në ö äinënäni inänite wæætë ëñänämaï ingadänimpa. ⁹ Botö në odemö bai imopa. Odemö në guicä bai iñömö tömengä botö imote pönengä iñongante botö ämo beyænque quëwencæcäimpa. Adocä në obega bai inte tömënäni nani wææ cæyömö guidemö në guicä bai inique tömengä piyænë cæte quëwencæcäimpa. Ayä tömengä wæætë në taocä bai inique tömengä nänö cænguï mä öñö adinque eyepæ cæncæcäimpa,” ante Itota apænecantapa.

¹⁰ Ayä apænedinque, “Në awëmö ængä guiquënë tömengä iñömö awëmö æncæte ante pongä inongä inte adobai wænoncæte ante wo ëwencæte ante mäninganca cæcæte ante pongä ingampa. Botö iñömö, Waodäni quëwencädänimpa, ante ayä, Tömënäni nani quëwenguinque ante watapæ pönï quëwencädänimpa, ante pontabopa. ¹¹ Botö obegaidi bai inäni inänite në waa aacä bai imopa. Në waa Aacä iñömö nämä incæ obegaidi beyænque wæncæcäimpa. ¹² Godonte äinta ante wacä ingante në cæcä iñömö tömengä iñömö obegaidi në ëacä inämaï inongä inte në aacä inämaï ingampa. Mänömaï beyä adocä iñömö mëñe bai ingä pongä adinque tömengä obegaidi inänite ëmö cæte wodii winongampa. Tömengä wodii winongä adinque mëñe bai ingä wæætë obegaidi weca pogodo ponte obega ingante yao ongöningue, Obegaidi pangocæ goquinäni, ante cæcampa. ¹³ Godonte

æintaque ante nē cæcä iñömö, Æbänö cæte obegaidi waa quëwenguināni, ante änāmaï inongä inte edæ wodiï winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inānite waa aacä bai edæ botö iñömö nē waa Aabo imopa. Botö Mæmpo edæ botö imote do ate pönengä bai botö adobai tömengä ingante do adinque pönëmopa. Ayæ tömëmo obegaidi bai ināni inānite do adinque tömënāni inānite pönëmopa. Ayæ tömënāni guiquënë botö imote do adāni inte botö imote pönënānipa. Botö nämä incæ obegaidi bai ināni beyænque wæncæboimpa. ¹⁶ Ayæ wadāni iñömö botö obegaidi bai nē ināni incæ wii mäninömö wææ cæyömö quëwënāni inānipa. Botö mänināni inānite adobai ænte mämö ponguënëmo imopa. Adodāni adobai botö tedepämo, Æbänö ämoo, ante ëñenguināni inānipa. Mänömaï beyæ mänināni iñömö do botö quinäni tönö tömänāni adocabodānique baquināni inānipa. Ayæ nē Aabo adoboque iñömö tömänāni beyæ cæcæboimpa.” ante Itota apænecantapa.

¹⁷ Ayæ apænedinque, “Botö nämä incæ Ao ante wæn-inque ñāni ömæmoncæboimpa, ante cædinque wæætë tömëmo miï quëwenguimo incæboimpa. Mänömaï beyæ botö Mæmpo botö imote waadete pönengä ingampa. ¹⁸ Waodāni iñömö ædö cæte botö imote wænonguinānii. Botö nämä incæ Ao äninque wæncæboimpa. Botö nämä täï piñämo iñömö, Wænguimo, ante nē ämo inömo imopa. Ayæ adobai botö nämä täï piñænte nē ämo inte botö, Ñāni ömæmoncæboimpa, ante cædinque wæætë tömëmo miï quëwenguimo incæboimpa. Botö Mæmpo iñömö botö imote nänö wææ angainö botö ëñëninö ante ëñente cæbopa,” ante apænecantapa.

¹⁹ Mäninö apænecä ëñëninque oodeoidi wæætë wadö wadö ante pönente tedewengadānipa. ²⁰ Oodeoidi nan-

gui inäni iñömö,

—Tömengä wænæ tönö cæcä inte edæ ömæcacä inongä ingampa. Ædö cæte tömengä ingante eñëmîni imîni.

²¹ Añönäni oodeoidi incæ wadäni guiquënë,

—Tömengä wænæ tönö cæcä inte bai tömengä iimaï nänö äninö ante wîi angä incædongäimpa. Nê wænæ inte quëwente cæcä iñömö babetamönäni awinca wi æmonte bai cæcä waa bamönäniyaa.

Oodeoidi Itota ingante Baa änäni

²² Yoguite tedæ iñonte waodäni Eedotadëë quëwënäni, Wængongui oncö tæiyæ waëmö oncö ante dodäni mänongadänimpa, ante pönente ææmæ cæyönäni.

²³ Itota Wængongui oncö ñænæncönë yabæcönë Tadömöö nani änoncönë iñömö cægongantapa.

²⁴ Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinënämaï imii. Bitö mönitö Codito imi ininque mönitö imönite edonque pönî apænebi eñëmönii.

²⁵ Ante añönäni Itota wæætë,

—Mînitö imînite do antabopa. Incæte mînitö pönënämaï imînipa töö. Botö edæ botö Mæmpo ëmöwo ante bamönengæ cæbo adinque mînitö, Botö æbänö imoo, ante eñenguënëmîni imînipa. ²⁶ Mînitö wîi botö obegaidi bai inömîni inte botö imote pönënämaï imînipa töö. ²⁷ Waodäni botö obegaidi bai nê inäni inte botö tedepämo, Æbänö ämoo, ante do eñënäni. Ayæ botö tömënäni inänite adinque pönëmo iñömote tömënäni wæætë botö imote tee empote godänipa. ²⁸ Botö adodäni inänite wantæpiyæ nani quëwenguinö godömo æninque quëwencädänimpa. Ayæ cöwë wænämaï incädänimpa. Tömënäni tömëmo önönempo ongöñönänite æcänö tömënäni inänite gä pe æmpoda iñömö edæ dæ angampa.

²⁹ Botö Mæmpo edæ adodäni inänite botö imote në pönongaingä inongä ingampa. Tömänäni wædänäni iñönäni tömengä iñömö godömenque ñænængä inte nangui cædongä ingampa. Inique tömengä önönempo ongöñönänite æcänö tömënäni inänite gä pe æmpoda iñömö edæ dæ angampa. ³⁰ Botö iñömö botö Mæmpo tönö äawocaque bai ewocamöna imönapa, ante Itota apænegacäimpa.

³¹ Mäninö angä ëñëningue oodeoidi wæætë tömengä ingante dicaca tacacæte ante cædinque dicacoo wææmpo ænänipa. ³² Tömënäni dicacoo wææmpo æñönänite Itota tömënäni inänite,

—Botö mīnitö weca botö Mæmpo nänö angai bai nangui bamönengæ odömonte cætabopa. Ædö botö bamönengæ cædinö ante adinque mīnitö botö imote dicaca tacacæ cæmīnii.

³³ Ante añongä oodeoidi wæætë,

—Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætë bitö babæ ante Wængongui ingante godö wënæ wënæ ämipa, ante bitö imite tacacæ cæmönipa. Edæ mönitö waomöni bai inte bitö adobai waobi imi incæte bitö, Botö Wængonguimo inömo imopa, ante ämipa töö.

³⁴ Ante wæyönäni Itota wæætë tömënäni inänite,

—Mīnitö mīni wææ yewæmongainö wii iimai ante yewæmongatii. “Mīnitö iñömö wængonguūdi imīnipa, ante do antabopa,” ante yewæmongadänimpa.

³⁵ Wængongui angä ëñente nāni yewæmongainö ante waodäni ædö cæte Baa äninque wido cæquīnānii. Wængongui nänö angainö ante apænecä në ëñënäni iñönänite tömengä, Mīnitö wængonguūdi imīnipa, angantapa. ³⁶ Ayæ botö Mæmpo botö imote inguipoga da pönoncæte ante, Botö adoboque quimi imipa, ante botö imote apænte ængacäimpa. Inique edæ botö tömengä

quimo inömo inte tömengä nänö nē da pönongaimo iñömote edæ botö imote edæ æbänö anguii. Iñæmpa botö iñömö Wængongui Wëmo inömo imopa, äñömote edæ mīnitö wæætē, Bitö babæ ante Wængongui ingante godö wënæ wënæ ämipa, ante quīnante ämīnitawo. ³⁷ Botö edæ Mæmpo nänö cædö bai cædämai imo bai mīnitö mänīñedē botö imote pönënämai imini bai waa incædönimpa. ³⁸ Mīnitö botö imote pönënämai imini incæte botö guiquēnē botö Mæmpo nänö cædö bai adobai cæbo ininque mīnitö, Botö æbänö cæboo, ante adinque pönencæminimpa. Mänömai cædinque, Botö Mæmpo ingante botö ewocabo imopa, ante ayæ, Botö adobai botö Mæmpo nempo quëwëmopa, ante eñenguimīni inte ayæ eñëninque pönencæminimpa, ante Itota angacäimpa.

³⁹ Mänin angä eñëninque tömënäni wæætē tömengä ingante bæi ongoncæ cæyönäni tömengä do aamö cæte gocantapa.

⁴⁰ Ayæ Eedotadëe wadæ godinque Oododänö ämämäa ocæ emænte taodinque tömengä Wäö wëenëñedē waodäni inänite æpænē nänö guidönīñömö adoyömö gote ongongä ingantapa. ⁴¹ Ayæ tömengä mänīñömö ongöñedē waodäni nangui inäni tömengä weca goto pöninque änänitapa.

—Ate eñencæminimpa, ante Wäö wodi cöwē bamönengä cædämai ingä incæte tömengä mäningä Itota ingantedö ante nänö angainö tömänö näwangä ante angantapa, ante apænedänitapa.

⁴² Ayæ mänīñömö ongöninque waodäni nangui inäni Itota ingante wede pönënäni bagadänimpa.

¹ Mäniñedē wacā onguiñængä tōmengä emōwo Datado wēnæ wēnæ badinque oñonongäimpa. Mäadiya tönö Mäadota tōmengä tōniñada nāna quēwēñōmō tōmengä adoyōmō Betānia iñōmō quēwēnongäimpa. ² Ìngä Mäadiya guiquēnē ayæ ate ogui wapæ ænte Awēnē Itota ingante öni pædinque nāmā ocagui inte tōmengä önōwa amimō cæquiringä adocā Mäadiya iñongä tōmengä tōniñacā Datado ñōwo wēnæ wēnæ bacā ñonongäimpa. ³ Ìninqe Datado tōniñada iñōmō, Itota ingante aa pebi pongæ, āna ēñente wacā gote,

—Awēnē ēñēmi, Bitō nē waadecā iñōmō wēnæ wēnæ ingampa cæbii, ante ānapa, ante apænecantapa.

⁴ Māninō nāna ānō ante apænecā ēñēninqe Itota,

—Māninō wēnæ wēnæ inte nānō wædō iñōmō wii wængui impa. Wæætē waodāni, Wængongui ñāō apāite emōnongä ingampa, ante acædānimpā. Ayæ botō imote, Bitō Wængongui Wēmi adobai ñāō apāite emōnōmi ñmipa, ante apænecædānimpā, ante māningä wēnæ wēnæ ingampa, angantapa.

⁵ Mäadota tönö tōmengä tōniñacā Mäadiya nāna caya ñinate ayæ Datado ingante Itota tōmēnāni ñānānīte waadete pōnēnongäimpa. ⁶ Datado wēnæ wēnæ ingampa, ante apænecā ēñengä incæte Itota nānō ongōñōmō adoyōmō mēōnaa ayæ ongongantapa. ⁷ Tōmengä ayæ ate tōmengä emiñænāni ñānānīte,

—Ægodödāni, wæætē Oodeabæ mönō gocäimpa.

⁸ Äñongä tōmēnāni wæætē tōmengä ingante,

—Awēnē nē Odōmōmi ñmi, wantæyō intapa oodeoidi bitō ñmīte dicaca tacacæ cædāni incæte bitō ñōwo wæætē, Māniñōmō goquimo, āmitawo.

⁹ Ante ānāni Itota wæætē,

—Ìñæmpa nænque wii tōmää itædē apāitawo. Itædē nē gocā mönō nænque inguipoga apāicā ate beyæ tēwadāmai gocampa. Botō iñōmō itædē gocā bai adobai miimo botō

quëwenganca botö cæquënënö iinque cæquinque gobopa.
¹⁰ Woyowotæ nè gocä bai guiquënë tömengä wæætë ñäö
 dæ ä beyæ tēwate bai gocampa, angacäimpa.

¹¹ Mäninö angä ate tömengä godömenque tömënäni
 inänite,

—Mönö æmigo Datado iñömö mö ñongä. Botö ñowo
 tömengä weca gote, Ñäni ömæmöe, ämo ñäni ömæ-
 monguingä, ante apæncantapa.

¹² Tömengä emiñænäni wæætë tömengä ingante,

—Awënë Itota, tömengä mö ñongä ininque edæ gancaë
 baquingä, apænedänitapa.

¹³ Itota Datado nänö æmäwo wänimämo ante apæncä
 incæte tömengä emiñænäni guiquënë, Datado önonque
 mö ñongampa, ante Itota apæncampa, ante pönënönän-
 impa. ¹⁴ Mänömaï beyæ Itota tömënäni inänite,

—Datado æmäwo wængäimpa, ante edonque pöní
 apæncantapa. ¹⁵ Minitö pönencæminimpa, ante
 botö, Tömengä wæncæ cæyongä botö tömengä weca
 ongönämaï intabopa, ante minitö beyæ ante tobopa.
 Ægodöedäni, tömengä weca mönö gocäimpa, angantapa.

¹⁶ Ayæ Tömato Äancadënaque näni änogä iñömö Itota
 emiñænäni wadäni inänite,

—Ægodöedäni, äninque, Tömengä tönö godongämæ
 wæncæte ante tömengä miñæ gocäimpa, angacäimpa.

*Itota mönö ömæmonguimämo mönö miï quëwenguimämo
 ante nè pönongä ingampa*

¹⁷ Ayæ Itota ponte ëñëñongä, Datado baö tömënäni
 näni wodintatodë mëönaa go mëönaa do daga wënäni-
 tapa, ante apænedäni ëñengacäimpa. ¹⁸ Betänia iñömö
 näni taadö godö Eedotadëë näni quëwëñömö godö eye-
 quei inönimpa. Mäniï taadö wodo tedete quidömetodo
 ganca inönimpa. ¹⁹ Oodeoidi nanguï inäni iñömö Mäadota
 tönö Mäadiya weca pöninque, Mínatö töníñacä wængä
 ate wæwëmina incæte piyænë cæte quëwencæminaimpa,

ante waadete apænecæte ante pönänitapa. ²⁰ Itota oo pöni pongampa, ante änäni ëñëninque Mäadota tömengä ingante bee tencæte ante gocantapa. Mäadiya guiquënë oncönë ee ongongantapa. ²¹ Mäadota Itota weca pöninque tömengä ingante,

—Awënë Itota, bitö mönitö weca ongömi bai botö tönïñacä wii wæncædongäimpa. ²² Tömengä ämæwo wængä incæte bitö ñöwo Wængongui ingante quiëmë ante apænebi tömengä pönö cæcä ænguimi imipa, ante botö ëñëmopa, ante apænecantapa.

²³ Angä ëñëninque Itota tömengä ingante,

—Bitö tönïñacä wodi ñäni ömæmonguingä.

²⁴ Ante apænecä ëñëninque Mäadota wæætë,

—Ao, inguipoga iinque bayedë mönö ñäni ömæmöñedë tömengä do wængaingä incæte ñäni ömæmoncæcäimpa, ante botö do ëñëmopa, angantapa.

²⁵ Itota tömengä ingante äninque,

—Botö në ñäni ömæmonguimo inömo inte cæbo beyænque mïnitö ñäni ömæmoncæminimpa. Mïni wantæpiyæ quëwënguinque ante në Quëwëmo inömo imopa. Botö imote në wede pönengä iñömö do wængä incæte ayæ ate wantæpiyæ quëwencæcäimpa. ²⁶ Ayæ në mii quëwengä inte botö imote wede pönengä iñömö tömengä cöwë wænämaï quëwencæcäimpa. Bitö mäninö ante pönëmitawo.

²⁷ Angä ëñëninque Mäadota tömengä ingante,

—Awënë Itota Ao ämopa, ante apænecantapa. Bitö mönitö Codito inömi imipa, ante pönëmopa. Wængongui Wëmi inömi inte bitö iñömö edæ, Inguipoga në Ponguingä, ante nänï angäimi imipa, ante pönëmopa, ante apænecantapa.

Itota Datado wodintatodë gote wæcä

²⁸ Mänömaï ante apänedinque Mäadota ocä emænte gote Mäadiya ingante aa pecä pongä ate Mäadota tömengä ingante awëmö äninque,

—Mönö në Odömongä do pöninge bitö imite aa pecampa.

²⁹ Angä ëñëninque Mäadiya quingä ængä gantite tömengä weca gocantapa. ³⁰ Itota Betänia iñömö ayä guidämaï inongäimpa. Mäadota tömengä ingante nänö bee tēniñömö tömengä adoyömö ayä a ongönongäimpa.

³¹ Oodeoidi Mäadiya tönö oncönë godongämä ongöninque, Tömengä piyänë cæcæcäimpa, ante tæcæ waadete apäneyönäni tömengä quingä ængä gantidinque taocä adinque tömēnāni, Tömengä Datado wodi nänö wodinatodē wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöninge Mäadiya tömengä ingante adinque tömengä önöwa ædæ wæænte apänedinque,

—Awënë Itota, bitö mönitö weca ongömi bai botö töninacä wii wæncædongäimpa, ante wæcantapa.

³³ Mäadiya mänömaï wæyongä oodeoidi tömengä tönö godongämä në pönināni adobai wädāni adinque Itota wæwente entawëninque wæcantapa. ³⁴ Ayä,

—Datado wodi baö æyömönö da wëminitawo,

Angä ëñëninque tömēnāni,

—Awënë Itota, pö ae.

³⁵ Ante äñönāni Itota Ca wæcantapa. ³⁶ Tömengä mänömaï wæcä adinque oodeoidi,

—Aedāni, tömengä Datado wodi ingante nö waadete pönengä ingantapa.

³⁷ Ante tedeyönāni pancadāniya,

—Tömengä iñæmpa në babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömæmömämo

³⁸ Itota wæætë wæwente entawëninque Datado wod-intatodë pongacäimpa. Tömengä wodido ontatodë i iñonte dicabo ñænængade da pæñæ pönö tee mönodäni.

³⁹ Adinque Itota,

—Dicabo da tæ ñæedäni, äñongä Datado wodi tönñäcä Mäadota wæætë,

—Awënë Itota, ëñëmi. Mëönaa go mëönaa tömengä wodido öñöninque tömengä wodi do öö wadingä ingampa.

⁴⁰ Ante wææ angä ëñëninque Itota,

—Bitö wede pönëmi ininque edæ Wængongui æbänö ñäö apäite ëmönongä inte cæcää, ante bitö acæbiimpa, ante bitö imite wi antawo, angacäimpa.

⁴¹ İninque tömënäni dicabo tæ ñænänitapa. Ayæ Itota æmö adinque,

—Mæmpo botö apænedinö ante do ëñëmitapa, ante adinque botö bitö imite waa ate pönëninque apænebopa.

⁴² Botö apænedö ante æyedëmë apænebo incæ bitö cöwë ëñëmipa, ante botö do ëñëmopa. Wæætë edæ waodäni botö weca godongämæ gongænäni beyæ ante botö mäninö ante apænetabopa. Bitö botö imote da pönömi pontabopa, ante tömënäni pönencädänimpa, ante apænetabopa.

⁴³ Mänömainö ante Wængongui ingante apænedinque Itota,

—Datado ta pöe, ante yedæ aa pecantapa.

⁴⁴ Në wæningä iñömö edæ do ta pongantapa. Tömengä önompo wecoo inte nänäni wini wini cædincoo ayæ empodinque önöwa nänäni wini wini cædincoo ayæ ewadinque tömengä awinca wecoo nänäni ñäne cæmönincoo ayæ ëmongä inte ta pongä adinque Itota tömënäni inänite,

—Mänincoo ñi cæmini gocæe, angacäimpa.

*Itota ingante bæi ongonte ængæimpa, ante tedewēnāni
(Māateo 26.1-5; Māadoco 14.1-2; Odoca 22.1-2)*

⁴⁵ Mānōmaī beyæ oodeoidi nanguī īnāni Māadiya weca ēñacæ nē pōnināni inte īnāni īñōmō Itota mānōmaī cæcā adinque tōmengā ingante wede pōnēnāni bagadān-
impa. ⁴⁶ Pancadāniya guiquēnē Paditeoidi weca godinque,
Itota quīnō cæcāā, ante adodō angadānimpa. ⁴⁷ Īnīnque
Wængonguī quī, ante nē godōnāni ñænænāni tōnō Pa-
diteoidi īñōmō wæætē tōmēnāni ōmæ nāni Apænte Āin-
cabo tōmānāni īnānite, Mōnō godongāmæ apæ necæimpa,
ante adoyōmō pōedāni, ante āñōnāni pōnāni adinque
tōmēnāni,

—Īngā īñōmō, Acædānimpa, ante nanguī bamōnengæ
cæcā ingā. Mōnō quīnō cæquīmōō. ⁴⁸ Ante wædinque
mōnō tōmengā ingante, Bitō mānōmaī godōmenque
cædāmaī incæbiimpa, ante wīi wææ āmō ĩnīnque waodāni
tōmānāni tōmengā ingante pōnēmainānīpa. Tōmengā
ingante pōnēnāni ĩnīnque, Itota oodeoidi Awēnē bacæte
ante cæcampa, ante pōnente wædinque odōmānoidi incæ
edæ wææ cæbainānīpa. ĩnīnque tōmēnāni pōnīnque
mōnō tæiyæ waēmō oncō wo ēwēmainānīpa. Ayæ mōnō
ōmæ īñōmō mōnō quēwencabo incæ nāmā nē āmō īñō-
monte tōmēnāni pō ō ænte bai cædinque tōmēnānīque nē
ānāni babainānīpa, ānānitapa.

⁴⁹ Tōmēnāni weca adocanque Caiapato māniī wadepo,
Wængonguī quī, ante nē godongā ñænængā pōni ĩnongā
inte tōmengā īñōmō,

—Mīnitō tōmānō ante ēñēnāmaī ĩmīnīpa tōō,
apæ necantapa. ⁵⁰ Mōnō ōmæ quēwencabo wīi tōmāmō
wængæimpa, ante wæætē tōmēmō beyæ ante adocanque
onguīñængā wængā ĩnīnque godōmenque waa ĩmaimpa,
ante mīnitō ēñēnāmaī ĩmīni inte tedewēmīni awædō.

⁵¹ Mānōmaīnō ante apænedinque Caiapato mā nānō
pōnēnonque ante wīi angacāimpa. Wæætē tōmengā

māniī wadepo iñonte, Wængongui qui, ante nē godongä ñænængä pōni inongä inte Wængongui beyæ apæned-inque, Itota iñömö oodeoidi beyæ ante wæncæcäimpa, ante apænegacäimpa. ⁵² Ayæ wii Oodeabæ quëwënänique beyæ ante wænguingä. Wæætë, Wængongui wënäni wayömö wayömö pangote godinäni inte adodänique bad-inque adoyömö godongämæ poncædänimpa, ante tömengä wæncæcäimpa. ⁵³ Caiapato mäninö ante nänö äniönæ iñonte täno godongämæ pönëninque oodeoidi ömæ nāni Apænte Äincabo iñömö, Æbänö cæte Itota ingante wænömö wænguingää, ante cöwë tedewënönänimpa.

⁵⁴ Mänömaī beyæ Itota ayæ oodeoidi weca wii edonque gocä inongäimpa. Wæætë wadæ godinque tömengä önömæca eyequei Epadäimë nāni äñömö godinque māniñömö tömengä ëmiñænäni tönö ongönongäimpa.

⁵⁵ Wodo pänta gogaiönæ, ante Patowa nāni cæönæ oo pōni inönimpa. Māniñedë Oodeabæ wayömö wayömö quëwënäni nanguī inäni Eedotadëë quëwëñömö pö æid-inque tömënäni Patowa nāni ææmæ ayæ cædämaī iñedë dodäni angai bai cædinque, Mönö wënæ wënæ cægäinö ante mönö mënongate bai waëmö bacäimpa, ante nāmä incæ äacæte ante cædinque æi gogadänimpa. ⁵⁶ Adodäni Wængongui oncö ñænæncönë yabæcönë pö guidinque adiyæ gongæninque, Itota æyömönö ingää, ante pönente gomö adinque nāmäneque godongämæ apænedinque,

—Mäningä iñömö ææmæ beyæ ante edæ pönämaī ingantawo. Æbänö ante pönëminii, ante apænedönänimpa.

⁵⁷ Wængongui qui, ante godönäni ñænænäni tönö Paditeoidi wæætë waodäni inänite wææ änönänimpa. Æcänö Itota nänö a ongöñömö ante nē ëñengä iñömö tömengä mönitö imönite angä ëñëninque mönitö wæætë

Itota ingante yao ongonde ämaimönipa, ante do wææ änönänimpa.

12

*Awënë Itota önöwa ogui wapæ gao cæwacampa
(Mäateo 26.6-13; Mäadoco 14.3-9)*

¹Önompö ämæmpoque go adoönæque ate Patowa näni ämä bacæ cæyedë Itota Betänia iñömö pongantapa. Itota do angä ate në ñäni ömæmönningä Datado iñömö tömengä adoyömö Betänia quëwëningäimpa. ²Itota pongä adinque waodäni mäniñömö quëwënäni, Itota ingante waa amönipa, ante tömengä beyä äämæ cægadänimpa. Wadäni tönö Datado adobai Itota tönö godongämæ tä contate cænönänite Mäadota iñömö tömënäni inänite cængui godongä cänänitapa. ³Ayæ Mäadiya iñömö mëedio ditodo ganca näni ogui wapæ öni pæquimæ näadodopæ nänö nangui godonte änimæ incæ ænte mämö Itota önöwa gao cæwadinque tömengä ocagui inte amimö cæcä ïinque oncönë tömancönë ogui waacönë ingatimpa. ⁴Itota miñæ në gocä adocanque Codaa Ica-diotte näni änogä iñömö edæ, Itota ingante æncädänimpa, ante odömonte në godonguingä inte ñöwo wææ apænecantapa.

⁵—Ïimæ nänö ogui wapæ quinänte ömæpodäni beyä ante godonte änämaï ingantawo. Ïñæmpa waocä adoque wadepo cæte beyä paga äninque todetiento deënnadiota nänö änimpota beyä mänimæ godonte änimæ imæmpa, ante wæcantapa.

⁶Tömengä dicæ ömæpodäni beyä ante pönëninque mänömainö ante apænecantawogaa. Wæætë tömengä në awëmö änogä inte mäninö ante apænecantapa. Tömënäni da wente äintaa næänogä inte tömengä iñömö, Tömënäni da wëniinta incæ pancataa botö qui

bacäimpa, ante awëmö ænongä inte mänömaï apænecantapa. ⁷ Itota wæætë tömengä ingante,

—Onquiyængä ingante püinte änewënämaï incæbi-
impa. Mänimæ botö daga wenguïönæ ante manguënengä
inte tömengä botö baö näni daga wenguinque ante eyepæ
ĩñonte öni paacantapa. ⁸ Ömæpodäni cöwë minitö weca
quëwënäni inänipa. Botö guiquënë wii cöwë minitö weca
quëwëmo imopa, ante apænegacäimpa.

Datado ingante wænongæimpa, ante tedewënäni

⁹ Itota Betänia ponte ongongampa, ante apænedäni
ëñëninque oodeoidi nanguï inäni tömengä weca pönäni
incæte wii tömengä beyænque pönänintapa. Wæætë
adobaï Datado ingante angä në näni ömæmönningä in-
gante acæte ante pongadänimpa. ¹⁰ Mänömaï beyæ Wæn-
gonguï quï, ante në godönäni ñænænäni iñömö, Æbänö
cæte Datado ingante adobaï wænömö wænguingää, ante
godongämæ tedewënänitapa. ¹¹ Iñempa oodeoidi nan-
guï inäni, Datado beyæ mönitö imönite ëmö cæte Itota
ingante pönëninque tömengä gämænö godänipa, ante
wægadänimpa.

Itota Eedotadëë iñömö pongä

(Mäateo 21.1-11; Mäadoco 11.1-11; Odoco 19.28-40)

¹² Iimö ate, Eedotadëë iñömö poncæte ante Itota idömæ
pongampa, ante apænedäni ëñëninque æëmæ beyæ ante
tæiyænäni pöninäni iñömö, ¹³ yædëmæmäa wangö tate
mäo bee tente taodinqe yedæ aa pedinqe,

—Möni quëwenguinque ante, Badogaa, ante tomönipa.
Bitö Awënë Wængonguï ëmöwo beyænque pömi in-
inque bitö toquinque edæ Wængonguï bitö imite waa
cæcæcäimpa. Bitö idægoidi Awënë inömi inte bitö to-
quinque ingæimpa.

¹⁴ Ante yedæ aññonäni Itota iññömö bodo wengä ate æninqe tömengäa æi contate pongantapa. Wëññëñedë Wængonguï beyæ iïmaï ante näni yewæmonte angainö bai iinqe cædinque pongantapa.

¹⁵ “Tiöno iññömö quëwëmini iññömö edæ guiññënamai iedäni.

Minitö Awënë Odeye ñöwo minitö weca pongä aedäni.

Edæ bodo wengäa æi contate pongampa,”

ante yewæmongadänimpa. ¹⁶ Tömënäni dodäni näni angai bai cædinque Itota ingante bee tencæ taodäni adinque Itota nänö në ëmiññänäni iññömö, Æbänö cædänii, ante mäniñedë ëññënamai inte wædönänimpa. Wæætë edæ Itota Wængonguï ñäö ëmöññömö ocæ ëmænte gocä adinque tömengä ëmiññänäni mäniñedë ate edæ, Itota ingante waodäni ñöwo näni cædönö ante dodäni wëññëñedë yewæmongadänimpa, ante pönente wædönänimpa.

¹⁷ Datado wodi ontatodë ongöñongante Itota, Ta pöe, ante aa pecä ëññëninque në wæningä incæ ñäni ömëmöninque ta pongä adinque Itota weca godongämë ongöninäni nanguï inäni iññömö, Itota mänömaï cæcä atamönipa, ante gode ä gode ä cædönänimpa. ¹⁸ Ininque edæ, Itota mänömaï bamönengä cæcampa, ante apænedäni ëññente beyænque waodäni tæiyänäni Itota weca bee tencæ pönänitapa. ¹⁹ Mänömaï beyæ Paditeoidi iññömö nämanque godongämë tedewänänitapa.

—Waodäni tömänäni æbänö tömengä miññä tee empo godäni ante aedäni. Mäniï beyæ ante, Mönö cædinö wii eyepæ impa, ante adinque, Mönö æbänö cæte godömenque cæquimöö, ante wægadänimpa.

Guidiegoidi pancadäniya Itota ingante diqui minäni

²⁰ Eedotadëë iñömö tömënäni äämæ cæyedë Wængonguï ingante waa ate apænecæte ante nê pönäni pancadäniya iñömö guidiegoidi inönänimpa. ²¹ Mäniñäni iñömö Pedipe weca pöninque edæ,

—Awënë, ëñëmi. Mönitö Itota ingante ainëmönipa, ante änänitapa. Mäningä Pedipe iñömö Betaida quëwëñömö Gadideabæ quëwente pongä inongäimpa.

²² Tömengä iñömö Æntade weca gote tömengä ingante guidiegoidi näni äninö ante apænecä ate tömëna wæätë Itota weca guëa godinque tömengä ingante äñöna, ²³ Itota wæätë,

—Wængonguï nänö cæönæ do ba ininque tömengä pönö cæcä beyænque botö Waobo ëñagaïmo iñömö ñäö apäite ëmoncæboimpa. ²⁴ Minitö iminite näwangä ämopa. Tömëmö onguipo quiyadimö incæ yabæque ñömädämaï i bai ædö cæte tä bocate pædinque tömëmö nanguï pönï imonguïi. Wæätë tömëmö yabæque ñömäate ate tä bocate pædinque nanguï pönï imompa. Botö adobaï wænguënëmo imopa. Botö wii wæmo bai ædö cæte waodäni tæiyænäni botö quinäni baquinänii. ²⁵ Nê, Nämanque pönente quëwëmote, ante pönengä iñömö edæ tömengä nänö quëwenguimämo incæ wo ëwente bacæcäimpa. Inguipoga quëwëñedë nê, Wii nämanque pönente quëwëmote, ante pönengä guiquënë tömengä nänö wantæpiyæ quëwenguinö ante do ëadingä inte tömengä nänö wänämaï quëwenguinque gocæcäimpa. ²⁶ Æcänö botö imote nê cæda ina tömengä iñömö edæ botö imote tee empo goquënengä ingampa. Ayæ æyömönö botö quëwëmo botö imote nê cædongä adoyömö quëwencæcäimpa. Botö Mæmpo iñömö botö imote nê cædongä ingante waa acæcäimpa, ante Itota apænecäcäimpa.

Itota, Botö wæncæboimpa, ante apænecä

²⁷ Ayæ godömenque apænedinque Itota iïmai apæncantapa. “Botö guiñëmämo entawëninque wæbo inte quïnö anguïmoo. ‘Botö Mæmpo ëñëmi, äninque, Botö nantate wæwenguïönæ oo pönï ba incæte bitö pönö ö æmi ate wæwënämai bacæboimpa,’ ante botö wii mänömainö ante ancæboimpa. Edæ botö wæwenguïnö beyæ ante pontabopa. ²⁸ Mæmpo, Bitö æbänö ñäö apæite ëmömi imii, ante odömömi acædänimpa,” angantapa.

Äñongä öönædë inö tedepämo apænedinque, “Botö æbänö ñäö apæite ëmömo imopa, ante do odömöntabopa. Ayæ wæætë adodö cæcæboimpa,” ante apænecä ëñëñanitapa.

²⁹ Mäniñömö godongämæ ongönäni nanguï inäni iñömö mänimämo ëñëninque edæ, Detæbo täi tëmämo bai impa, ante wædänitapa. Wädäni guiquënë,

—Anquedo iñömö tömengä ingante apæncantapa, ante änänitapa.

³⁰ Itota iñömö wæætë,

—Mäniimämo wii botö beyæ ante apæncampa. Wæætë mïnitö beyæ ante apæncampa. ³¹ Ñöwoyedë Wængonguï inguipoga quëwënäni inänite apænte nänö panguinö iñömö edæ oo baquinö anguënë. Inguipogaque quëwënäni awënë iñongante wënæ ingante Wængonguï ñöwoyedë, Gobäwe, angä gocæcäimpa. ³² Botö imote awäa timpodinque ængæ gantidëñäni wægömo ate botö waodäni tömänäni inänite, Mïnitö botö weca poncæmïn-impä, ante aa pecæboimpa, ante Itota apæncantapa.

³³ Mänömainö ante apænedinque tömengä, Æbänö wænguïmoo, ante ëñencædänimpa, ante apæncantapa.

³⁴ Ëñëninque mäniñömö ongönäni nanguï inäni,

—Mönitö iñæmpa, Mönö Codito cöwë ee ongoncæcäimpa, ante dodäni näni wææ angainö ante yewæmonte ongompa, ante ëñentamönipa. Incæte bitö iñömö nämanque äninque, Botö Waobo ëñagäimo

iñömote botö imote awäa timpodinque gö cædäni wægonguimo imopa, ante ædö cæte ämii. Äninque, Ìngä Waocä nē ēñagaingä iñæmpa ee ongönämaï wænte goqingää.

³⁵ Ante wæyönäni Itota tömënäni inänite,

—Botö, Waodäni mïmönē ñäö bai entawëninque quëwencædänimpa, ante pontabopa. Wædænque ayæ iñö botö mïnitö weca quëwëninque mïnitö imïnite odömonte apænebopa. Mönitö taadö wëmö badämaï ingæimpa, ante mïnitö taadö ayæ ñäö iñedë goedäni. Edæ wëmö iñömö nē gocä iñömö tömengä edæ, Ædönö goboo, ante ēñenämaï ingampa. ³⁶ Botö ñäö bai ëmönömo imopa. Ñäö iñömö nē cægömöni incæmönimpa, ante bacæte ante cædinque mïnitö iñömö botö mïnitö weca ayæ ongönömote botö imote pönëedäni ämopa, angantapa.

Tömengä iinque apænete ate wadæ godinque wë wom-
onte ongongacäimpa.

Oodeoidi Itota ingante iïmaï cæte pönënëmaï inänipa

³⁷ Itota oodeoidi weca nanguï bamönengæ cæte odö-
mongä incæte tömënäni ayæ tömengä ingante pönënë-
maï inänitapa. ³⁸ Wængonguï beyæ nē apænecä Itaiya
wodi iïmaï ante do nänö angainö bai iinque baquinque
tömënäni mänömaï cædönänimpa.

“Awënë Wængonguï ēñëmi. Mönitö apænemöni
tömënäni nänï ēñënö ante edæ æcänö ēñente
pönengää. Ìñæmpa nē pönengä iñömö edæ dæ
angä awædö.

Ayæ Awënë Wængonguï nänö tæï piñænte cægainö ante
æcänö ada iñömö edæ dæ angampa.”

³⁹ Ìninque tömënäni ædö cæte pönenguinänii, ante Itaiya
wodi edæ wayömö yewæmöninque, Wængonguï iïmainö
ante cæcä beyæ pönënëni inänipa, ante yewæmon-
gacäimpa.

⁴⁰ “Tömënäni botö gämænö ocæ emænte pönäni bai botö wæätë, Waa bacæminimpa, ante godö cæcædömoimpa.

Incæte mänömaï cædämaï incæboimpa, ante Wængongui iïmaï cægacäimpa.

Tömengä godö cæcä beyænque waodäni babetamönäni bai adämaï bagadänimpa.

Adobaï mimönë näni pönënö ömæde badinque ëñënämaï bagadänimpa.

Edæ, Tömënäni näni adinö ante ëñënämaï incædänimpa, ante cædinque

ayæ edæ, Tömënäni näni ëñënö ante ëñënämaï incædänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö ñäö emömämo æbänö ingui, ante do ate bai ingaingä inte edæ Itota ingantedö ante mäninö ante doyedë angacäimpa.

⁴² Nöwo guiquënë oodeoidi awënëidi tæiyænäni Itota ingante pönëänimpa. Incæte Paditeoidi beyæ guiñënäni inte, Mönö odömöincönë go guiyömönite tömënäni mönitö imönite wii tatodoncædänimpa, ante wææ cædinque tömënäni në pönënäni incæ waodäni ëñëñönäni pæ wëenete tededämaï inänimpa. ⁴³ Edæ mäninäni, Waodäni mönitö imönite waa ate apæncædänimpa, ante nanguï aïnente wædäni inönänimpa. Adodäni, Wængongui mönitö imönite waa ate apæncæcäimpa, ante pönömenque aïnente wædäni inönänimpa.

Itota nänö änö beyænque waodäni apænte wæccædänimpa

⁴⁴ Itota yedæ äninque aa pecantapa. “Botö imote në pönengä iñömö wii botö adoboque imote pönëngä ingampa. Wæätë edæ botö imote në da pönongaingä ingante tömengä adobaï pönengä inongäimpa. ⁴⁵ Adocä botö imote në acä iñömö tömengä botö imote në da

pönongaingä ingante adobaï acä ingampa. ⁴⁶ Botö ïmote nē wede pönēnāni iñōnāni adocanque incæ wēmō iñōmō wīi godōmenque ee ongoncæcäimpa, ante cædinque botö iñōmō inguipoga quēwēnāni weca ñäö baï iñōmo inte pontabopa.”

⁴⁷ “Waocä botö änō ēñēninque wīi ēñente cæcä ingä incæte botö tōmengä ingante apænte änāmai ïmopa. Edæ botö wīi inguipoga quēwēnāni iñānite apænecæte ante pontabopa. Wæætē inguipoga quēwēnāni iñānite æmo beyænque quēwencæmīnimpa, ante pontabopa cæmīnii.

⁴⁸ Botö ïmote nē Baa angä iñōmō tōmengä botö änōnō ante, Dicæ pönēmogaa, angä iñongante tōmengä ingante nē apænte änō incæ edæ mä ongompa. Inguipoga iinque baquiönæ iñonte botö änīnō incæ nē apænte anguingä baï ba iinque mäningä ingante, Bitö pante wæquinque Baa angabiimpa, ante baï apænete ingäimpa. ⁴⁹ Edæ botö wīi nāmanque pönēninque apænetabopa. Wæætē, Botö quīnō apænequīmoo, ante, Æbänō ante apænequīmoo, ante botö Mæmpo botö ïmote nē da pönongaingä iñōmō tōmengä botö ïmote wææ angä ēñēninque apænetabopa.

⁵⁰ Tōmengä nänō wææ angainō ēñente cæbo beyænque mīnitō wantæpiyæ cōwē quēwencæmīnimpa, ante do ēñēmopa. Iinque botö Mæmpo botö ïmote nänō angainō ante botö adodö ante apænebopa,” ante Itota mäniñedē iinque apænegacäimpa.

13

Itota incæ tōmengä emiñænāni önōwa mēnōwacä

¹ Patowa nāni ämæ wantæyö bacäimpa, ante nāni cæyedē Itota iñōmō, Botö inguipoga quēwente emō cæte botö Mæmpo weca ocæ emænte æi goquiönæ do bacäimpa, ante do ēñēnongäimpa. Itota ingante pönēnāni nē inguipoga quēwēnāni iñōnānite tōmengä

tömənäni inänite waadete pönëninque ñöwoyedë,
Botö æbänö nangui waadete pönëmo imoo, ante
odömongäimpa.

² Gäwadecæ bayö Itota tömengä ëmiñænäni tönö
godongämæ cæñönäni wënæ awënë cæcä beyænque
Timönö wengä Codaa Icadiote iñömö, Itota ingante
odömonte godoncæboimpa, ante pönengä inongäimpa.

³ Itota iñömö, Quincoomë ongoncoo incæ Wængongui
pönö cæcä beyænque botö tömancoo awënë badinque
nämä tæi piñænte në ämo imopa, ante ëñënongäimpa.
Ayæ edæ Wængongui weca quëwente wææ pönimo inte
botö Wængongui weca ocæ ëmænte goquimo imopa,
ante do ëñënongäimpa. ⁴ Mäninö ante ëñënongä incæ
tömengä iinque cænte ate ængæ gantidique yabæcoo
gä tadongadinque wadæ caaincoo æninqe önoncadeyæ
inö goti padengantapa. ⁵ Ayæ ate æpæ mënongaquintadë
pe ñiñæninqe tömengä ëmiñænäni tömänäni önöwa
mënöwadinque wadæ caaincoo goti padëincoo inte wadæ
cæwacæ tæcæ cæcantapa.

⁶ Mänömai cædinque tömengä Timönö Pegodo weca
pongä adinque adocä iñömö tömengä ingante,

—Bitö botö Awënë ïmi incæte botö önöwa mënöwacæ
pömitawo.

⁷ Ante äñongä Itota wæætë,

—Ñöwoque botö æbänö cæboo, ante ëñënämai imipa.
Incæte ayæ ate ëñencæbiimpa.

⁸ Angä ëñëninque Pegodo,

—Botö önöwa cöwë mënöwadämai incæbiimpa, ante
Baa ämopa cæbii.

Ante äñongä Itota godömenque,

—Botö bitö önöwa mënöwadämai imo bai bitö wii botö
quimi imaimipa, ante angantapa.

⁹ Mäninö angä ëñëninque Timönö Pegodo wæætë,

—Awënë, Mänömaï i ïinque bitö wii botö önöwaque mënöwaquimi. Wæätë botö önompo adobaï mënompod-
inque botö ocabo mënoncae.

¹⁰ Ante ãñongä Itota wæätë,

—Æpæ në äadingä iñömö tömengä baö eñayö tömäñö
waëmö impa. Ìinque tömengä önöwaque nämanque
mënöwacä inte eyepæ impa. Minitö do mimö mënongate
waëmö entawënömini iminipa. Incæte wii tömämini
waëmö entawëmini iminipa, angantapa.

¹¹ Edæ, Æcänö botö imote në odömonte godongungä
ingää, ante tömengä do eñëngäimpa. Mänömaï beyæ
tömengä, “Minitö wii tömämini do mënongate waëmö
entawënömini iminipa,” angantapa.

¹² Ayæ tömënanï önöwa iinque mënöwadinque tö-
mengä yabæcoo wëñadinque tömengä adodö gote tæ
contadinque tömënanï inänite,

—Botö mänömaï cædinque minitö beyæ ante quinö
cæboo, ante eñëminitawo, ante äinque Itota godö-
menque, ¹³ Minitö botö imote, Në Odömömi imipa, än-
inque ayæ adobaï, Awënë imipa, ämini iminipa. Edæ
botö minitö Awënë inömo iinque minitö mänömainö
ante näwangä ante äminipa. ¹⁴ Botö iñömö minitö Awënë
inömo inte në minitö iminite Odömömo imo incæ minitö
önöwa do mënöwabo aminipa. Ìinque botö mänömaï
mënöwabo bai minitö adobaï wacä önöwa wacä önöwa
mënöwaquënemini iminipa. ¹⁵ Botö cæbo bai minitö
adobaï cæcæminipa, ante cædinque botö minitö beyæ
ante cæbo aedäni. ¹⁶ Minitö iminite näwangä ämopa.
Awënë ñænængä inongä iñongante tömengä ingante në
cæcä iñömö wii godömenque ñænængä ingampa. Awënë
në da godongä ñænængä iñongä tömengä nänö në da
godöningä wæätë wii godömenque ñænængä ingampa.
¹⁷ Minitö ñöwo mäninö ante eñënimini inte edæ ado ante

cæmīni īnīnque mīni toquinque bacæīmpa, ante Itota apænecantapa.

¹⁸ Ayæ apænedīnque, “Botö wīi tōmāmīni beyæ antabopa. Botö apænte ænīnāni ædānidö īnānīi, ante botö nē ēñēmo īmopa. Wængonguī angä ēñente nāni yewæmongainö bai īinque bacæīmpa, ante īīmaī bacæ cæpa. ‘Botö tönö godongāmæ nē cængongä īñömö botö īmote nē pīīnte cæcä bacantapa.’ ¹⁹ Mänömaī ba adīnque edæ mīnitö botö īmotedö ante apænedīnque, Tömengä mönö Codito īnongä ingampa, ante pönencæmīnīmpa, ante cædīnque botö ñöwo ayæ badāmaī īñedē mīnitö īmīnite ämopa. ²⁰ Mīnitö īmīnite nāwangä ämopa. Æcämenque botö nē da godongaingä ingante æna tōmengä īñömö edæ botö īmote adobaī ængä ingampa. Ayæ æcämenque botö īmote æna tōmengä īñömö botö īmote nē da pönongaingä ingante ængä ingampa cæmīnīi,” ante Itota apænegacäīmpa.

*Itota ingante Codaä nē godonguingä ingampa, ante
(Mäateo 26.20-25; Mäadoco 14.17-21; Odoca 22.21-23)*

²¹ Mänīnö angä ate Itota īñömö tōmengä nänö wæwēmāmo entawēnīnque wæcä inte, Nāwangä ante apænebo ēñēedāni. Mīni cabo incæ adocanque, Æncædānīmpa, ante botö īmote odömonte pædæ godonguingä ingampa.

²² Ante apænecä wædīnque tōmengä emīñænāni, Æcänö ingante apænecää, ante ēñēnāmaī inte godongāmæ wacä ingä wacä ingä adānitapa. ²³ Itota emīñænāni adocanque īñömö Itota nänö nē waadete pönengaingä īnongäīmpa. Tömengä īñömö Itota tönö äänömonque tæ contate ongönāīmpa. ²⁴ Timönö Pegodo īñömö īingä ingante ömö ömö cædīnque angampa. Bitö Itota ingante, Æcänö ingää, ante ämī angä ēñente ate

apænebi eñëmönie. ²⁵ Angä eñëninque mäningä Itota tönö äänömonque në tæ contacä iñömö,

—Awënë, æcänö ingää, ante apænebi eñëmönie, ante tömengä ingante äñongä.

²⁶ Itota wæætë,

—Botö iï päö owætaca miï cæte godömo në ænguingä iñömö tömengä në cæquiringä ingampa.

Ayæ päö owætaca miï cædinque Timönö wë Codaa Icadote ingante godongantapa. ²⁷ Codaa päö ængä ate Tatäna iñömö tömengäa do guiigacäimpa. Ìninque tömengä ingante,

—Bitö quïnö cæcæ cæbii edæ quingæ cæe, ante Itota angantapa.

²⁸ Wadäni adoyömö në cænäni iñömö, Itota quïnante mäninö ante tömengä ingante angää, ante eñënamäi inönänimpa. ²⁹ Edæ Codaa tömënäni da wente äinta näæñongä ingä beyæ tömënäni pancadäniya, Ææmä beyæ ante mönö cænguï wii eyepæ äamöni ìninque, Bitö godonte æncæbiimpa, ante Itota angampa, ante pönënönänimpa. Adobaï ömæpodäni inänite, Godömi ænguïnänimpa, ante Itota angampa, ante pönënönänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinque Itota,

—Botö Waobo eñgaïmo inte æbänö ñäö apäite emönömo imoo, ante ñöwo edonque bacäimpa. Botö cæquinö beyæ Wængonguï æbänö ñäö apäite emongä ingää, ante edonque bacäimpa. ³² Ayæ botö cæquinö beyæ Wængonguï ñäö apäite nänö emönö edonque ba ìninque Wængonguï cæcä ate botö ñäö apäite botö emönö adobaï edonque bacäimpa. Ayæ mänömaï Wængonguï wantæyö cæcæcäimpa. ³³ Botö wëmini botö minitö weca

wantæyö quëwëninque gobopa. Minitö botö imote ante diqui diqui minguimîni imînipa. Ayæ oodeoidi inänite botö angainö bai ñöwo minitö imînite adodö ämopa. Botö goquiñömö ante minitö ædö cæte ponguimîni imîinii. ³⁴ Botö wææ änönö ante ñöwo minitö imînite ämopa. Wacä ingä wacä ingä waadete pönencæmînipa. Botö minitö imînite waadete pönënömo bai minitö adobai wacä ingä wacä ingä waadete pönenguënëmîni imînipa. ³⁵ Minitö wacä ingä wacä ingä waadete pönëmîni adinque wadäni tömänäni, Minitö Itota nänö nê ëmîñæmîni imînipa, ante ëñencædänimpa, ante Itota apænægacäimpa.

Pegodo incæ, Dicæ abogaa, anguingä ingampa, ante (Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante añongä Itota wæætë,

—Botö goquiñömö ante bitö ædö cæte botö imote ñöwo tee empo ponguimi imii. Ayæ ate guiquënë bitö botö imote tee empo ponguimi incæbiimpa, angantapa.

³⁷ Pegodo godömenque,

—Awënë, äninque, Botö quïnante bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wænguimo imopa.

³⁸ Ante añongä Itota wæætë,

—Bitö Ao äninque botö beyæ ante näwangä wænguimi imiyaa. Bitö imite näwangä ante apænebo ëñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguimi imipa, ante apænægacäimpa.

14

Mæmpo weca mönö godö ante Itota taadö bai ingampa

¹ Itota tömengä emiñænäni inänite, “Mimönë guiñente wädämaï iedäni. Wæætë Wængongui ingante wede pönëedäni, angantapa. Ayæ adobaï botö imote wede pönëedäni. ² Botö Mæmpo nänö quëwëñömö onconcoo bacoo pönï mä ongompa. Mänömaï impa, ante wii näwangä i bai botö mīnitö imīnite ancædömoimpa. Mīnitö beyæ ante botö, Mīni ponte quëwenguï onconcoo ante tömäa ædæmö badoncæte ante mäniñömö gocæboimpa. ³ Ayæ mīnitö quëwenguï onconcoo tömäa ædæmö mänoncæte ante gobo inique botö ocæ emænte poncæboimpa. Pöningue mīnitö botö quëwëñömö adoyömö botö tönö godongämæ quëwencæmīnimpā, ante botö mīnitö imīnite ænte mäibo æicæmīnimpā. ⁴ Botö goquiñömö æyömönö i, ante ayæ mäniñömö gocæte ante taadö godö ante mīnitö do ëñëmīnīpa,” ante Itota apænecantapa.

⁵ Apænecä ëñëningue Tömato iñömö tömengä ingante, —Awënë, Ædömë goquimii, ante mönitö ëñënamäi imöni inte mönitö mäninö bitö goquinö ædönö i, ante taadö ædö cæte ëñënguimönii.

⁶ Äñongä Itota wæætë,

—Botö iñömö tömëmo në taadömo bai inömo imopa. Ayæ botö adobo në näwangä änö bai inömo bai iñömote mīnitö æbänö näwangä impa, ante ëñënguimīni imīnīpa. Botö edæ në Quëwëmo inte pönö cæbo beyænque mīnitö quëwenguimīni imīnīpa. Botö wii pönö cæbo bai waocä æcämenque incæ botö Mæmpocä weca godämaï incædongäimpa. ⁷ Botö imote do ate pönëmīni inique mīnitö botö Mæmpo ingante adobaï ate pönëmīni imāimīnīpa. Nöwo tömengä ingante tæcæ ate bai pönëmīni inte mīnitö tömengä ingante cöwë në agaimīni incæmīnīpa, ante apænecantapa.

⁸ Mäninö apænecä ëñëningue Pedipe iñömö,

—Awënë, Mæmpocä ingante odömömi amönie. Män-
inque adinque idæwaa. Eyepæ impa.

⁹ Äñongä Itota wæætë,

—Pedipe ëñëmi. Botö mīnitö weca wantæpiyæ
quëwëmo incæ bitö ayæ botö imote adāmaï inte bai
pönënamāï imitawo. Në botö imote acä iñömö tömengä
adobai Mæmpocä ingante në acä ingampa. Ininque
bitö iñömö, Mæmpocä ingante odömömi amönie, ante
ædö cæte botö imote ämii. ¹⁰ Wæmpocä nempo botö
në quëwëmo imopa, ante ayæ, Wæmpocä ingante botö
entawëmo imopa, ante bitö pönënamāï imitawo. Botö
mīnitö imīnite, Æbänö apæneboo, ante wīi nämanque
pönëninque apænebopa. Wæætë botö Wæmpocä incæ
botö tönö në äawocaque bai quëwëmongä inte edæ tö-
mengä nänö cædö ante në cæcä ingampa. ¹¹ Tömengä
nempo quëwëmo imopa, ante ayæ, Tömengä ingante botö
entawëmo imopa, ante mīnitö imīnite apænebo ëñën-
inque pönëedäni. Wæætë edæ mīnitö botö änö beyænque
ayæ pönënamāï imīni incæte botö bamönengæ nanguï
cædinö adinque mäninö beyænque pönëedäni. ¹² Mīnitö
imīnite näwangä ämopa. Botö imote në wede pönengä
iñömö tömengä botö cæbai adobai cæcæcäimpa. Ayæ
botö Mæmpocä weca ocæ ëmænte gobo beyæ në wede
pönengä iñömö edæ wīi önonque botö cæbai cædinque
godömenque cæquingä ingampa. ¹³ Mīnitö botö ëmöwo
ante apænedinque quïëmë æncæte ante apænemīni ëñën-
inque botö Wængonguï Wëmo inömo inte edæ, Mæmpocä
nänö ñäö ëmömämo edonque pönī acædänimpa, ante
cædinque mīnitö änö bai edæ do cæcæboimpa. ¹⁴ Mīnitö,
Ænguimöni, ante quïëmë beyæ ante botö ëmöwo ante
botö imo apænemīni ëñëninque do cæcæboimpa, ante
Itota apænëgacäimpa.

Wængongui Tæiyæ Waëmö Önöwoca poncæcäimpa, ante

¹⁵ Ayæ godömenque apænedinque Itota iïmaï ante apænecantapa. “Minitö botö ïmote waadete pönëmini ïninqe botö wææ angainö ante ëñente cæquimini iïmaïminipa. ¹⁶ Ayæ, Wacä botö beyæ ante minitö tönö godongämæ cæqingä, ante botö iñömö botö Mæmpocä ingante, Da godömi gocæ, ante apænecæboimpa. Ayæ tömengä botö änö ante do ëñente cædinque edæ, Tömengä minitö tönö cöwë ongonte godongämæ cæcæcäimpa, ante cædinque adocä ingante minitö weca da pönongä ponguingä ingampa. ¹⁷ Wængongui në nö cæcä ingampa, ante näwangä impa, ante Wængongui Tæiyæ Waëmö Önöwoca incæ në odömongä ïnongä ingampa. Incæte waodäni në inguipogaque quëwënäni iñömö tömengä ingante adämaï ïnäni inte pönënämaï ïnönäni inte edæ ædö cæte tömengä ingante Ao ante ænguïnäni. Wæatë edæ tömengä minitö weca quëwënongå iñongante minitö tömengä ingante në entawenguimini inte tömengä ingante do ate bai pönëmini ïminipa,” ante Itota apænecantapa.

¹⁸ Ayæ apænedinque, “Botö wii minitö nöwamini bai mini baquinque ante edæ ëmö cæte goquimo ïmopa. Wæatë minitö weca ocæ ëmænte poncæboimpa. ¹⁹ Wantæ ate waodäni në inguipogaque quëwënäni iñömö edæ botö ïmote adämaï inguïnäni ïnäni. Minitö guiquënë botö ïmote aquimini ïminipa. Edæ botö quëwëmo beyænque minitö adobai quëwencæminipa. ²⁰ Ayæ Wængongui Tæiyæ Waëmö Önöwoca nänö ponguïönæ iñonte minitö iñömö edæ, Mönö æbänö äanque bai quëwëmö ïmöö, ante ëñencæminipa. Edæ, Botö Mæmpocä nempo quëwëmo ïmopa, ante ayæ edæ, Minitö botö nempo quëwëmini ïminipa, ante ayæ, Minitö ïminite adobai botö entawëmo quëwënömini ïminipa, ante minitö ëñencæminipa. ²¹ Æcänö botö

wææ angainö ö æninque ëñente cæda tömengä iñömö botö imote nê waadete pönengä ingampa. Botö imote nê waadete pönengä ingante botö Mæmpo näëmæ waadete pönencæcäimpa. Ayæ botö adobaï mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

²² Codaa iñömö edæ wii Codaa Icadiote wacä Codaa iñömö edæ Itota ingante apænecantapa.

—Awënë iñæmpa bitö mönitö imönite apænedinque, Botö æbänö imoo, ante odömömo acæminimpa, äñinque quinante wæætë, Inguipogaque quëwëñäni inänite odömönämaï incæboimpa, ante pönëninque cæbitawo, angantapa.

²³ Itota wæætë,

—Waocä botö imote nê waadete pönengä iñinque tömengä iñömö botö odömönte apænedö ante ëñente cædongä imaingampa. Botö Mæmpo adocä ingante waadete pönengüingä ingampa. Ayæ mönatö tömengä tönö cöwë godongämæ quëwencæte ante tömengä weca ponguimöna imönapa. ²⁴ Botö imote nê waadete pönëñämaï ingä guiquënë tömengä iñömö botö odömönte apænedönö ante ëñëñämaï cædongä ingampa. Mäninö botö odömönte apænebo mini ëñëñinö iñömö wii botö nämä pönëninque apænedinö impa. Wæætë botö imote nê da pönongaingä nänö angainö impa, ante Itota apænecantapa.

²⁵ Ayæ apænedinque, “Minitö weca botö quëwëñedë botö mäninö ante minitö iminite apænetabopa. ²⁶ Botö Mæmpocä botö ëmöwo beyæ ante tömengä Tæiyæ Waëmö Öñowoca ingante da pönongä pongüingä inte tömengä minitö tönö godongämæ nê cædongä ingampa. Adocä minitö iminite tömänö ante odömönte apæneçä ëñencæminimpa. Ayæ botö apænedö mini

ëñëninö tömänö ante tömengä adodö apäñecä wæætë pönencæminimpa,” ante Itota apäñecantapa.

²⁷ Ayä apäñedinque, “Botö pönö cæbo beyænque mīnitö gänë entawente quëwëedäni, ante pönö cædinque gobopa. Botö gänë entawëmämo incæ mīnitö imīnite pönömo äñinque mīnitö gänë pönente quëwencæmīn-impä. Botö inguipogaque quëwënäni näni godönö bai wīi pönömo imopa. Nö cæte pönömo imopa. Mīnitö mīmönë guññente wädämaī inte piyänë cæte quëwencæminimpa.

²⁸ Botö mīnitö imīnite ëmö cæte godinque mīnitö weca ocä ëmænte poncæboimpa, ante botö apäñebo ëñëmīnitapa. Botö edæ, Botö Mæmpocä weca gocæboimpa, ante apäñebo ëñëñimīni inte mīnitö botö imote waadete pönëmīni iminque botö beyä ante watapæ tobaiminipa. Edæ botö wīi botö Mæmpo bai inömo inte wädämo inömo imopa. ²⁹ Mänömaī iinque ba adinque mīnitö, Näwangä impä, ante pönencæminimpa, ante botö ñöwoque ayä badämaī iñedë mīnitö imīnite apäñetabopa,” ante Itota apäñecantapa.

³⁰ Ayä apäñedinque, “Ïi inguipogaque quëwënäni awënë iñömö wënæ inongä inte oo poncæ cæcampa. İinque botö mīnitö imīnite wīi wantæpiyä ayä apäñebopa. Edæ tömengä ædö cæte botö imote nämä tæi piññente në angä inguingä. ³¹ Incæte botö, Waodäni inguipogaque quëwënäni iñömö iimaī ante ëñencædänimpa, ante cæbopa. Botö Mæmpo ingante botö waadete pönëmopa, ante ayä, Botö Mæmpo botö imo wææ angä bai botö adodö cæbo imopa, ante tömënäni ëñënguënänäni inänipa,” ante Itota iinque apäñegacäimpa.

Ayä, “Ñöwo edæ ængä gantidinque mönö gocäimpa,” angacäimpa.

15

Itota näwä yowementa bai ingampa

¹ Ayæ godömenque apænedinque Itota iïmai apænecantapa. “Botö näwä yowementa bai imopa. Ayæ botö Mæmpo yowementa në aacä bai ingampa. ² Botö imote pönänäni tömänäni iï yowementa gædëmænto bai inänipa. Æcänö wii botö ëmiñængä bai cæda tömengä iñömö gædëmænto ömæcato bai ingampa. Botö Mæmpo gædëmænto ömæcato bai iñongante wangö topænte bai cædinque tömengä ingante wido cæcampa. Æcänö botö ëmiñængä bai cæda guiquënë tömengä gædëmænto tömenca incato bai ingampa. Gædëmænto tömenca incato incæ godömenque waa pædinque nanguï incacæïmpa, ante wææ topæ wææ topæ cædäni bai botö Mæmpo iñömö adobai cæcampa. Botö në ëmiñængä wii eyepæ cæcä adinque tömengä ingante wadæ cæcampa. ³ Botö änö ante minitö iminite botö apænedinö beyæ minitö mimönë do mënongate quëwëmini iminipa. ⁴ Minitö botö nempo ee quëwënömini incæminipa. Ayæ adobai minitö botö imote cöwë entawente quëwënömini iminipa. Gædëmænto yowementa adoyömö ibænte odæ yate bai pæte incate bapa. Edæ gædëmænto adotoque iñonte ædö cæte nämä cædinque incaquintoö. Minitö iñömö, Tömenca incate bai mönö nanguï cæcæïmpa, ante cædinque botö nempo ee quëwenguënëmini iminipa,” ante Itota apænecantapa.

⁵ Ayæ apænedinque, “Botö yowementa bai imopa. Minitö guiquënë gædëmænto bai iminipa. Waocä botö nempo ee quëwëngä inte ayæ botö imote cöwë entawëngä ingä ininque tömengä tömenca incate bai nanguï cæbaingampa. Wæætë edæ botö nempo quëwënamäi imini ininque minitö tömää cædämai imaïminipa töö. ⁶ Në botö nempo ee quëwënamäi ingä iñömö tömengä

gædēmænto nāni wido cædinto bai ingampa. Māninto amimō bayonte gæte māmō gongapamō ñō cædāni wo bæco bai cædinque tōmengā ingante botō Mæmpo adobai wido cæcā ingampa,” ante Itota apænecantapa.

⁷ Ayæ apænedinque, “Mīnitō guiquēnē botō nempo ee quēwēninque botō angainō ante ee entawente quēwēmīni īninque mīnitō quiēmē æncæte ante āinēmīni incæ Wængonguī ingante apænemīni inte tōmengā wæætē pōnongā æmāimīnīpa. ⁸ Mīnitō nanguī pōnī tōmenca incate bai imīni inte, Mīnitō botō ēmīñæmīni imīnīpa, ante edonque pōnī ingæimpa. Mānōmai cæmīni īninque, Botō Mæmpo ñāō apāite ēmōnongā ingampa, ante odōmonte ingæimpa. ⁹ Botō Mæmpo īñōmō botō imo waadete pōnengā ingaingā bai botō adobai mīnitō imīnite waadete pōnēmo intabopa. Botō nē waadete pōnēmo īñōmote mīnitō īñōmō botō nempo ee ongōedāni. ¹⁰ Botō Mæmpo nē waadecā īñongante botō tōmengā nānō wææ angainō ante ēñente cædīmo inte tōmengā nempo ee ongōmopa. Mīnitō adobai botō nē waadete pōnēmo īñōmote mīnitō botō wææ angainō ante ēñente cæmīni īninque edæ botō nempo ee ongōmīni imāimīnīpa,” ante Itota apænecantapa.

¹¹ Ayæ apænedinque, “Botō watapæ topāmo ante mīnitō mīmōnē entawēninque watapæ tocæmīnīmpa, ante ayæ, Mīni watapæ topāmo eyepæ ingæimpa, ante botō mīnitō imīnite mānīnō ante apænetabopa. ¹² Botō wææ ānō īñōmō īmaī ante impa. Mīnitō imīnite botō waadete pōnēnīnō bai mīnitō adobai wacā ingā wacā ingā waadete pōnēedāni. ¹³ Æcānō nānō æmigoidi beyæ ante, Botō Ao āninque nāmā incæ tōmēnāni beyæ ante wænguīmo, ante cæcā īñōmō tōmengā nānō waadete pōnēmāmo wīi waodāni tōmānāni waadete pōnēmāmo bai impa. Tōmengā īñōmō edæ godōmenque nanguī waadete pōnengā ingampa. ¹⁴ Mīnitō botō wææ angainō

ēñente cæmīni ininque botō guidēmīni imaīmīnīpa. ¹⁵ Mīnitō botō imo nē cædōmīni imīnīpa, ante botō mīnitō imīnite godōmenque apænedāmaī imopa. Edæ awēnē ingante nē cæcā iñōmō, Awēnē æbānō cæcāā, ante ēñēnāmaingā ingampa. Wæætē edæ botō Mæmpo nānō angainō ante botō ēñēninō tōmānō ante mīnitō imīnite apænebo ēñēmīni beyæ botō, Mīnitō botō guidēmīni imīnīpa, ante apænedīmo imopa. ¹⁶ Mīnitō wīi botō imote apænte ænimīni imīnīpa. Wæætē botō iñōmō, Mīnitō botō emīñæmīni inōmīni inte tōmenca nanguī incate baī nanguī cæcæmīnīpa, ante mīnitō imīnite apænte ænīmo imopa. Mīnitō botō emīñæmīni inōmīni inte cōwē cæmīni ininque mīnitō quiēmē ante botō emōwo beyænque apænemīni ēñēninque Mæmpocā iñōmō do pōnongā æncæmīnīpa. ¹⁷ Botō wææ ānō iñōmō īmaī ante impa. Mīnitō wacā ingā wacā ingā waadete pōnēdāni,” ante Itota apænegacāīpa.

Inguipogaque nē quēwēnāni Itotaidi inānīte nāni pīimāmo

¹⁸ Mānōmaīnō ante apænedīnque Itota godōmenque īmaī ante apænecantapa. “Inguipogaque nē quēwēnāni iñōmō mīnitō imīnite pīināni adīnque mīnitō guīñēnāmaī inte edæ, Itota ingante do pīingadānīpa, ante pōnēmīni imīnīpa. ¹⁹ Waodāni nē inguipogaque quēwēnāni nāni cabo wacā ingā wacā ingā waadete pōnēnāni inānīpa. Mīnitō inguipogaque nāni quēwencabo tōnō adomīni imīni baī tōmēnāni mīnitō imīnite adobaī waadete pōnencædōnānīpa. Wæætē mīnitō inguipoga nāni quēwencabo tōnō adomīni ināmaī imīnīpa. Ināmpa wēēnēnedē mīnitō inguipoga quēwēñōmīnite botō do mīnitō imīnite apænte æntabopa. Mānōmaī beyæ nē inguipogaque quēwēnāni iñōmō mīnitō imīnite pīināni inānīpa. ²⁰ Botō ānō ante mīnitō imīnite, Æbānō apæneboo, ante ñōwo wæætē pōnēdāni. ‘Awēnē ñænængā

inongä iñongante tömengä ingante nē cæcä iñömö wii godömenque ñænængä ingampa.’ Waodäni botö imote piinani wæwëmo bai minitö iminite adobai piinani wæwëmini incæminimpa. Botö odömonte apænegaïnö ante ëñente cædäni bai minitö odömonte apænedö ante adobai ëñente cæcædänimpa. ²¹ Minitö botö quimini iñöminite edæ botö ëmöwo beyænque iinani, Botö imote nē da pönongaingä, Æbänö ingää, ante ëñenämai inäni inte mänömai edæ cæquinäni inänipa,” ante Itota apænecantapa.

²² Ayæ apænedinque, “Botö tömënäni inänite wii ponte apænebo bai tömënäni nani wentamö mongænguimämo mongænämai incædönänimpa. Nöwo iñömö, Botö apænebo nē ëñëninäni inte tömënäni nani wentamö mongämämo do mongænänipa. Iñampa Itota apænecä ëñenämai imönipa, ante ædö cæte anguinäni. ²³ Botö imote nē piingä iñömö tömengä adobai botö Mæmpocä ingante piingä ingampa. ²⁴ Wacä, Botö bamönengæ botö cæbai adobai cæcä iñömö cöwë dæ angampa. In-
inque botö wii tömënäni weca bamönengæ cæbo bai tömënäni nani wentamö mongænguimämo mongænämai incædönänimpa. Incæte, Botö æbänö cæboo, ante do adäni incæ tömënäni botö imote piiniqua botö Mæmpo ingante adobai piinänitapa. ²⁵ Dodäni nani wææ yewæ-mongaintaa yewæmöninque iimäi ante nani apænegaïnö bai ñöwodäni nani cædö beyæ edæ iinque batimpa. ‘Botö imote önonque piinänitapa,’ ante yewæmongadänimpa,” ante Itota apænecantapa.

²⁶ Ayæ apænedinque, “Botö edæ botö Mæmpo weca ocæ ëmænte gote ate minitö beyæ ante minitö tönö godongämæ cæquingä ingante da pönoncæboimpa. Män-
ingä iñömö Wængongui Tæiyæ Waëmö Önöwoca inongä inte edæ, Æbänö näwangä i, ante apænecä ëñencæmin-

impa. Tömengä botö Mæmpo weca quëwente ponguingä ingampa. Pöninque tömengä, Botö æbänö cæboo, ante apæ necä ëñencæminimpa. ²⁷ Minitö adobaï wëenëñedë botö mä cæyedë do botö miñæ godimini imini inte edæ, Botö æbänö cæboo, ante apænequënëmimi iminipa,” ante Itota tömengä nänö në emiñænäni inänite apænegacäimpa.

16

¹ Godömenque apænedinque Itota iïmai apænecantapa. “Minitö oda cædämai täi gongænte ongoncæminimpa, ante cædinque botö minitö iminite mäninö ante tömänö apænetabopa. ² Minitö odömöincönë go guiyöminite wadäni, Mönitö tönö godongämæ ongönämai iedäni, ante minitö iminite tatodönäni gocæminimpa. Wii mäninonque cæquinänimpa. Wæætë iincayæ ate æcæmenque minitö iminite në wænonguina ina iñömö tömengä, Botö Wængongui nänö cædö ante cæbopa, ante pönencæcäimpa. ³ Botö Mæmpo ingante wii adinque pönenämai inäni inte ayæ botö imote adämai inte bai pönenämai inäni iñömö tömënäni iñömö minitö iminite mäninö cæquinäni inänipa. ⁴ Edæ mäniönæ bayonte minitö, Botö wææ angäinö ante æbänö ämo, ante wæætë pönencæminimpa, ante botö minitö iminite mäninö ante do apænetabopa,” ante Itota apænegacäimpa.

Wængongui Tæiyæ Waëmö Önöwoca nänö cædö

Ayæ godömenque apænedinque Itota iïmai apænecantapa. “Minitö tönö wëenëñedë godongämæ ongömo beyæ botö mäninö ante mäniñedë apænedämai intabopa. ⁵ Botö imo në da pönongaingä weca botö ñowo pöni ocæ emænte goquimo incæte, Bitö æyömönö goquimi, ante minitö tömämimi botö imote änämai iminipa. ⁶ Botö mäninö ämo beyæ minitö nangui

pöni wæwëmini iminipa. ⁷ Incæte botö minitö iminite näwangä ämopa. Minitö beyæ waa ingäimpa, ante botö goquimo imopa. Botö wadæ godāmaī imo bai minitö tönö godongämæ nē cæqingä iñömö minitö weca pönāmaī incædongäimpa. Wæætē edæ cōwē goquimo inte godinque botö tömengä ingante minitö weca da pönömo ponguingä ingampa. ⁸ Pöningue Wængonguī Tæiyæ Waëmö Önöwoca cæcä beyænque inguipogaque quëwënäni, Mönö wënæ wënæ cædömö inte wentamö mongämö awædö, ante wæcædänimpa. Ayæ tömengä cæcä beyænque, Wængonguī weca æcänö nö cæte quëwëna ina, ante ëñencædänimpa. Ayæ Wængonguī apænte ante pancæcäimpa, ante adobai ëñencædänimpa. ⁹ Edæ botö imote nāni pönënāmaī inö beyænque inguipogaque quëwënäni iñömö edæ, Mönö wënæ wënæ cædonque ante cædinque pönënāmaī imopa, ante wæcædänimpa, ante adocä cæcæcäimpa. ¹⁰ Ayæ edæ, Botö iñömö botö Mæmpo weca gote quëwëñömote minitö botö imote adāmaī inguimini iminipa. Inique botö Mæmpo weca gote quëwëmo beyæ Wængonguī Tæiyæ Waëmö Önöwoca incæ, Æbänö nö cæte quëwenguīi, ante inguipogaque quëwënäni inänite odömonte apænecä ëñencædänimpa. ¹¹ Ayæ inguipogaque quëwënäni awënë iñongante wënæ ingante Wængonguī, Botö pancæboimpa, ante do apænte angacäimpa, ante Wængonguī Tæiyæ Waëmö Önöwoca godö odömonte apænecä beyænque ëñencædänimpa,” ante Itota apænecantapa.

¹² Ayæ apænedinque, “Botö minitö iminite nanguī ayæ apæneinente wæbo incæte minitö ñöwo ganca ædö cæte ëñenguimīni. ¹³ Wængonguī Tæiyæ Waëmö Önöwoca pongä ate tömengä iñömö, Æbänö näwangä impa, ante tömänö ante minitö iminite odömonte apænecä

ẽñencæminimpa. Adocä, Æbänö apænequimoo, ante wii nämä pönëningue apænegacäimpa. Wæætë Wængongui tõmengä ingante angä nänö ẽñëninö ante Wængongui Öñowoca iñömö mäninonque ante minitö iminite odömonte apænegä ẽñencæminimpa. Ayæ, Ìncayæ ate æbänö baquiï, ante tõmengä minitö iminite apænegä ẽñencæminimpa. ¹⁴ Botö æbänö ñäö apäite emönömo imopa, ante edonque pönï bacäimpa, ante cædinque tõmengä iñömö botö entawënö ante minitö iminite odömonte apænegä ẽñencæminimpa. ¹⁵ Botö Mæmpo nänö ëadoncoo iñömö edæ tõmancoo botö quincöo impa. Mänömaï beyæ iïmaï apænetabopa. Tömëmo entawencöo ante Wængongui Öñowoca iñömö minitö iminite odömonte apænegä ẽñencæminimpa, ante apænetabopa,” angantapa.

¹⁶ “Ayæ wantæ ate minitö botö imote adämaï inguimini iminipa. Ayæ ate wantæyö iñonte botö imote wæætë acæminimpa,” ante Itota apænegacäimpa.

Mini wæwëmämo incæ wæætë mini toquinque bacäimpa

¹⁷ Tömengä emiñænäni pancadäniya nämanque godongämæ apænedinque,

—Mäninö äninque tõmengä, Minitö wantæ ate botö imote adämaï inguimini iminipa, ante æbänö ancæte ante apænegä, ante wædänitapa. Ayæ, Wantæ iñonte minitö botö imote wæætë acæminimpa, ante ayæ, Botö Mæmpo weca gote quëwëmo beyæ impa, ante Itota apænegä awædö, ante apænedänitapa. ¹⁸ Tömënäni wæætë wæætë, Mäninö tõmengä, Wantæyö, ante nänö änö iñömö edæ æbänö ante apænegä, ante wædänitapa. Tömengä æbänö ancæte ante apænegä, ante ẽñënämaï imönipa, ante wædänitapa.

¹⁹ Tömënanï mäninö ante pönëningue botö imote ëñencæte ante äinënänï inänipa, ante wædinque Itota tömënanï inänite,

—Wantæ ate mïnitö botö imote adämaï inguimïni iminipa, ante botö änö ante ayæ, Wantæyö iñonte mïnitö botö imote wæætë acæminimpa, ante botö æbänö ämoo, ante mïnitö nämanque godongämæ tedemïnitawo. ²⁰ Mïnitö iminite näwangä ämopa.

Inguipogaque quëwënänï iñömö watapæ toyönänï mïnitö caate wæquimïni inte Ca ca wæcæminimpa. Mïnitö wæwenguimïni iminipa. Incæte mïni wæwëmämo incæ mïni toquinque bacæimpa. ²¹ Onquiyængä iñömö tömengä wëñæ ëñacæ cæyedë nanguï nantate wæcä inte wæwengä bacä incæte tömengä wëñæ ëñacä adinque tömengä, Botö wë ëñacä ingampa, ante watapæ tote beyæ tömengä nänö wædinö ante edæ pönënamäi ingampa.

²² Mïnitö tömengä bai adobaï iminipa. Nöwoyedë mïni caate wæyedë impa. Incæte botö wæætë mïnitö iminite aquïmo imopa. Mänömaï beyæ mïnitö watapæ tocæminimpa. Mäniñedë, Mïnitö todämaï incæminimpa, ante æcämenque incæ wææ cädämaï incæcäimpa.

²³ Godömenque apænedinque Itota, “Mäniñedë mïnitö botö imote, Æbänö i, ante ëñencæte ante godömenque änämaï incæminimpa. Mïnitö iminite näwangä ämopa. Botö Mæmpo ingante mïnitö quiëmë æncæte ante botö ëmowo ante apæneyömïni tömengä iñömö do pönongä æncæminimpa. ²⁴ Nöwo ganca mïnitö quiëmë æncæte ante botö ëmowo ante apænedämaï inïmïni iminipa.

Nöwo iñömö edæ, Pönömi æmönïe, ante Wængonguï ingante apæneedäni. Apænemïni ëñëningue tömengä pönongä ænningue mïnitö eyepæ pönï mïni watapæ toquinque ænguimïni incæminimpa,” ante Itota apæne-gacäimpa.

Itota në täi ëmönongä ingampa

²⁵ Mänömainö ante apænedinque Itota iïmai apænecantapa. “Minitö iminite inguipoga quëwënäni nani cæbainö ante odömonte apænedimo incæte botö wantæyö baquiönæ iïnque bayonte mänömainö ante godömenque odömonte apænedämai incæboimpa. Wæætë botö tömëmo Mæmpo ingantedö ante apænedinque minitö iminite edonque pöni apæneçæboimpa. ²⁶ Mäniönæ minitö botö Mæmpo ingante botö ëmowo beyænque apænequimini iminipa. Iïnque botö, Minitö beyæ ante botö Mæmpo ingante apænequimo imopa, ante mänömai beyæ botö änämai imopa. ²⁷ Edæ botö Mæmpo incæ minitö iminite waadete pönengä ingampa. Botö imo waadete pönëninque minitö iïnömö edæ, Wængongui weca quëwëninque Itota pongaingä ingampa, ante pönënimini beyæ botö Mæmpo adobaï minitö iminite waadete pönengä ingampa. ²⁸ Botö edæ Mæmpocä weca quëwente inguipoga iïnömö pönimo inte ñowo pöni inguipoga quëwëninque wadæ godinque Mæmpocä weca ocæ ëmænte goquimo imopa,” ante Itota apænecantapa.

²⁹ Tömengä ëmiñænäni,

—Ñowo inguipoga quëwënäni nani cæbainö ante odömonte apænedämai inte bitö edonque pöni apænebi ëñëmönipa. ³⁰ Bitö tömänö ante ëñëmi imipa, ante ñowo ëñëmönipa. Iïnque mönitö, Æbänö i, ante ëñencæte ante bitö imite änämai iïnömöni bitö iïnömö do në ëñëmi imipa. Mänömai beyæ mönitö, Bitö Wængongui weca quëwente pönimi inte në ëñëmi imipa, ante do pönëmöni imönipa.

³¹ Ante äñönäni Itota wæætë,

—Ñowo tæcæ pönëmini iminitawo. ³² Wantæyö bayedë iïnömö edæ ñowo pöni batimpa. Mäniñedë minitö botö imote ëmö cæte panguimæ panguimæ wodii winöninque tömëmini oncönë go guiquimini iminipa. Botö imo

adoboque emö cæte gomini incæte botö iñæmpa wii adoboque ongömopa. Edæ botö Mæmpo botö tönö godongämæ ongongampa. ³³ Minitö iñömö botö nempo quëwëmini inte gänë pönente quëwencëminimpa, ante cædinque botö mäninö ante minitö iminite apænetabopa. Ii inguipoga quëwëninque minitö caate wæcëminimpa. Incæte mini wæwenguimämo ante guiñënämaï iedäni. Edæ inguipogaque ante nani wënæ wënæ cædonö ante Baa äninque botö godömenque tæi emönömo inte në gänä cægäimo imopa. Mänömainö ante Itota tömengä nänö emiñænäni inänite iinque apænecä ëñgadänimpa.

17

Itota Mæmpo ingante mönö beyæ ante apænecampa

¹ Itota mänömainö ante iinque apænedinque öönæde æmö adinque iïmaï apænecantapa. “Mæmpo ëñëmi. Bitö, Æbänö baquii, ante bitö angainö bai do batimpa. Botö edæ, Bitö Wëmo inömo iñömote bitö pönö cæbi ate botö ñäö apäite bai botö emönö iñömö edonque pönï bacëimpa, ante apænebopa. Mänömaï cæbi adinque botö wæætë bitö beyæ pönö cæbo ate bitö ñäö emömämo edonque pönï bacëimpa. ² Bitö pædæ pönömi botö në ængainäni inänite botö cöwë wantæpiyæ nani quëwenguinö ante godömo æncædänimpa, ante bitö botö tönö godongämæ cæbi beyænque botö waodäni tömänäni inänite në ämo batabopa. ³ Waodäni cöwë wantæpiyæ nani wænämaï quëwenguinö ante iïmaï impa. Mæmpo, bitö adobique näwä Wængongui inömi iñömote tömënäni bitö imite ate bai pönencædänimpa. Ayæ botö Itota Coditobo bitö në da pönongaïmo iñömote do adinque tömënäni pönencædänimpa. Tömënäni mänömaï nani pönënö beyænque edæ cöwë wantæpiyæ nani

wänämaï quëwenguimämo edæ do ëädänipa,” ante Itota apäñecantapa.

⁴ Ayä Mæmpo ingante godömenque apäñedinque, “Bitö, ïimaï cæe, ante bitö angainö ante botö inguipoga quëwëninque do iinque cæbo beyä bitö ñäö ëmömämo edonque pönï bagatimpa. ⁵ Wëñëñedë pönï inguipoga badönämaï iñedë bitö weca ongöninque botö ñäö ëmongaïmo inte ñöwo bitö weca ocä ëmænte pömo adinque bitö pönö cæbi ate botö adobo ñäö apäite bai ëmömo ate edæ edonque pönï acäimpa,” Mæmpo ingante apäñecantapa.

⁶ Ayä, “Inguipoga quëwënäni bitö quïnäni inänipa, ante bitö pædæ pönömi äninque botö wæætë, Wængonguï æcänö ingää, ante tömënäni inänite odömömo ëñënänitapa. Adodäni bitö quïnäni iñönänite bitö tömënäni inänite pædæ pönömi æntabopa. Tömënäni bitö angainö ante ëñente cæðinäni inänipa. ⁷ Bitö pönömi äninque botö ëwocagaincoo ante inäni iñömö edæ, Mänincoo tömancoo edæ Mæmpocä pönongä äninque Itota ëwocacampa, ante ñöwo do ëñënänipa. ⁸ Edæ Mæmpo bitö pönö apäñebi botö ëñente ængainö ante botö adodö ante edæ tömënäni inänite godö apäñebo ëñëninque tömënäni do äñänitapa. Botö bitö weca quëwente pongaïmo imopa, ante ëñëninque tömënäni ædæmö ëñënänitapa. Ayä, Bitö botö imote da pönömi në pongaïmo imopa, ante pönënänitapa,” ante Itota Mæmpocä ingante apäñecantapa.

⁹ Ayä, “Mæmpo, botö tömënäni beyä ante bitö imite apäñebopa. Botö wï inguipogaque quëwënäni beyä ante apäñebopa. Wæætë edæ, Bitö në pædæ pönömi botö ængainäni iñömö edæ bitö quïnäni inänipa, ante botö tömënäni beyä ante bitö imite apäñebopa. ¹⁰ Botö quïnäni tömänäni bitö quïnäni inänipa. Ayä bitö quïnäni

tömänäni botö quinäni adobaï inänipa. Tömänäni cædäni beyænque botö ñäö emömämo edonque pöni batimpa.”

¹¹ Ante apänedinque Itota godömenque apänecantapa. “Botö inguipoga inömö godömenque ongönämaï incæboimpa. Wæætë bitö weca ocæ emænte ponguïmo imopa. Botö emiñænäni guiquënë inguipoga inömö ayæ ongönäni inänipa. Mæmpo bitö në Tæiyæ Waëmö inömi inte eñëmi. Bitö emöwo bitö pönö pemongaiwo beyænque botö tæï piñænte në ämo imopa. Ininque mönatö äawocaque bai ewocate quëwëmöna bai mäninäni adobaï äawocaque bai ewocate quëwencædänimpa, ante cædinque bitö tæï piñæmi inte tömänäni inänite wææ aacæbiimpa, ante bitö imite apänebopa.

¹² Mäninäni weca botö quëwëñedë botö inömö bitö emöwo bitö pönö pemongaiwo beyænque botö tömänäni inänite wææ aatabopa. Ayæ, Wë womönämaï incædänimpa, ante adodäni inänite wææ gampotabopa. Ininque tömänäni tömänäni wë womönämaï inänipa. Önonque adocanque inömö æmæwo wë womonguëngä incæ tömengä inömö edæ Wængongui angä eñente näni yewæmongainö bai ñöwo iinque baquinque ante edæ æmæwo wë womongantapa,” ante Itota Mæmpocä ingante apänecantapa.

¹³ Ayæ, “Botö ñöwo bitö weca ocæ emænte ponguïmo imopa. Tömänäni botö watapæ topämo tömämämo entawëninque quëwencædänimpa, ante botö mäninö ante inguipoga ayæ quëwëñedë apänebo imopa.

¹⁴ Mæmpo, bitö angainö ante botö tömänäni inänite godö apänebo eñënanitapa. Botö inguipogaque näni quëwencabo tönö adobo inämaï imo bai tömänäni edæ adobaï inguipogaque näni quëwencabo tönö adodäni inämaï inäni adinque inguipogaque quëwänäni wæætë tömänäni inänite piñänitapa. ¹⁵ Mæmpo eñëmi. Bitö

botö emiñænäni inänite, Minitö inguipoga iñömö ayæ quëwënämaï incæminimpa, ante ænte mäobi gocædänimpa, ante botö bitö imite apænedämaï imopa. Wæætë, Wënæ awënë në wíwa cædongä iñömö tömënäni inänite, Oda cæcædänimpa, ante cæyongante bitö wææ aabi ate tömënäni wæætë oda cædämaï incædänimpa, ante bitö imite apænebopa. ¹⁶ Botö inguipogaque nãni quëwencabo tönö adobo inämaï imo baï tömënäni edæ adobaï inguipogaque nãni quëwencabo tönö adodäni inämaï inänipa. ¹⁷ Bitö änö iñömö edæ näwangä ante impa. Inique bitö godö cæbi ate näwangä bitö änö beyænque tömënäni iñömö tömëmi cædonque ante cædinque tæiyæ waëmö ewocate quëwënäni incædänimpa, ante bitö imite apænebopa. ¹⁸ Bitö botö imote inguipoga iñömö bitö da pönömi pömo baï botö adobaï tömënäni inänite inguipoga quëwënäni weca da godömo godänitapa. ¹⁹ Tömënäni iñömö bitö cædonque ante cædinque tæiyæ waëmö ewocate quëwënäni incædänimpa, ante botö iñömö edæ bitö cædonque ante Ao äninque, Botö nämä incæ tömënäni beyæ ante wænguïmo imopa,” ante Itota apænecantapa.

²⁰ “Mæmpo ëñëmi. Botö wíi botö emiñænänique beyæ ante bitö imite apænebopa. Wæætë tömënäni botö angainö ante apænedäni ëñente pönëninque wadäni në wede pönenguinäni iñönänite botö iinäni beyæ ante adobaï bitö imite apænebopa. ²¹ Mæmpo, Bitö imite botö entawëmo imo baï ayæ botö bitö nempo quëwëmo imo baï mäninäni tömänäni adobaï äawocaque baï ewocate quëwëmainäni, ante cæcæbiimpa, ante bitö imite apænebopa. Ayæ inguipoga quëwënäni iñömö, Bitö botö imote da pönömi pongaïmo imopa, ante pönencædänimpa, ante cædinque bitö godö cæbi ate tömënäni mönatö nempo quëwencædänimpa, ante

bitö ïmite apænebopa. ²² Bitö pönö cæbi beyænque botö ñäö bai entawëninque, Mönatö äawocaque bai ewocate quëwëmöna bai tömënäni adobai äawocaque bai ewocate quëwencædänimpa, ante botö iñömö bitö pönönimämo botö ñäö entawëmämo tömënäni inänite adopämo godömo ænte entawënänipa. ²³ Tömënäni äawocaque bai ewocate quëwencædänimpa, ante tömënäni botö imote entawënänipa. Ayæ botö bitö ïmite entawëmo imopa. Tömënäni mänömaï äawocaque bai ewocadäni adinque inguipoga quëwënäni iñömö, Bitö botö imote në da pönömi pongaïmo imopa, ante ëñencædänimpa, ante apænebopa. Ayæ botö imote waadete pönengaïmi ïmi bai bitö tömënäni inänite adobai waadete pönengaïmi imipa, ante ëñencædänimpa, ante apænebopa,” ante Mæmpocä ingante Itota apænenecantapa.

²⁴ Ayæ, “Mæmpo, Bitö pædæ pönömi botö në ængaïnäni iñömö botö ñäö ëmömämo acædänimpa, ante botö, Tömënäni botö quëwëñömö adoyömö quëwencædänimpa, ante aïnente wæbopa. Wëenëñedë pönï inguipoga badönämaï iñedë bitö iñömö edæ botö imote waadete pönëninque botö ñäö ëmömämo pönömi botö ængaïmämo tömënäni adopämo acædänimpa, ante aïnente wæbopa. ²⁵ Mæmpo në nö cædömi ïmi ëñëmi. Inguipogaque quëwënäni bitö ïmite wïi adinque pönënämaï inäni incæte botö iñömö edæ bitö ïmite do ate pönëmo imopa. Botö ëmiñænäni iñömö, Bitö botö imote da pönömi në pongaïmo imopa, ante do ëñënänitapa. ²⁶ Botö cæbo beyænque mäninäni iñömö, Bitö ïmite ate bai pönënanitapa. Botö imote bitö waadete pönënö ante adodö waadete pönënö tömënäni mimönë entawente quëwencædänimpa, ante ayæ, Tömënäni botö imote entawencædänimpa, ante botö ayæ cæbo beyænque tömënäni iñömö, Bitö ïmite ate bai pönencædänimpa,”

ante Itota Mæmpo ingante iinque apænegacäimpa.

18

Itota ingante bæi ongonte ænte godänipa

(Mäateo 26.47-56; Mäadoco 14.43-50; Odoca 22.47-53)

¹ Wængonguï ingante iinque apænedinque Itota tömengä emiñænäni tönö wadæ godinque Quedodöo biyönæ æmæ wedeca godänitapa. Æmæ wedeca odibowæncodë nani ancodë i iinque Itota tömengä emiñænäni tönö mänincodë pö guiidänitapa. ² Itota ingante nê odömonguingä Codaa iñömö Itota tömengä emiñænäni tönö mänincodë wantæ iñö wantæ iñö gote ongönäni iinque Itota ingante nê odömonguingä Codaa iñömö mänincodë do adingä inongäimpa.

³ Iinque tontadoidi adocaboque inänite æninque Codaa iñömö edæ täno beyænte adocodë pongantapa. Ayæ, Wængonguï quï, ante nê godönäni ñænænäni tönö Paditeoidi nani wææ wänönäni inänite Codaa nempo godönäni æningä inte tömengä tömënäni inänite tontadoidi tönö ænte mämongä pönänitapa. Pöninque tömënäni gonga ticainë næænte gongapæncade ticainë nææninque yaëmë næænte Codaa miñæ pönänitapa.

⁴ Itota nämä ante, Æbänö bate wæquimoo, ante tömää ëñëningä inte awænë tao godinque tömënäni inänite,

—Æcänö ingante ante diqui diqui minte pöminii.

⁵ Ante ãñongä tömënäni wæætë,

—Itota Näatadeta nê quëwëningä ingante ämönipa.

Änäni ëñëninque,

—Botö tömëmö imopa, ante Itota apænecantapa.

Ayæ nê odömonguingä Codaa iñömö tömënäni weca a ongönongäimpa. ⁶ Itota iñömö, “Botö tömëmö imopa,” ante ãñongä tömënäni gä godinque onguipoga tæ go wæænänitapa. ⁷ Tæ go wæænäni adinque tömengä adodö,

—Æcänö ingante ante diqui diqui minte pömīnii.

Ante āñongä tömēnāni wæætē,

—Itota Nāatadeta quēwēningä ingante ämönipa.

⁸ Änāni ēñēninque Itota wæætē,

—Botö tömēmo ïmopa, ante do antabopa. Mīnitö ïñömö botö ïmote ante diqui diqui minte pömīni bai mänināni ïnānite bæi ongönāmaï ïedāni.

⁹ Itota Mæmpocä ingante do apænedinque, “Bitö edæ pönömi botö ængäināni ïnānite wææ aabo beyæ adocanque incæ wē womönāmaï ïnānitapa,” ante nänö angainö bai ñöwo ïinque bacäïmpa, ante mänömaï angantapa. ¹⁰ Timönö Pegodo ïñömö nē yaēmē næængä inte pædæ guipote yaēmē æninque, Wængonguï quï, ante nē godongä ñænængä pönï ïnongä ingante nē cæcä ingante tæi päninque tömēmonca ïnö wangö tamoncacantapa. Pegodo nänö nē wangö tamoncadingä emöwo Mäadoco emongä ïnongäïmpa. ¹¹ Itota wæætē Pegodo ingante,

—Bitö yaēmē adodö da wēe, äninque, Botö wæwenguïmämo ante botö Mæmpo pönongä ænïmo inte wæwenguēnēmo ïmopa, angacäïmpa.

Itota ingante bæi ongöninque Änato weca ænte godāni

(Mäateo 26.57-58; Mäadoco 14.53-54; Odoca 22.54)

¹² Ayæ odömāno tontadoidi tönö tömēnāni awēnē ayæ oodeoidi awēnēidi tönö Itota ingante bæi ongöninque ænānitapa. Æninque tömengä ingante goto wimpote cædānitapa. ¹³ Ayæ adodāni Änato nänöwāa Caiapato weca Itota ingante ænte mäo godānitapa. Edæ Caiapato ïñömö, Wængonguï quï, ante nē godongä ñænængä pönï ïnongä mänïi wadepo ïñonte ïnongäïmpa. ¹⁴ Caiapato wēenēnedē oodeoidi awēnēidi ïnānite ïmaï ante nē änongä ïnongäïmpa. Mönö waocabo beyæ ante adocanque onguïñængä wængä ïinque waa ïmaïmpa.

*Pegodo incæ, Dicæ abogaa, angampa**(Mäateo 26.69-70; Mäadoco 14.66-68; Odoca 22.55-57)*

¹⁵ Itota nänö ëmiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö ëmiñængä iñömö, Wængonguï qui, ante në godongä ñænængä pönï nänö në adingä inongäimpa. Ìninqe Itota tönö pöninqe tömengä Wængonguï ingante në godongä ñænængä pönï inongä oncö yacömöñäa iñömö pö guicantapa. ¹⁶ Pegodo guiquënë odemö yabæ inö a ongönongäimpa. Wacä Itota miñæ në gocä iñömö, Wængonguï qui, ante në godongä ñænængä pönï inongä nänö në adingä iñömö tömengä ocæ ëmænte pöninqe baqucä odemö në wææ aacä ingante apænecantapa. Pegodo ingante ämi guicæ, angä ëñëninque baqucä wi ænecä ate tömengä Pegodo ingante ænte manguicä guicantapa. ¹⁷ Manguicä guiiyongä baqucä odemö në wææ aacä iñömö Pegodo ingante,
—Bitö adobai mäningä onguiñængä nänö në ëmiñænömi ïimpa töö.

Äñongä tömengä wæætë,

—Botö wabo ïmopa, angantapa.

¹⁸ Yoguite ingatimpa. Ayæ në cædönäni tönö oodeoidi awënëidi wææ wänönäni gongapamö ootoqui, ante näni tadönï gäänë adiyæ ongonte ootodönänimpa. Pegodo adobai tömënanäni tönö godongämæ adiyæ ongonte ootocantapa.

*Në godongä ñænængä Itota ingante angampa**(Mäateo 26.59-66; Mäadoco 14.55-64; Odoca 22.66-71)*

¹⁹ Mäniñedë Änato iñömö, Wængonguï qui, ante në godongä ñænængä pönï iñömö Itota ingante, Bitö në ëmiñænänäni diyæ, äñongäimpa. Ayæ Itota nänö odömönte apænegainö ante, Æbänö i, ante tömengä ingante adobai angantapa. ²⁰ Itota wæætë,

—Waadäni eññönänite botö edonque pöní apänebo eññänitapa. Botö cöwë minitö odömöincönë incæ Wængonguï oncö ñænæncönë incæ oodeoidi tömänäni nani pöincönë pö guuidinque odömonte apänebo eññänitapa. Botö cöwë awëmö apänedämaï intabopa. ²¹ Bitö botö imote, Æbänö i, ante quínante ämii. Botö imote nē eññänināni inānite ämi eññente apänedäni eññencæbiimpa. Edæ mänināni ædæmö eññänāni inānipa.

²² Mänömainö angä eññëninque wææ wänongä adocanque iñömö Itota gäänë ongöninque tömengä ingante tæi tamöninque apäñecä,

—Wængonguï quí, ante nē godongä ñænængä pöní inongä ingante ædö cæte mänömaï ante wæætë änewë töö.

²³ Ante añongä Itota wæætë,

—Botö wënæ wënæ änimo imo bai bitö botö wënæ wënæ äninö ante, Æbänö i, ante apänebi eññemoe. Wæætë edæ näwangä ante apänebo ininque bitö quínante botö imote tæi tamömpææ, angantapa.

²⁴ Ayæ, Wængonguï quí, ante nē godongä ñænængä pöní Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eññëninque tömengä ingante ænte gogadänimpa.

Pegodo incæ, Dicæ abogaa, wæætë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ ootoyongante wadäni,

—Bitö tömengä emiññänömi adobai imipa töö.

Änāni eññëninque tömengä,

—Wabo imopa, angantapa.

²⁶ Wængonguï quí, ante nē godongä ñænængä pöní inongä ingante nē cädäni iñönänite adocanque iñömö Pegodo nänö nē wangö tamoncadingä guuidengä inongäimpa. Tömengä iñömö Pegodo ingante,

—Bitö tömengä miñä odibowæncodë ongöñedë bitö ïmi atabopa. Bitö wii ïmitawo.

²⁷ Ante ãñongä Pegodo wæætë, Wabo ïmopa, ante tæcæ änewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

²⁸ Tæcæ ñäö bayonte Itota ayä Caiapato weca ongöñongante oodeoidi ïñömö, Mönö tömengä ingante odömäno gobedönadodo awënë Pidato weca ænte gocæimpa, ante cædinque awënë oncö boyä mäodäni gocantapa. Incæte tömënäni dodäni näni wææ angainö beyä ante guiñente wædinque, Pidato oncönë guite bai mönitö mimö wentamö ewocamöni incædömönimpa. Ìñæmpa mänömaï cæmöni ïninqe mönitö Patowa mönö äämä cæyedë cænguï ædö cæte cænguïmönii, ante wædinque guidämaï ïñänitapa. ²⁹ Ìninqe Pidato tömënäni weca oncö boyä taodinqe tömënäni ïñänite,

—Ïngä onguiñængä ïñömö quinö wënæ wënæ cæcantawo.

³⁰ Äñongä tömënäni wæætë,

—Mäningä wii wënæ wënæ cæcä inte bai mönitö tömengä ingante wii ænte mämö pædæ godömöni æncædömiimpa.

³¹ Änäni ëñëninque Pidato,

—Mïnitö tömëmïni tömengä ingante ænte godinque mïni wææ yewæmongainö bai ante cædinque, Tömengä ingante pangæimpa, ante apænte äedäni.

Äñongä oodeoidi awënëidi,

—Ïñæmpa mïnitö wææ ämïni ïñömïni mönitö cöwë tacamöni wænäni möni cægainö bai ædö cæte æcämenque ingante wænömöni wænguingäa, ante wædänitapa.

³² Odömänoidi mäniñedē wēnæ wēnæ cædāni inānite awāa tōō godōmænte timpodinque wææ tiwadinque godō wænōnāni inōnānimpa. Īninqe odömänoidi inānite pædæ godōninque oodeoidi wæætē Itota, Æbānō cædāni wænguimoo, ante do nānō angaiñō bai ñōwo ĩninqe baquinque cædānitapa. ³³ Māniñō ānāni ēñēninqe Pidato wæætē oncōnē ñænæncōnē guidinque Itota ingante añecā pongā adinque, Pidato,

—Bitō oodeoidi Awēnē Odeyebi ĩmitawo.

³⁴ Angā ēñente Itota wæætē,

—Bitō nāmā pōnēninqe apænebitawo. Wabānō wacā botō ĩmotedō ante bitō ĩmite apænecā ēñēmitawo.

³⁵ Ante añongā Pidato,

—Botō dicæ oodeobo ĩmogaa. Tōmēmi guidēnāni tōnō Wængonguī qui, ante nē godōnāni ñænænāni ĩñōmō bitō ĩmite māmō pædæ pōnōnāni æntabopa tōō. Bitō quino wēnæ wēnæ cæbitawo.

³⁶ Añongante Itota wæætē apænedinque,

—Wīi inguipoga quēwēnāni ānāni beyæ botō Awēnē Odeyebo nē ingaiimo ĩmopa. Botō inguipoga quēwēnāni Awēnē Odeyebo inte nē āmo ĩmo bai botō nempo quēwēnāni ĩñōmō botō ĩmote, Bæi ongonte ænte godāmai incædānimpa, ante wææ cædinque oodeoidi tōnō guēa wæætedō wæætē cæcædōnānimpa. Incæte wīi inguipoga quēwēnāni ānāni beyæ wæætē edæ wayōmō quēwengaiimo inte botō tōmēmo nāmā incæ Awēnē Odeyebo nē ingaiimo ĩmopa.

³⁷ Mānōmainō ante Itota apænecā ĩninqe Pidato,

—Īñæmpa Awēnē Odeyebi bitō ĩmitawo.

Añongante Itota wæætē,

—Bitō tōmēmi ānō bai botō Awēnē Odeyebo ĩnōmoimpa. Nāwangā āmīpa. Botō ĩñōmō Wængonguī nānō angaiñō ante, Nāwangā ĩmpa, ante inguipoga quēwēnāni

inänite apænecæte ante edæ mänii beyænque ante ingui-
poga iñömö pö ëñagaiimo imopa. Wængongui näwangä
ante nänö angainö ante Ao ante ëñente në cædäni iñömö
edæ tömënäni tömänäni botö imote në ëñänäni inänipa,
angantapa.

³⁸ Äñongante Pidato,
—Æcämë näwangä angää, angacäimpa.

Itota wæncæcäimpa, änänipa
(*Mäateo 27.15-31; Mäadoco 15.6-20; Odoca 23.13-25*)

Pidato mänömaï apænedinque wæætë oodeoidi weca
oncö boyæ taodinque apænecantapa.

—Iingä quinö wënæ wënæ cæcä ingampa, ante ëñänä-
maï imopa. Iinque botö dicæ tömengä ingante apænte
anguimo imogaa. ³⁹ Wadepo iñö wadepo iñö Patowa mini
æämæ cæönæ minitö, Ædänidö tee mönete ongönäni,
ante pönëninque adocanque ëmowo ante botö imote
apænedinque, Iingä ingante ñimpo cæbi goquingä, ante
cöwë äminipa. Iinque adocanque ingante, Iingä iñömö
mini apænedongä ingampa, ante botö tömengä ingante
ñimpo cæbo ate ænte gomïni inömïnimpa. Iinque ñöwo
diyæ. Minitö, Oodeomöni Odeye iñongante pönö ñimpo
cæbi abæ tawænte goguinga, ämïnitawo.

⁴⁰ Äñongante tömënäni yedæ tededinque,
—Mäningä ingante dicæ ämöniyaa. Wæætë Badabato
ingante ñimpo cæbi gocæe, ante tedewengadänimpa.

Badabato wëenëñedë wadäni tönö, Odömäno
täiyæ awënë ingante wido cæcäimpa, ante cædingä
inongäimpa.

19

¹ Ayæ Pidato angä ate Itota ingante bæi ongonte mäo
æmontaiya tæi tæi pänänitapa. ² Tontadoidi daa mongæ-
menca æninque que que cædinque, Awënë poganta, ante

pönö da wencadänitapa. Awënë weocoo wēñacæbiimpa, ante badete tote bai cædinque Itota ingante opatawæ ëmoncoo pönö daga wēñadänitapa. ³ Daga wēñadinque tömēnāni wæætē wæætē tömengä weca ponte äninque,

—Badogaa, bitö oodeo awënë odehyebi imipææ.

Ante badete todinque tömengä ingante tæi tamönänitapa.

⁴ Pidato tömēnāni weca oncö boyæ adopoque ayæ tadinque oodeoidi inänite apænedinque,

—Iingä iñömö æbänö cæcantawo, ante ëñencæte ante cæbo ate tömengä wēnæ wēnæ nänö cædö ante dicæ abogaa. Minitö mänömainö ante ëñencæminimpa, ante botö tömengä ingante minitö weca ænte mantabo tacä aedäni, angantapa.

⁵ Itota daa mongæmenca poganta encadinque opatawæ ëmoncoo mongænte tayongä Pidato tömēnāni inänite,

—Iingä onguiñængä ongongä aedäni.

⁶ Tömengä ingante adinque, Wængongui qui, ante nē godönāni ñænænāni tönö adodäni inänite nē wææ wänönāni iñömö yedæ tedewëninque,

—Awæ ñænquedimæ cæte ämi wänönāni wængæe. Ämi wänönāni wængæe.

Ante ancaa änewënāni ëñëninque Pidato wæætē,

—Minitö iñæmpa tömengä ingante æninque awæ ñænquedimæ cæte wänömini wængæe. Botö guiquënë iingä wēnæ wēnæ nänö cædö ante dicæ abogaa.

⁷ Pidato añongä oodeoidi wæætē iimaï tedewënanitapa.

—Mönitö wææ yewæmongainö ante ëñente quewëmöni imönipa. Iingä iñömö edæ nämä ante edæ, Wængongui Wëmo inömo imopa, ante cædinque edæ mäninö möni wææ yewæmongainö ante ëñënämaï cæcampa. Mänömaï ëñënämaï inte cæcä beyæ tömengä nē wængüenengä ingampa.

⁸ Mänömainö änäni eñëninque Pidato godömenque guiñente wædinque, ⁹ oncönë ñænæncönë adodö pö guidinque Itota ingante,

—Bitö ædönö quëwente pömi imii.

Ante añongä Itota guiquënë pæ wëenecä. ¹⁰ Adinque Pidato tömengä ingante,

—Bitö quïnante botö ïmo tededämaï imii. Botö nämä në täï piñænte ämo ïnömo inte ämo ïninque ñimpo cædäni gobaïmipa. Botö wadö ante ämo ïninque bitö ïmite do awæ ñænquedimæ cæte wænönäni wæmaïmipa, ante eñënämaï imitawo.

¹¹ Añongante Itota wæætë,

—Wængonguï bitö täï piñænte ämämo ante godönämaï ingä bai bitö tömömi täï ämi imi diyæ botö ïmote anguimiya. Mänömaï beyæ bitö ïmite, Wænömi wæncæcäimpa, ante botö ïmote në pædæ pönöningä ïñömö edæ godömenque wænæ wænæ cæcä ingampa, ante apænecantapa.

¹² Mänömainö angä eñëninque Pidato, Æbänö ñimpo cæbo goquingää, ante cædongäimpa. Cæyongä oodeoidi wæætë godömenque yedæ änönänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo æmigo dicæ imiyaa. Æcämenque ïñömö edæ, Botö awënë ïnömoimpa, ante në angä inte tömengä ïñömö Tetædo ingante në piñongä ingampa.

¹³ Mäninö änäni eñëninque Pidato ïñömö, Itota ingante ænte tao godinque awënë nänö apænte äimpaa gote tæe contacantapa. Pidato nänö tæe contayömö ïñömö, Dicacoo ayadi bai nani caayömö impa, ante nani aññömö ïnönimpa.

¹⁴ Patowa nani ææmæ cæyedë iinque bayö oodeoidi, ïimö ate guëmanguïönæ inguimpa, ante mönö ñöwoönæque

cæcæimpa, ante nāni cæönæ inönimpa. Iïönæ wodo tæcæ bæcä bayonte Pidato oodeoidi inänite,

—Iingä iïömö mīnitö Odeye inongä ingampa.

¹⁵ Añongante yedæ äninque tömēnāni,

—Tömengä ingante wænömi wængæe. Tömengä ingante wænömi wængæe. Awäa timpote ämi wænönāni wængæe.

Ante ancaa änewēñönāni Pidato wæetë,

—Botö iïömö mīnitö Odeye iñongante awäa timpote ämo wænönāni wængæe, ante änewēmīnitawo.

Angä ēñēninque Wængonguī quī, ante godönāni ñænänāni iïömö,

—Tetædoque incæ mönitö awēnē odeye inongä apa cæbii, änewēñönānimpa.

¹⁶ Ancaa änewēñönāni Pidato, Awäa ämo timpote wænömīni wængæedāni, ante Itota ingante tontadoidi inänite pædæ godongä ængadānimpa. Ayæ tömēnāni Itota ingante ænte gogadānimpa.

Itota ingante awäa timpodāni wængäimpa

(Mäateo 27.32-44; Mäadoco 15.21-32; Odoca 23.26-43)

¹⁷ Itota incæ tömengä timpoquiwæ äninque mongæante taodique “Ocatainö” mönö añömö pongantapa. Mäniñömö ante ebedeo tededö, Godogota, nāni añömö impa. ¹⁸ Mäniñömö pöñongante tömēnāni awæ ñænquedimæ cædique tömengä ingante töö godonte timpodinque wææ tiwadinque ængæ gantidēnāni ongongantapa. Ayæ wada inate tömengä weca æmatæ inö æmatæ inö mämö adobai cæte ængæ gantidēnāni wægöñöna Itota tæcæguedë wægongä ingantapa. ¹⁹ Pidato angä yewæmointa, Nāni ēñēnguinta, ante yewæmonte äninque ñænquedimæ iwäa wo cædānitapa. “Itota Näatadeta quēwēningä oodeoidi Awēnē Odeye inongä ingampa,” ante yewæmonte wo cæte ongongatimpa. ²⁰ Itota ingante nāni timpodiiñömö

eyequei i inique oodeoidi nangui inani tömënäni nani quëwëñömö ta pöninge Pidatoidi nani yewämöninta adänitapa. Mäninta iñömö ebedeo tededö datii tededö guidiego tededö ante yewämonte ingatimpa. ²¹ Oodeoidi beyä ante, Wængongui qui, ante nē godönäni ñænänäni iñömö Pidato weca godinque tömengä ingante,

—Bitö, “Oodeoidi Awënë Odeye inongampa,” ante yewämönämaï inguënë quëwëë. Wæætē tömengä nämä nänö angainö bai, “Botö oodeoidi Awënë Odeyebo inömoimpa, ante nē änewëningä ingampa,” ante yewämöe.

²² Ante änewëñönäni Pidato wæætē,

—Botö yewämöninö ante yewämönimo inte botö wæætē wadö ante yewämönämaï incæboimpa.

²³ Tontadoidi iñömö tömengä ingante awäa timpote ængæ gantidënäni wægöñongä tömënäni tömengä weocoo ini æninque mencooga go mencooga cönöninge adocanque adocooque adocanque adocooque æninque tömänäni ænönänimpa. Täno mongæincoo guiquënë ayä öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa.

²⁴ Adocooque wänä ñænämaï ingæimpa, ante adöäni godongämæ tededinque,

—Æcänö quince nö ta adinque tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iimaï ante nani yewämongainö bai ñöwo iinque baquinque tontadoidi mänömaï cädänitapa. “Edæ botö weocoo ini ö æninque tömënäni nani caboque wacä ingä wacä ingä nënem-podänitapa. Ayä, Æcänö quince nö ta adinque tömengä mänincoo æncæcäimpa, ante wææntodöninge ænäni-tapa,” ante nani yewämongainö bai tontadoidi ñöwo cädänitapa.

²⁵ Itota ingä nāni ængæ gantidēñömö tömengä wäänä tönö wäänä tōniñacā nāna caya ayæ Codeopato nānōogængä Māadiya tönö wacā Māadiya Māagadadēnā māniñömö pōninque eyequei a ongōnānitapa. ²⁶ Itota iñömö tömengä wäänä inante acantapa. Ayæ botö tömengä miñæ nē godimo iñömö tömengä nānō nē waadebo inōmo inte tömēnā weca ongōmo adinque Itota tömengä wäänä inante,

—Badä ēñēmi. Māningä iñömö minō wengä bacæcäimpa.

²⁷ Äninqe tömengä ēmiñænimo iñömote,

—Botö ēmiñænimi ēñēmi, Māninä iñömö botö badä incæ bitö badä bacædäimpa, angacäimpa.

İninqe botö Itota nānō nē ēmiñænimo inte tömengä nānō änōhedē tāno ænte māmōmo pōninque tömengä wäänä iñömö botö oncōnē cōwē owodōnāimpa.

Itota incæ wængäimpa

(Māateo 27.45-56; Māadoco 15.33-41; Odoca 23.44-49)

²⁸ Quinō bacæimpa, ante ñōwo iinque batimpa, ante nē ēñēnongä inte Itota iñömö edæ, Wængonguī angä ēñēnte nāni yewæmongainō bai ñōwo iinque bacæimpa, ante cædinque,

—Botö gæwænte awædō, ante apænecantapa.

²⁹ Adoyömö biinōmæ nāni ämæ bai wædænque godonte nāni ænimæ owætadē engate ongō adinque tömēnāni dayömö bai æninqe mānimænē pædæ guidonte aa beyonte wëä tadonte æninqe iitopowænca nāni äwænca ongontoca goto wencadodinque Itota önōne pædæ æænō pæ mānānitapa. ³⁰ Pæ māñōnāni Itota oo guēmante bedinque,

—Ñōwo iinque batimpa.

Ante apænedinque tömengä ocabo ædæ wææncadinque tömengä önōwoca wadæ goyōwoca do wængäimpa.

Itota betagonta inö tontado boo tänongä

³¹ İimö ate, Mönö guëmanguiönæ iñömö Patowa inguiönæ beyæ godömenque waa ëönæpa, ante oodeoidi, Nöwoönæque cæcæimpa, ante nani cæönæ inimpa. Oodeoidi awënëidi, Awäa në ongönäni baö mäniwäa guëmanguiönæ ongönämaï incædänimpa, ante Pidato weca godinque tömengä ingante, İinäni nani timpodiwäa në ongönäni quingæ wæncædänimpa, ante cædinque bitö tömënäni önömënë bamë ämi wadäni taa mäenäni do wæncædänimpa. Ayæ tömënäni baö o togænte pædæ wæænonte ämi ænänie, änänitapa. ³² Mänii beyæ tontadoidi pöninque Itota weca täno nani në ængæ gantidëningä önömënë bamë taa mäeninque edæ ayæ nani në timpodingä wægongä önömënë bamë taa mäenänitapa. ³³ Taa mäeninque Itota weca pöninque tömengä do wængäi adinque tömengä önömënë taa mäenämaï inönänimpa.

³⁴ Wæætë tontado adocanque Itota betagonta inö boo tänönongä wepæ tönö æpæ gui gotimpa. ³⁵ Botö mäninö bayonte në adimo inte, Æbänö näwangä batimpa, ante nö apænebopa. Ayæ, Botö änö ante näwangä impa, ante do ëñemopa. Minitö adobai ëñente pönencæminimpa, ante apænebopa. ³⁶ Edæ, “Tömengä bamë adomenque incæ taa mænte wædämaï incæcäimpa,” ante Wængongui angä ëñente nani yewæmongainö bai bacæimpa, ante mänömaï batimpa. ³⁷ Ayæ edæ, “Wadäni nani në boo tänönongä ingante aquinäni inänipa,” ante Wængongui angä ëñente wataa nani yewæmongainö bai iinque bacæimpa, ante mänömaï batimpa.

Itota wodi baö inii mäo daga wänänipa

(Mäateo 27.57-61; Mäadoco 15.42-47; Odoca 23.50-56)

³⁸ Ayæ ate Adimatea quëwengä Ootee iñömö oodeoidi awënëidi inänite guiñente awædö, ante awëmö Itota

ëmiñäningä inongäimpa. Tömengä iñömö Pidato Awënë ingante, Itota wodi baö pönömi ænte wëmoe, angantapa. Pidato Ao angä ëñëninque Ootee do pöninque Itota wodi baö timpodiwäa ongöñongante o togænte pædæ wæænonte ængantapa. ³⁹ Ayæ Nüicodemö wëenëñedë Itota weca woyowotæ ëñacæ në pöningä iñömö Ootee miñä pongantapa. Tömengä miidamö nani änömö nangui ti nämö tönö aadoemö nani änömö nangui ogui wamö tönö adoyömö nani wempo cædimö todëinta quido ganca ænte pongantapa. ⁴⁰ Ootee tönö Nüicodemö iñömö Itota wodi baö æninque ninocoo nani ancoo guyancoo incæ doyæncoo mänincoo ogui wamö nana ænte pönimö ænte wäne cædedatapa. Ayæ oodeoidi daga wencæte ante nani cægai bai adobai cædinque tömëna nana wäne cædincoo inte tömengä baö wini wini cægadaimpa. ⁴¹ Itota ingante nani timpodiiñömö eyequei gönea inimpa. Adodea iñömö miintatodë nani ææ wodiñömö onontatoque inimpa. ⁴² Ìimö ate guëmanguiönæ inguimpa, ante oodeoidi, Nöwoönæque cæcæimpa, ante nani cæönæ impa, ante beyæ, Ontato eyequei impa, ante tömënanä Itota wodi baö mäniñömö daga wengadänimpa.

20

*Itota në wæningä incæ nani ömæmonte quëwengä
(Mäateo 28.1-10; Mäadoco 16.1-8; Odoca 24.1-12)*

¹ Oodeoidi guëmanguiönæ Tabado go ate mönö Dom-inco tæcæ ooque pönente bayedë Mäadiya Mäagadadënë Itota wodido ponte ayongä dicabo ontato tee mönocæte ante nani da pæñäeninca incæ do wëa godö concæi intapa. ² Botö Itota nänö në waadedimo tönö Timönö Pegodo iñömö Itota miñä möna në godincaya iñömönate Mäadiya Mäagadadënë wæætë, Mänömaï impa, ante adinque mönatö weca pogodo ponte apænecantapa,

—Awënë Itota wodi baö ontatodë öñöñongante ænte taodinqe ædönö mäo ñö cædänii, ante ëñënamai ïmönipa.

³ Ante apæneyongä Pegodo tönö botö Itota miñæ möna në godincaya iñömö tömengä wodido quingæ gote pogodo pontamönapa. ⁴ Guëa pogodo gomöna incæte tömengä ëmiñænimo botonque quingæ tömengä wodido täno pontabopa. Pegodo ayæ pongantapa. ⁵ Mäniñömö täno pöninqe ædæ wæænte guiite ayömo iñäna näna wini caadincooque öñö abo incæte guidämai intabopa. ⁶ Timönö Pegodo botö miñæ ayæ në pöningä Itota wodido ontatodë ponte wäänë guiicantapa. Wäänë guiyongante doyæncooke iñäna näna wini caadincooque mäniñömö öñö acantapa. ⁷ Ayæ Itota wodi ocabo näna ñäni cæcadincoo adobai öñö acantapa. Mänincoo doyæncoo tönö wii adoyömö ñönonte intapa. Wæætë iincoo nää wënente nänënë ñö cæte öñö acantapa. ⁸ Ìninqe botö tömengä wodido ontatodë täno në pönimo incæte ñowo tæcæ adobai wäänë guiitabopa. Guiite ayömo, Itota nänö öñöniñömö æbänö i, ante adinqe, Tömengä ñäni ömæmonte quëwengä ingampa, ante pönentabopa. ⁹ Edæ Wængongui angä ëñente yewæmöninqe dodäni, Mönö Codito iñömö do wæningä incæ ñäni ömæmonte quëwenguënegä incæcäimpa, ante mönatö mäniñedë ayæ ëñënamai inömönaimpa. ¹⁰ Ayæ mönatö tömengä miñæ në godimöna iñömö wadæ godinqe tömëmöna oncönë ocæ ëmænte gotamönapa.

*Itota iñömö Mäadiya Mäagadadënë weca pongä
(Mäadoco 16.9-11)*

¹¹ Mäadiya guiquënë Itota wodido ontatodë yabæ ïnö a ongonte wædongäimpa. Mänömai wædinque tömengä, Abote, ante ædæ wæænte guiite ¹² adinqe Wængongui anquedoda näämæntacoo mongæna inte Itota

wodi baö öñöniñömö tæ contada ina acantapa. Adocanque Itota wodi ocabo öñöniñömö tæ contayongä wacä Itota wodi önöwa öñöniñömö tæ contate ongongä acantapa. ¹³ Tömëna iñömö tömengä ingante,

—Onquiyæmi, minö quinante wæmintawo.

Äna ëñëninque tömengä wæætë,

—Botö Awënë wodi baö ini ö ænte godäni awädö. Ædönö mäo ñö cædäni, ante ëñënamäi wæbopa.

¹⁴ Mäninö äninque Mäadiya dadi ëmænte ayongä Itota mäniñömö a ongongä adinque Itota incæcä tömengä ëñënamäi ingantapa. ¹⁵ Itota iñömö,

Minö quinante wæmintawo. Æcänö ingante ante diqui diqui mimintawo.

Ante angä ëñëninque Mäadiya, ðingä iñömö wabänö gönea ömæ wite nê aacä ingampa, ante önöwënenque pönëninque,

—Ëñëmi, bitö tömengä wodi baö ini wayömö ænte mäobi inte bai ædönö gote ñö cæbitapa, ante apænebi ëñëmoe. Apænebi ëñëninque botö tömengä wodi baö do gote æmaiimopa.

¹⁶ Äñongante Itota tömengä ingante,

—Mäadiya, angantapa.

Angä ëñëninque tömengä weca dadi ëmænte ebedeo tededö äninque,

—Adaböni, angantapa. Mäninö mönö tededö, “Awënë nê Odömömi imi,” ante impa.

¹⁷ Itota iñömö,

—Edæ botö ayæ botö Mæmpo weca ocæ ëmænte godämaï imopa, ante adinque minö botö imo pæ mänämaï iedä, angantapa. Wæætë minö botö töninädäni weca godinque tömënäni inänite iïmaï apænebi ëñencædänimpa. Botö ñöwo botö Mæmpo weca ocæ ëmænte goquïmo imopa. Tömengä iñömö minitö Mæmpo adobai inongampa. Botö ñöwo botö Wængongui weca ocæ

ëmænte goquimo ïmopa. Tömengä ïñömö minitö Wængonguï adobaï ïnongampa, angantapa.

¹⁸ Itota angä ate Mäadiya Mäagadadënä ïñömö Itota nänö në ëmiñænïnäni weca pöningue, Awënë Itota ingante atabopa, äningue, Tömengä ïïmainö ante apænegä ëñentabopa, ante tömënäni ïnänite mäo apænegacäïmpa.

*Itota ïñömö tömengä ëmiñænïnäni weca pongä
(Mäateo 28.16-20; Mäadoco 16.14-18; Odoca 24.36-49)*

¹⁹ Guëmanguïönæ go ate ïimö ate wëmö bayö tömengä ëmiñænïnäni adoyömö pöningue, Oodeoidi awënëidi ïnänite ancai guïñente awædö, ante odemö tee mönete ongönänitapa. Itota tömënäni weca pö guiite tæcæguedë a ongöningue,

—Guïñenämaï inte gänë pönencæmïnïmpa, angantapa.

²⁰ Mäninö angä ate tömengä önompo odömöningue tömengä betagonta odömongä adänitapa. ïningue mönö Awënë ingante adingue tömengä ëmiñænïnäni nanguï watapæ todänitapa. ²¹ Itota wæætë adodö,

—Guïñenämaï inte gänë pönencæmïnïmpa, angantapa. Botö Mæmpo ïñömö botö ïmote nänö da pönongaimo ïmo baï botö adobaï minitö ïminite da godömo goquimïni ïminïpa.

²² Ante apænedingue tömënäni baonga woo öongate apænegä,

—Botö ñöwo pönï minitonga Wængonguï Tæiyæ Waëmö Önöwoca ingante pönö pönömo äedäni. ²³ Në wënæ wënæ cæcä ingante adingue minitö tömengä ingante godö ñïmpo cæmïni ïningue Wængonguï adobaï tömengä ingante godö ñïmpo cæcä quëwëmaingampa. Minitö wæætë në wënæ wënæ cæcä ingante godö ñïmpo cædämaï ïmïni ïningue Wængonguï adobaï cædämaï inte tömengä ingante pönö ñïmpo cædämaï ïmaingampa.

Itota ñäni ömæmonte në quëwengä ingante Tömato acä

²⁴ Itota ëmiñæniniäni adoyömö a ongöñönäni tömengä pö guite tömënäni weca tæcæguedë a ongöñongä tömengä ëmiñæningä adocanque Tömato mëwoga ëmongä Äancadënaque iñömö dæ angampa. ²⁵ Ayæ ate Itota nänö në ëmiñæniniäni wadäni iñömö,

—Mönö Awënë ingante atamönipa, ante Tömato ingante apænedäni ëñëninque tömengä wæætë,

Botö iñömö tömengä önönempo näni daagö timpodĩñömö, Æyömönö empocä, ante adinque önongompoca gampodinique ayæ tömengä betagonta iñö näni tapa tænonte codiñömö botö tömëmo önongompoca gampote ate pönëmaï wädö, angantapa.

²⁶ Wacä tëmäna go ate Itota ëmiñæniniäni wæætë oncönë adoyömö pö guite a ongöñönäni Tömato tömënäni tönö godongämæ pö guite a ongongantapa. Odemö tee mönete ongö incæte Itota iñontobæ pö guite tömënäni weca tæcæguedë a ongöninque,

—Guiñënämaï inte gänë pönencæminimpa, angantapa.

²⁷ Ayæ Tömato ingante,

—Bitö tömëmi önongompoca pædæ pompodinique botö önompö ae. Pædæ guipote botö betagonta iñö gampoe. Ayæ, Wabänö incædö, ante änämaï incæbiimpa. Wæætë pönëe.

²⁸ Ante äñongä Tömato,

—Botö Awënë iñömi imipa. Ayæ adobaï botö Wængonguï iñömi imipa, angantapa.

²⁹ Ayæ Itota tömengä ingante,

—Botö imote ate pönëmi imipa. Wæætë në adämaï iñäni incæ botö imote pönënäni iñinque tömënäni näni toquinque ingæimpa, angacäimpa.

Wäö nänö yewæmongainta quïnante yewæmongacäi

³⁰ Tömengä ëmiñæniniäni weca Itota, Ëñencædänimpa, ante wädö wädö cædinque tömengä nänö bamönengæ

ayæ godömenque nanguï pöni cægacäimpa. Botö iñömö iintaa yewæmöninque mäninö tömengä nänö cægainö ante wii tömäa yewæmontabopa. ³¹ Wæætë mäninö ante yewæmöninque botö, Itota mönö Codito inongäimpa, ante ayæ, Tömengä Wængonguï Wengä inongä ingampa, ante minitö pöncæminimpa, ante yewæmontabopa. Edæ tömengä ëmowo beyænque minitö mänömainö ante pönëninque cöwë wænämaï quëwencæminimpa, ante botö iinta yewæmömopa.

21

Itota tömengä ëmiñæninäni 7 ganca inäni weca pongä

¹ Ayæ ate tömengä ëmiñæninäni Tibediapæ näni ämä yæwedeca ëmönaiboga ongöñönäni Itota iñömö tömënäni weca pöninque a ongongä adänitapa. Edæ iïmaï batimpa. ² Timönö Pegodo adocanque, Tömato Äancadënaque näni änogä tönö Gadideabæ Cänaa në quëwengä Näatänaedo mënaa, Tebedeo wëna nana caya mënaa, ayæ Itota nänö në ëmiñænina wada mënaa mänimpodäni adoyömö ongönönänimpa. ³ Timönö Pegodo iñömö tömengä tönö ongönäni inänite,

—Botö ñowo gæyæ dadoncæ tao gobopa.

Angä ëñëninque tömënäni iñömö,

—Bitö miñäe gocæmönimpa.

Äninqe, Ægodödäni gomompa, ante tao godinque wipodë godongämæ guidinque tömäa woyowotä gæyæ dadoncæ cädäni incæte gæyæ dæ äenämaï inönänimpa.

⁴ Ñäö bayonte Itota iñömö ëmönaiya yæwedeca a ongongä adinque, Itota ingampa, ante tömengä ëmiñæninäni incä ëñënämaï inänitapa. ⁵ Ayæ tömengä tömënäni inänite yedæ aa pedinque,

—Iñänäni, gæyæ æminitawo.

Äñongante,

—Ænāmaī imōnipa.

⁶ Ānāni ēñēninque tōmengā wæætē,

—Mīnitō dicamonca wipo tōmēmæ inō æpænē wo guitodonte gæyæ dadonte æedāni.

Tōmengā nānō āmaī cædinque tōmēnāni nanguī pōni gæyæ dicamonca date owo adinque ædō cæte dicamonca wēā pōnonte ænguīnānii. ⁷ Itota ēmiñænīmo tōmengā nānō nē waadebo inōmo inte botō Pegodo ingante apænedinque,

—Īngā ĩñōmō mōnō Awēnē Itota ingampa.

Āmo ēñēninque Timōnō Pegodo ĩñōmō tōmengā yabæcoo nānō gā tadongate cōnōnīncoo æninque daga wēñate æpænē to go ti wæænīnque ōmaa taocantapa. ⁸ Wādāni Itota nānō nē ēmiñænīnāni ĩñōmō yæwedeca obo pōni tiēē mēetodo ganca baī ĩñōmō wāī wocædāni ĩnīnque wipodē ayæ owodāni ĩñōmō Pegodo miñæ wogaa godinque dicamō gæyæ eyede pōni wēā pōnō pōnānitapa. ⁹ Tōmēnāni wipodē inte pædæ æænoncado ponte ayōnāni, Æænonguī, ante gonga ēmōñōmō gæyæ ōñō adinque adoyōmō wædænque pāō cō cæte ōñō adānitapa. ¹⁰ Itota tōmēnāni ĩnānite,

—Gæyæ mīni ñōwo ænī wædænque ænte pōedāni.

¹¹ Angā ēñēninque Timōnō Pegodo wipodē pō guidinque dicamō ænte ēmōnaiya wēā tadongantapa. Edæ tiento tincoenta i todee ganca ĩnāni mānimpodāni gæyæ ñænængade dicamō ĩñōmō eyede owodāni incæte dicamō wangō tēmōnāmaī ĩnīmpa. ¹² Itota ĩñōmō tōmēnāni ĩnānite,

—Pō cæedāni,

Āñongante tōmengā ēmiñænīnāni tōmānāni, Mōnō Awēnē Itota ingampa, ante ēñēninque, Æbidō ĩmīi, ante tōmengā ingante ædō cæte anguīnānii. ¹³ Itota gongapamō ĩñōmō pōnīnque pāō ænte tōmēnāni ĩnānite pædæ

godongä ännäni ininque tömengä ayæ gæyæ öñö änninque tömännäni inänite pædæ godongä cænnänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñöwo tömengä emiñännäni weca mempoga go adopoque pongacäimpa.

Timönö Pegodo ingante Itota apænecä

¹⁵ Tömännäni iinque cænnäni ate Itota iñömö Timönö Pegodo ingante,

—Timönö Wäö wëmi ëñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Waadäni iñömö botö obegaidi wännäni bai iñönänite bitö tömännäni inänite botö angainö ante odömonte apænebi ëñencædänimpa, angantapa.

¹⁶ Ayæ wæætë,

—Timönö Wäö wëmi ëñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Waadäni botö obegaidi bai iñönänite bitö tömännäni inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäö wëmi ëñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä ëñëninque Pegodo wæwente inongäimpa. Incæte Itota ingante,

—Awënë bitö tömää ëñëmi imipa. Bitö imite botö waadedö ante bitö do ëñëmipa.

Ante wæyongä Itota wæætë,

—Waodäni iñömö në botö obegaidi bai iñönänite bitö tömënäni inänite botö angainö ante odömonte apänebi ëñencædänimpa. ¹⁸ Bitö imite näwangä ämopa. Bitö wëñämiyedë tömëmi nämä daga wëñadinque, Ædönö goinëmo, ante bitö goinënonque do gobi imitapa. Nöwo iñömö bitö picämi bayedë bitö pædæ gopoyömi wacä incæ bitö imite godö daga wëñadinque bitö goinënämai iñömö mäniiñömö bitö imite mäocä gocæbiimpa.

¹⁹ Pegodo ingante mänömainö ante apänedinque Itota iñömö, Tömengä ingante æbänö wänönäni wëñongä Wængongui ñäö apäite bai nänö ëmönö edonque bacäimpa, ante odömoncæte ante apänegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota ëmiñæningä nänö në waadecä

²⁰ Pegodo guiquënë dadi ëmænte botö Itota ëmiñænimo nänö në waadebo iñömö tömëna miñæ tee empo pömo acantapa. Mänimo iñömö do möni cæñedë Itota tönö ääñömonque tæ contadinque, “Awënë bitö imi æcänö godö odömonguinaa, apänebi ëñëmönie,” ante në apänedimo inömoimpa. ²¹ Pegodo botö imo adinque Itota ingante,

—Iingä iñömö në tee empo pongä diyæ æbänö tömengä beyæ bacäimpa.

²² Äñongä Itota wæætë,

—Botö ocä ëmænte ponguinganca tömengä ayæ quëwencæcäimpa, ämo bai bitö wæætë ædö cæte në ämi

inguimii. Botö iñömö në anguimo imopa. Bitö guiquënë botö miñæ tee empo ponguënemi imipa, angantapa.

²³ Mänömaï beyæ pancadäniya möni tönĩñadäni weca godinque gode ä gode ä cædinque botö imotedö ante apænedinque, ðingä iñömö cöwë wænämaï quëwengu- ingä ingampa, ante tedewengadänimpa. Itota iñæmpa, ðingä iñömö wænämaï quëwencæcäimpa, ante änämaï ingacäimpa. Wæætë, “Botö ocæ ëmænte ponguinganca tömengä ayæ quëwencæcäimpa, ante ämo baï bitö ædö cæte anguimii. Botö anguimo imopa,” ante mäninque angacäimpa.

²⁴ Tömëñäni, ðingä wænämaï quëwengä ingampa, ante näni në apænedimo iñömö edæ botö tömengä nänö në ëmiñænimo adobo imopa. Tömëmo, Æbänö batimpa, ante botö apænedö iñömö näwangä ante në apænedimo inte botö adodö ante tömänö ante në yewæmönimo imopa. Mäninö ante botö angainö iñömö näwangä impa, ante mönitö ëñëmönipa.

²⁵ Itota iñömö nanguï pönï godömenque wadö wadö cægacäimpa. Æbänö cæcää, ante tömää nänö cæ- gainö ante adinque yewæmömöni baï mänintacoo möni yewæmönintacoo ñönonguï ante edæ inguipoga tömäo incæ wii eyepæ incædönimpa, ante pönëmopa. Mäninque ante yewæmömopa.

Wængongui nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

